

MESYUARAT PERTAMA, PENGGAL KELIMA
PARLIMEN KEEMPAT BELAS
2022

HARI ISNIN : 14 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 8, 11 HINGGA NO. 92)**

**[SOALAN NO. 8 DIJAWAB BERSEKALI DENGAN
SOALAN NO. 17 DAN 75]**

NOTA : [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 14 MAC 2022 (ISNIN)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan sebab-sebab Kerajaan bercadang untuk melaksanakan kadar gaji minimum di paras sekitar RM1,500 pada penghujung tahun dan bukan melaksanakannya dengan segera.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 14 MAC 2022 (ISNIN)

SOALAN

DATO' SERI HAJI IDRIS BIN JUSOH [BESUT] minta **MENTERI SUMBER MANUSIA** menyatakan strategi Kementerian dalam menetapkan gaji minimum pada nilai sekitar RM1,500 sebulan sebelum penghujung tahun 2022, dalam usaha mengimbangi kos sara hidup golongan berpendapatan rendah.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

TARIKH : 14 MAC 2022 (ISNIN)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI SUMBER MANUSIA** menyatakan sekiranya Kerajaan akan menyegerakan semakan tingkat gaji minima lebih awal daripada hujung tahun 2022. Adakah Kerajaan akan meningkatkan tingkat gaji minima ke paras RM1600 untuk membantu golongan pekerja menghadapi kos hidup yang semakin meningkat.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : TUAN SHAHARIZUKIRNAIN BIN ABD.
KADIR [SETIU]**

TARIKH : 17 MAC 2022 (KHAMIS)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI SUMBER MANUSIA** menyatakan perancangan Kerajaan bagi mempercepatkan melaksanakan penetapan kadar gaji minimum pada nilai RM1,500.

JAWAPAN

Tuan Yang di-Pertua,

Saya mohon keizinan Tuan Yang Di-Pertua untuk menjawab secara bersekali soalan nombor 8 daripada **Yang Berhormat Ipoh Barat**, soalan nombor 17 daripada **Yang Berhormat Besut** , soalan nombor 75 daripada **Yang Berhormat Muar** bertarikh 14 Mac 2022 dan soalan nombor 48 daripada **Yang Berhormat Setiu** bertarikh 17 Mac 2022 iaitu mengenai pelaksanaan gaji minimum.

Kerajaan mengambil maklum permintaan beberapa pihak untuk menyegerakan pelaksanaan gaji minimum baharu kepada kadar yang lebih tinggi berikutan keadaan ekonomi semasa dan kos sara hidup yang semakin meningkat. Namun begitu kadar gaji minimum yang baharu hanya akan dilaksanakan dengan melihat keperluan sebenar rakyat dan kemampuan majikan.

Keluaran Dalam Negara Kasar Malaysia mencatatkan peningkatan sebanyak 3.6 peratus pada suku keempat tahun 2021. Peningkatan ini dapat dicapai dengan bantuan kewangan Kerajaan kepada pihak majikan bagi meneruskan operasi perniagaan serta mengekalkan pekerja. Berdasarkan unjuran dalam dokumen Belanjawan 2022, prestasi ekonomi dijangka akan berkembang pada kadar 5.5 hingga 6.5 peratus pada tahun 2022.

Dalam hal ini, Kerajaan mencadangkan pelaksanaan kadar gaji minimum baharu dalam masa terdekat dan bukan pada penghujung tahun 2022 memandangkan situasi ekonomi negara pada masa ini dilihat bertambah baik dan kebanyakan perniagaan dilihat berkembang serta menunjukkan trend pemulihan.

Berhubung pertanyaan **Yang Berhormat Muar** tentang peningkatan kadar gaji minimum kepada RM1,600.00 sebulan, Kerajaan menegaskan bahawa peningkatan kadar gaji minimum sewajarnya dilaksanakan secara berperingkat. Ini bagi menjamin kelangsungan operasi syarikat dan memastikan pekerjaan pekerja dapat dikekalkan.

SOALAN NO : 8,17,75 & 48

Peningkatan kadar gaji minimum yang terlalu tinggi dan drastik boleh menjejaskan daya saing negara menyebabkan pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL
[BUKIT GANTANG]**

TARIKH : 14 MAC 2022 (ISNIN)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI BELIA DAN SUKAN** menyatakan berapakah penyertaan bagi Program Pembangunan Bola Sepak (NFDP) di Parlimen Bukit Gantang pada 21 hingga 22 Januari 2022 baru-baru ini. Bilakah cadangan Kementerian untuk pecah tanah bagi projek pembinaan Mini Stadium di Padang Matang dan jumlah peruntukan yang akan disalurkan nanti.

JAWAPAN

Tan Sri Yang di-Pertua,

Untuk makluman Ahli Yang Berhormat, Kementerian melalui Majlis Sukan Negara (MSN) pada tahun 2022 telah mengorak langkah dengan melaksanakan pemilihan pelatih bagi pusat latihan yang baharu untuk Program Akademi Tunas (AT) di Bukit Gantang, Perak. Sesi Pemilihan bagi Program Akademi Tunas Bukit Gantang telah berlangsung pada 22 Januari 2022 bertempat Padang Awam Matang, Perak.

Penyertaan bagi sesi pemilihan bagi Program Akademi Tunas ini terdiri di kalangan pelatih-pelatih yang berumur di bawah 7 hingga 12 Tahun. **Seramai 107 pelatih** telah hadir bagi proses pemilihan atlet dan pecahan mengikut umur adalah seperti berikut:

- | | |
|-------------------|--------------|
| a) Bawah 7 Tahun | - 12 pelatih |
| b) Bawah 8 Tahun | - 19 pelatih |
| c) Bawah 9 Tahun | - 13 pelatih |
| d) Bawah 10 Tahun | - 14 pelatih |
| e) Bawah 11 Tahun | - 23 pelatih |
| f) Bawah 12 Tahun | - 26 pelatih |

Daripada sesi pemilihan tersebut, **seramai 83 pelatih** telah terpilih bagi mengikuti Program Akademi Tunas di Pusat Latihan Bukit Gantang bermula tahun 2022. Pecahan pelatih yang terpilih terdiri adalah:

- | | |
|-------------------|--------------|
| a) Bawah 7 Tahun | - 12 pelatih |
| b) Bawah 8 Tahun | - 19 pelatih |
| c) Bawah 9 Tahun | - 13 pelatih |
| d) Bawah 10 Tahun | - 8 pelatih |
| e) Bawah 11 Tahun | - 11 pelatih |
| f) Bawah 12 Tahun | - 20 pelatih |

Berhubung dengan pertanyaan Yang Berhormat mengenai pecah tanah bagi projek pembinaan Mini Stadium di Padang Matang, Kementerian ini telah mengemukakan permohonan untuk membina sebuah mini stadium di Matang kepada pihak Unit Perancang Ekonomi (EPU), Jabatan Perdana Menteri (JPM) untuk dilaksanakan melalui Rolling Plan Ke-3 (RP3), Rancangan Malaysia Ke-12 (RMKe-12) Tahun 2023 bagi pertimbangan dan kelulusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 14 MAC 2022 (ISNIN)

SOALAN

DATO' ABDULLAH SANI BIN ABDUL HAMID [KAPAR] minta **MENTERI SUMBER MANUSIA** menyatakan apakah tindakan atau pelan dalam isu majikan yang menggajikan pendatang asing tanpa izin (PATI) sehingga menafikan peluang pekerjaan kepada rakyat tempatan.

JAWAPAN

Tuan Yang di-Pertua,

Kerajaan sentiasa memberi keutamaan kepada rakyat tempatan bagi mengisi kekosongan pekerjaan di pelbagai lapisan pekerjaan. Ketika ini, hanya pemegang Pas Lawatan Kerja Sementara sahaja dibenarkan bekerja di dalam sektor yang dibenarkan.

Keberadaan warga asing di negara ini tidak hanya menjadi tanggungjawab pihak Kerajaan malahan melibatkan peranan pelbagai pihak termasuklah rakyat negara ini. Semua rakyat Malaysia perlu turut serta dalam membentaras kehadiran pekerja asing tanpa izin dengan tidak memberi perlindungan atau menyewakan premis atau harta benda atau menggaji pekerja tanpa izin.

Bagi mengatasi masalah tersebut, Kerajaan telah mengambil tindakan berikut:

- i. Kerajaan telah melancarkan Pelan Rekalibrasi Pendatang Asing Tanpa Izin yang bermula pada 16 November 2020 hingga 31 Disember 2021 yang merangkumi dua komponen utama program khas iaitu :
 - a. Program Rekalibrasi Pulang merupakan program yang membenarkan pekerja asing tanpa izin untuk pulang ke negara asal secara sukarela tertakluk kepada syarat-syarat tertentu yang ditetapkan; dan
 - b. Program Rekalibrasi Tenaga Kerja pula merupakan suatu program khas untuk meregularisasikan pekerja asing tanpa izin di negara ini sebagai pekerja asing yang sah digajikan oleh majikan yang layak tertakluk kepada syarat-syarat ketat yang diputuskan oleh Kerajaan.

SOALAN NO: 12

- ii. Pihak kerajaan terus bergerak ke arah memberi keutamaan kepada rakyat tempatan bekerja dengan kempen untuk mengajak lebih ramai rakyat tempatan termasuk golongan Orang Asli, bekas banduan dan bekas penagih dadah bekerja contohnya di sektor perladangan dan industri komoditi;
- iii. **Karnival Kerjaya Jamin Kerja Keluarga Malaysia 2022** peringkat negeri di seluruh Malaysia akan diadakan bagi memastikan segala usaha Kerajaan dalam menawarkan peluang pekerjaan melalui inisiatif Jamin Kerja ini dapat disampaikan kepada seluruh Keluarga Malaysia dengan lebih berkesan;
- iv. Majikan diwajibkan untuk membuat **pengiklanan kekosongan jawatan** untuk **tempoh tidak kurang dari 30 hari di portal MyFutureJobs** bagi tujuan memberi ruang kepada pekerja tempatan mengisi kekosongan jawatan tersebut. Sekiranya tiada pengisian dari calon pekerja tempatan, barulah majikan dibenarkan membuat permohonan pengambilan pekerja asing dan pegawai dagang.
- v. **Penguatkuasaan oleh Jabatan Imigresen Malaysia.**
 - a. Pihak Jabatan Imegresen Malaysia sentiasa menjalankan operasi penguatkuasaan bagi membentaras tindakan majikan mengajikan pekerja asing tanpa izin sehingga menafikan peluang pekerjaan kepada rakyat tempatan. Adalah menjadi satu kesalahan dibawah Seksyen 55B Akta Imigresen 1959/63 bagi mana-mana majikan menggaji pekerja asing tanpa izin. Berdasarkan maklumat Jabatan Imegresen Malaysia, setakat 25 Februari 2022, seramai 6 orang majikan telah ditangkap atas kesalahan menggaji pekerja asing tanpa izin;
 - b. Setakat 25 Februari 2022, sebanyak 1,381 operasi pemeriksaan pekerja asing tanpa izin telah dilaksana. Daripada jumlah operasi tersebut seramai 34,290 warga asing telah diperiksa dan 3,265 orang warga asing tanpa izin telah ditangkap.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : JAWAB LISAN

**DARIPADA : TUAN LARRY SOON @ LARRY SNG WEI SHIEN
[JULAU]**

TARIKH : 14 MAC 2022 (ISNIN)

SOALAN

TUAN LARRY SOON @ LARRY SNG WEI SHIEN minta **MENTERI KESIHATAN** menyatakan apakah tindakan Kementerian untuk memastikan penduduk setempat di kawasan Parlimen Julau dapat akses kepada khidmat perkhidmatan klinik kesihatan yang lebih baik dan kondusif. Ini berikutan kapasiti klinik sedia ada seperti Klinik Kesihatan Julau dan Klinik Kesihatan Pakan kedua-duanya agak terhad dan penuh sesak.

JAWAPAN

Tuan Yang di-Pertua,

1. Untuk makluman, terdapat sebanyak 6 buah klinik kesihatan (KK) di daerah Julau iaitu KK Julau (Jenis 4), KK Sekalong (Jenis 7), KK Nanga Entabai (Jenis 7), KK Lassi (Jenis 7), KK Maong (Jenis 7) dan KK Nanga Ensiring (Jenis 7) yang masing-masing terletak di dalam lingkungan 20-80 km dari KK Julau. Manakala Hospital Kanowit terletak 39 km dari KK Julau dan Hospital Sarikei pula terletak 60 km dari KK Julau.

2. Kementerian Kesihatan sedia maklum akan kekurangan ruang terutamanya di Klinik Kesihatan Julau. Sehubungan itu, projek pembangunan Klinik Kesihatan Julau baharu telah diluluskan dalam *Rolling*

Plan Pertama 2021, Rancangan Malaysia Kedua Belas (RMKe-12). Pada masa ini, agensi pelaksana iaitu Jabatan Kerja Raya (JKR) sedang menyediakan anggaran kos projek bagi tujuan tender pada akhir tahun 2022.

3. Manakala di daerah Pakan, terdapat sebanyak 5 buah Klinik Kesihatan iaitu KK Pakan (Jenis 6), KK Nanga Wak (Jenis 7), KK Kemalih (Jenis 7), KK Nanga Entaih (Jenis 7) dan KK Nanga Kara (Jenis 7) yang masing-masing terletak dalam lingkungan 20-40 km dari KK Pakan. Hospital yang terdekat pula adalah Hospital Sarikei dengan jarak 47 km dari KK Pakan.

4. Bagi Klinik Kesihatan Pakan, KKM berpandangan KK sedia ada masih lagi mampu menampung kadar kedatangan pesakit harian.

5. Walau bagaimanapun, KKM akan terus memantau dari semasa ke semasa sekiranya terdapat keperluan-keperluan lain untuk dinaik taraf di KK Pakan atau lain-lain fasiliti kesihatan di Sarawak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN JUNE LEOW HSIAD HUI
(HULU SELANGOR)**

TARIKH : 14 MAC 2022 (ISNIN)

SOALAN

PUAN JUNE LEOW HSIAD HUI (HULU SELANGOR) minta **MENTERI PERUMAHAN DAN KERAJAAN TEMPATAN** menyatakan pelan jangka panjang dalam mewujudkan perumahan baharu Program Perumahan Rakyat (PPR) di Malaysia dan adakah PPR baharu dapat dibina di Hulu Selangor memandangkan permintaan kian meningkat.

JAWAPAN

Tuan Yang di-Pertua,

Untuk makluman Ahli Yang Berhormat, perancangan pembinaan sesuatu Program Perumahan Rakyat (PPR) adalah berdasarkan kepada permintaan kerajaan negeri. Kementerian Perumahan dan Kerajaan Tempatan (KPKT) sentiasa bersedia mempertimbangkan sebarang cadangan pembangunan PPR yang dikemukakan oleh kerajaan negeri. Cadangan yang dikemukakan tersebut akan diteliti oleh KPKT berdasarkan kepada keutamaan yang ditentukan oleh kerajaan negeri, kesesuaian tapak dan keperluan penduduk setempat. Namun begitu, kelulusan bagi pelaksanaan projek PPR adalah bergantung kepada kedudukan kewangan Kerajaan Persekutuan.

Pada masa ini, terdapat dua (2) projek PPR yang telah siap dibina di Parlimen Hulu Selangor iaitu PPR Serendah KTM (Pangsapuri Seri Kiambang) dan PPR Kg. Hassan (PPR Taman Danau). Jumlah keseluruhan unit di kedua-dua PPR tersebut adalah sebanyak 600 unit. Secara keseluruhannya, terdapat empat (4) PPR yang telah siap dibina oleh Kerajaan Persekutuan di Selangor iaitu PPR Lembah Subang I, PPR Serendah KTM, PPR Lembah Subang II dan PPR Kg. Hassan. Kesemua PPR ini merangkumi 5,184 unit rumah dengan kos keseluruhan sebanyak RM235,203,528.40. Selain itu, terdapat dua (2) PPR dalam peringkat pembinaan di Selangor iaitu PPR Sg. Yu, Tanjung Karang yang melibatkan 500 unit rumah dan PPR Ampar Tenang, Dengkil yang melibatkan 404 unit rumah. Jumlah keseluruhan unit di kedua-dua PPR tersebut adalah sebanyak 904 unit.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN KHALID ABD SAMAD (SHAH ALAM)

TARIKH : 14 MAC 2022 (ISNIN)

SOALAN

TUAN KHALID BIN ABD SAMAD (SHAH ALAM) minta **MENTERI DALAM NEGERI** menyatakan apakah usaha Kerajaan untuk mengatasi masalah kematian dalam tahanan yang semakin meningkat.

JAWAPAN

Tuan Yang Di-Pertua,

Kementerian Dalam Negeri (KDN) melalui Polis Diraja Malaysia (PDRM) mengambil berat tentang hak asasi tahanan di semua lokap PDRM di seluruh negara. Ini termasuk usaha mengatasi kes tahanan mati semasa berada di bawah pengawasan PDRM.

Justeru, untuk menambahbaik pengurusan tahanan dalam lokap PDRM, PDRM telah menyediakan Garis Panduan Standard (SOP) yang lebih ketat termasuk dalam menguruskan tahanan sakit, meningkatkan kekerapan rondaan di sel pada waktu malam, serta penambahan anggota yang menguruskan tahanan.

Di samping itu, PDRM dengan kerjasama Kementerian Kesihatan Malaysia (KKM) telah mewujudkan *Custodial Health Unit* (CHU) di lima (5) Lokap Berpusat dan Lokap Berpusat Bayan Baru, Pulau Pinang dijadikan sebagai projek rintis bagi memastikan tahanan yang ditahan di lokap PDRM mendapat pemeriksaan kesihatan sewajarnya. Inisiatif ini adalah salah satu langkah pencegahan bagi mengelak berlakunya kematian tahanan lokap PDRM.

Dalam masa yang sama, pada 10 Disember 2021, Jemaah Menteri telah bersetuju dengan cadangan KDN untuk melaksanakan inisiatif pemeriksaan kesihatan Orang Kena Tahan (OKT) oleh Pengamal Perubatan Swasta bagi membantu kekurangan Pegawai Perubatan Kerajaan sedia ada. Inisiatif ini

dijangka memberi manfaat kepada lebih kurang 200 ribu OKT setiap tahun dan ini sudah pasti membantu dalam memastikan OKT yang ditahan berada dalam keadaan sihat.

Selain itu, pemasangan kamera litar tertutup (CCTV) di 684 lokap balai polis/IPD/IPK PDRM sedang dilaksanakan bagi mengawasi dan memantau OKT di sel-sel lokap demi memastikan kejadian tidak diingini berlaku di dalam lokap.

Tuan Yang Di-Pertua,

Mulai Januari 2022, semua kes kematian dalam tahanan disiasat oleh Unit Siasatan Jenayah Kematian Dalam Tahanan (USJKT), Jabatan Integriti dan Pematuhan Standard (JIPS) Bukit Aman, dan tidak lagi disiasat oleh Pegawai Penyiasat di mana kejadian berlaku bagi memastikan ketelusan siasatan dan tidak berkompromi terhadap sebarang pelanggaran undang-undang dan salahlaku tatatertib. Kes-kes berkaitan bukan sahaja disiasat di bawah aspek jenayah tetapi juga disiasat dari aspek tatatertib.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TENGKU ZULPURI BIN RAJA PUJI
(RAUB)**

TARIKH : 14.3.2022 (ISNIN)

SOALAN

TENGKU ZULPURI BIN RAJA PUJI (RAUB) minta **MENTERI PEMBANGUNAN LUAR BANDAR** menyatakan apakah perancangan serta tindakan pihak Kerajaan pusat untuk menaikkan taraf kehidupan dalam memajukan perkembangan aktiviti kebudayaan Orang Asli di Malaysia. Adakah pihak Kerajaan bercadang untuk mendirikan pusat setempat sosial ekonomi untuk mendorong mereka menjayakan pasaran seni ukiran, anyaman origami dan lain-lain produk tradisional.

JAWAPAN

Tuan Yang di-Pertua,

Kementerian Pembangunan Luar Bandar melalui Jabatan Kemajuan Orang Asli (JAKOA) sebagai agensi yang bertanggungjawab menjaga kebajikan dan kesejahteraan masyarakat Orang Asli sebagaimana termaktub dalam Akta Orang Asli 1954 (Akta 134) telah merancang dan melaksanakan beberapa aktiviti/ program pembangunan secara inklusif untuk meningkatkan taraf kehidupan khususnya dalam memajukan perkembangan aktiviti kebudayaan Orang Asli.

Kementerian melalui JAKOA telah menjalankan kerjasama strategik dengan Kementerian Pelancongan, Seni dan Budaya Malaysia (MOTAC) melalui program dan promosi persembahan kebudayaan di dalam dan luar negara seperti lukisan, tarian, pakaian, anyaman, alat muzik tradisional Orang Asli dan sebagainya. Kerjasama ini telah berjaya mengetengahkan warisan budaya masyarakat Orang Asli dan membuka peluang ekonomi kepada pengusaha produk-produk berkaitan.

Selain daripada itu, sambutan Hari Orang Asli peringkat nasional juga diadakan pada setiap tahun bertujuan untuk mengiktiraf, memperkenalkan serta mengetengahkan warisan dan kebudayaan masyarakat Orang Asli. Penganjuran sambutan yang dipenuhi oleh pelbagai aktiviti kebudayaan diharap dapat memulihara serta mengekalkan warisan sedia ada.

Di samping itu, penganjuran Karnival Usahawan Orang Asli yang dilaksanakan setiap tahun juga turut menjadi platform bagi meningkatkan jualan produk-produk usahawan Orang Asli. Karnival Usahawan ini berjaya mengumpulkan hampir semua usahawan Orang Asli untuk mempromosi dan memasarkan produk masing-masing termasuk produk hasil seni, ukiran, kraftangan dan sebagainya.

Bagi tujuan peningkatan taraf hidup masyarakat Orang Asli, Kementerian telah melaksanakan Projek Pembangunan Bersepadu Orang Asli *One Stop Centre* (OAOSC) Kampung Bawong, Sungai Siput, Perak dan Projek Pembangunan Bersepadu Orang Asli *One Stop Centre* (OAOSC) Gua Musang, Kelantan yang akan berfungsi sebagai pusat satu hentian komersial yang menawarkan pelbagai perkhidmatan kepada orang

awam termasuklah galeri pameran dan jualan seni kraftangan masyarakat Orang Asli daripada pelbagai suku kaum. Pelaksanaan projek ini akan meningkatkan penglibatan Orang Asli dalam aktiviti ekonomi, sosial dan kebudayaan.

Dalam pada itu, OAOSC ini juga sebagai inisiatif untuk mempromosikan seni kebudayaan Orang Asli berasaskan ukiran, anyaman, tenunan, sulaman, lukisan dan lain-lain yang bersifat tradisional kepada pengunjung yang datang.

Selain daripada projek OAOSC, Kementerian turut membina lapan (8) premis untuk penghasilan dan jualan kraftangan yang diusahakan oleh usahawan Orang Asli yang bertempat di Kampung Jemeras (Rompin), Kampung Orang Asli Ulu Chembong (Rembau), Kampung Batu 7 (Batang Padang), Kampung Pos Raya (Gopeng), Kampung Beringin (Simpang Pulai), Kampung Pos Iskandar (Bera), Kampung Orang Asli Air Karah (Lenggong) dan Kampung Batu 14 (Batang Padang).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : TUAN IGNATIUS DORELL LEIKING (PENAMPANG)

TARIKH : 14 MAC 2022 (ISNIN)

SOALAN

TUAN IGNATIUS DORELL LEIKING (PENAMPANG) minta **MENTERI DALAM NEGERI** menyatakan status siasatan yang telah dimulakan tahun lepas mengenai kebocoran pangkalan data Jabatan Pendaftaran Negara yang telah dilaporkan sebelum ini telah memberi impak buruk kepada negara serta langkah-langkah yang telah diambil untuk mengatasi kebocoran maklumat peribadi rakyat negara ini daripada berulang.

JAWAPAN

Tuan Yang Di Pertua,

PDRM telah menerima satu (1) laporan polis berkaitan maklumat penjualan data penduduk bertaraf warganegara kelahiran tahun 1979 sehingga tahun 1998 oleh Raidforums.com. Maklumat data penduduk tersebut dikatakan diperolehi melalui perkongsian maklumat MyIDENTITY di Lembaga Hasil Dalam Negeri (LHDN). Kertas siasatan telah dibuka di bawah Seksyen 4(1) Akta Jenayah Komputer 1997 (Akta 563) (Capaian tanpa kuasa dengan niat untuk melakukan atau memudahkan berlakunya kesalahan lanjut). Modus Operandi kes ini ialah suspek akan membuat capaian tanpa kuasa terhadap pelayan (server) untuk tujuan menjual maklumat dan data dari pelayan tersebut di laman web Raidforum. Beberapa rampasan pelayan di JPN dan KPDNHEP telah dibuat untuk siasatan lanjut. Kes ini masih dalam siasatan dan tiada tangkapan setakat ini. Justeru, pihak Kementerian tidak berhasrat untuk mengulas lebih lanjut agar tidak mengganggu siasatan yang sedang dilakukan.

Pihak Kementerian juga ingin menegaskan bahawa **keselamatan capaian dan data di dalam Sistem myIDENTITY di bawah kendalian JPN adalah terjamin** dengan pelaksanaan aktiviti pengukuhan keselamatan secara berkala seperti *Security Posture Assessment (SPA)*.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK ZAKARIA BIN MOHD. EDRIS
@ TUBAU [LIBARAN]**

TARIKH : 14 MAC 2022 (ISNIN)

SOALAN

minta **MENTERI PEMBANGUNAN USAHAWAN DAN KOPERASI**
menyatakan :-

- (a) sejauh manakah kejayaan pelaksanaan program-program francais di bawah seliaan Kementerian; dan
- (b) apakah usaha Kementerian untuk mempergiatkan lagi penglibatan golongan belia dalam bidang francais.

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) optimis untuk melahirkan bangsa usahawan khususnya dalam industri francais melalui Perbadanan Nasional Berhad (Pernas) dengan melaksanakan pelbagai inisiatif kepada usahawan francais pada tahun 2021 seperti berikut:

a) Pembiayaan

Sebanyak RM41 juta pembiayaan francais telah disediakan kepada 178 usahawan francais melalui pelbagai skim pembiayaan di bawah Pernas. Antaranya ialah:-

- (i) Skim Pembiayaan Francaisi/Francaisor;
- (ii) Skim Pembiayaan Pra-Francais/ Pra-Francaisor;
- (iii) Skim Pembiayaan Pra-Francais (Lisensor/Lisensee); dan
- (iv) Skim *Recurve*.

b) Latihan dan bimbingan

(i) Projek Xcelerator

Projek Xcelerator telah berjaya membimbing dan membangunkan 8 syarikat yang berpotensi ke arah perniagaan francais.

(ii) Projek Jom Jadi Usahawan Berjaya, *Be Your Own Boss* (BYOB)

Projek BYOB telah dilancarkan pada awal tahun 2021 merupakan salah satu usaha Kementerian untuk melahirkan lebih ramai usahawan terutamanya daripada golongan wanita dan belia dalam perniagaan francais bagi mewujudkan 18,000 peluang pekerjaan dalam bidang francais untuk tempoh 5 tahun bermula dari tahun 2021. Seramai 1,070 orang telah mendaftar sebagai peserta BYOB dan sebanyak 74 pembiayaan di bawah BYOB berjumlah RM12.3 juta telah

diluluskan pada tahun 2021.

Bagi mempergiatkan penglibatan belia dalam bidang francais, Projek BYOB turut menawarkan Program Pembiayaan Keusahawanan Francais Belia (YOUNITY) khusus untuk golongan belia. Sehingga 31 Disember 2021, seramai 545 belia telah menyertai program YOUNITY dan sebanyak 38 pembiayaan berjumlah RM6.58 juta telah diluluskan. Bagi tahun 2022, Pernas telah menyasarkan penyertaan seramai 1,100 orang peserta untuk projek BYOB dalam kalangan graduan, belia, wanita dan asnaf.

KUSKOP juga telah menjalinkan kerjasama strategik dengan Kementerian Pengajian Tinggi (KPT) dan Kementerian Belia dan Sukan (KBS) untuk meningkatkan penglibatan belia serta mahasiswa untuk menceburi bidang keusahawanan francais. Pernas menerusi Institut Francais juga menyediakan pelbagai program latihan berfokuskan francais dan keusahawanan secara menyeluruh serta memberikan taklimat kesedaran keusahawanan francais kepada usahawan terutamanya golongan belia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : TUAN NIK NAZMI BIN NIK AHMAD
[SETIAWANGSA]**

TARIKH : 14 MAC 2022 (ISNIN)

SOALAN

TUAN NIK NAZMI BIN NIK AHMAD [SETIAWANGSA] minta **MENTERI SUMBER MANUSIA** menyatakan mengapa timbul dakwaan dari Kerajaan Bangladesh bahawa Malaysia hanya membenarkan 25 Bangladesh Recruitment Agency dan 250 sub-ejen sedangkan Bangladesh mahu membenarkan semua 1,600 ejen turut serta agar proses tersebut menjadi telus dan terbuka selari dengan piagam-piagam Pertubuhan Buruh Antarabangsa.

JAWAPAN

Tuan Yang di-Pertua,

Memorandum Persefahaman Penggajian Pengambilan Pekerja antara Malaysia dengan Bangladesh telah ditandatangani pada 19 Disember 2021 untuk tempoh lima tahun. Memorandum Persefahaman ini adalah pembaharuan kepada yang ditandatangani pada 2016 dan bukanlah satu memorandum yang baru. Dalam Memorandum Persefahaman yang asal hanya 10 Agensi Pengambilan Pekerja Bangladesh yang dibenarkan untuk pengambilan pekerja.

Namun, Mesyuarat Jemaah Menteri pada 10 Disember 2021 telah bersetuju dalam pembaharuan Memorandum Persefahaman ini, kerajaan mengambil inisiatif untuk menambah 25 Agensi Pengambilan Pekerja Bangladesh utama dan 250 sub-ejen. Maka, jumlah tersebut adalah 275 agensi berbanding 10 agensi sahaja sebelum ini.

Kerajaan juga telah menekankan bahawa Malaysia hanya membenarkan 275 agensi dan bukan kesemua 1,600 agensi. Hal ini bagi mengelakkan negara ini menjadi lambakan pekerja asing dan timbul isu buruh paksa.

Oleh itu, tiada isu wujudnya sindiket atau monopoli dalam pelantikan Agensi Pengambilan Pekerja Bangladesh susulan perjanjian pengambilan pekerja Bangladesh dalam tempoh lima tahun antara kedua-dua negara.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI
MOHD FAKEH [SABAK BERNAM]**

TARIKH : 14 MAC 2022 (ISNIN)

SOALAN

DATO' HAJI MOHD FASIAH BIN HAJI MOHD FAKEH minta **MENTERI KESIHATAN** menyatakan bilangan kes COVID-19 yang berpunca dari varian OMICRON terkini termasuk yang disebarkan oleh jemaah umrah serta nyatakan langkah Kementerian bagi membendung gelombang varian OMICRON dari terus merebak di negara ini.

JAWAPAN

Tuan Yang di-Pertua,

1. Sehingga 3 Mac 2022, menerusi penjujukan genom penuh yang dijalankan, sebanyak 1,389 kes COVID-19 adalah varian Omicron dengan 583 kes merupakan jemaah umrah. Laporan ini adalah hasil kerjasama konsortium yang terdiri daripada Institut Penyelidikan Perubatan (*Institute For Medical Research–IMR*), *Malaysia Genome and Vaccine Institute* (MGVI) serta *Institute of Health and Community Medicine*, Universiti Malaysia Sarawak (IHCM-UNIMAS), *Tropical Infectious Diseases Research & Education Centre*, Universiti Malaya (TIDREC, UM), UKM Medical Molecular Biology Institute (UMBI-UKM), *Integrative Pharmacogenomics Institute*, Universiti Teknologi MARA (iPROMISE, UiTM), Hospital Pengajar Universiti Putra Malaysia (HP-UPM) dan Hospital Universiti Sains Malaysia (USM).

2. Kementerian Kesihatan Malaysia (KKM) mengambil maklum dan memandang serius mengenai peningkatan kes Omicron di Malaysia. Sehubungan dengan itu, KKM terus meningkatkan aktiviti kawalan dan pencegahan bagi membendung gelombang varian Omicron dari terus merebak di negara ini. Di antara langkah-langkah yang telah diambil adalah:

(i) Langkah-langkah Kawalan Sempadan di Pintu Masuk Antarabangsa (PMA)

- a. Mengemaskini pematuhan Standard Operasi Prosedur (SOP) untuk pengembara dari luar negara iaitu;
 - Ujian RT-PCR negatif dua (2) hari sebelum berlepas;
 - Ujian RT-PCR pada semasa ketibaan di PMA;
 - Kuarantin wajib adalah lima (5) hari bagi yang telah menerima dos penggalak vaksin COVID-19, tujuh (7) hari bagi yang telah lengkap menerima vaksin COVID-19 atau 10 hari yang belum lengkap / tiada menerima vaksin COVID-19; dan
 - Menjalani ujian COVID-19 sebelum pelepasan perintah pengawasan dan pemerhatian (*release order*).
- b. Pematuhan SOP terkini bagi *Vaccinated Travel Lane* (VTL); dan
- c. Pematuhan SOP terkini bagi *Langkawi International Travel Bubble* (LITB).

(ii) Tindakbalas Kesihatan Awam dan Vaksinasi

- a. Mengemaskini SOP Pelan Pemulihan Fasa 4 selaras dengan perkembangan terkini jangkitan COVID-19 berdasarkan dapatan saintifik terkini di seluruh dunia dan di Malaysia;
- b. Kawasan di bawah Perintah Kawalan Pergerakan Diperketatkan (PKPD) ditukar kepada PKPD setempat;
- c. Mempertingkatkan pemerkasaan komuniti melalui isolasi

kes secara digital melalui aplikasi MySejahtera seperti;

- Kes kategori 1 dan 2a diisolasi di rumah;
 - Kes 2b akan dirujuk kepada CAC (*COVID-19 Assessment Centre*) bagi penilaian risiko selanjutnya. Golongan warga emas atau dengan komorbid yang memerlukan rawatan akan dirujuk untuk rawatan lanjut; dan
 - Pemberian arahan kuarantin (*Home Quarantine Order*) dan pelepasan [*Release Order (RO)*] dilakukan secara digital melalui MySejahtera bagi mengelakkan kesesakan di pusat-pusat COVID-19 Assessment Centre (CAC).
- d. Melipatgandakan inisiatif pemberian dos penggalak dengan menyasarkan pencapaian 60% populasi dewasa sehingga Mac 2022. Di antara strategi yang dicadangkan adalah mewajibkan kepada semua jemaah umrah mendapatkan dos penggalak sebelum menunaikan umrah serta memperluaskan pemberian vaksin di Pusat Pemberian Vaksin (PPV) *Mega* dan *Outreach*; dan
- e. Memperluaskan pemberian vaksin COVID-19 kanak-kanak di PPV terpilih seperti PPV Integrasi, PPV Offsite, sPPV, PPV HS dan PPV GP. Pembukaan PPV Sekolah pula akan dibuka secara berperingkat.

(iii) Mempertingkatkan Strategi Pengujian COVID-19 dan Survelan

- a. Untuk ujian COVID-19, KKM mencadangkan:
- memperluaskan “*point of care test*”;
 - meningkatkan penggunaan RTK-Ag sendiri and profesional;
 - meneruskan ujian COVID-19 hanya kontak rapat yang bergejala; dan
 - memberi pelepasan kes positif tanpa ujian selepas kuarantin D7.
- b. Untuk surveilan KKM mencadangkan
- meneruskan pemantauan makmal dan pengawasan klinikal; dan

- mengembangkan bilangan dan kapasiti makmal (awam dan swasta) dari 3000-5000/ bulan untuk pengawasan *Whole Genome Sequencing* (WGS).

(iv) Memperkemaskan Pengurusan Kes COVID-19

- a. Mengamalkan Pelan Kesyediaan Fasilitas Kesihatan, Perubatan (PKFK) yang merangkumi 4 teras dan 12 strategi utama melalui pendekatan:
 - kecukupan akses (semua hospital COVID-19 telah dikenal pasti);
 - kemampuan rawatan;
 - meningkatkan kecekapan pra-Hospital & pengurusan kecemasan;
 - pencegahan jangkitan nosokomial COVID-19; serta
 - mengeluarkan Garis Panduan Penjagaan Klinikal yang baik.
- b. Penjagaan Kesihatan Primer – mempertingkatkan penjagaan kesihatan primer melalui:
 - memperluaskan fungsi CAC maya dan fizikal (swasta dan awam);
 - menyemak dan memperkemaskan aliran penjagaan COVID-19 di CAC KKM
 - tiada lagi pengesanan digital di CAC;
 - tiada lagi lawatan ke CAC untuk RO;
 - jika diperlukan penilaian visual dan tidak ada penilaian penuh; dan
 - menghadkan lawatan ke CAC, lawatan ke CAC hanya untuk kes COVID-19 sederhana (kategori 2b, 3).
 - merujuk CAC jika lebih 60 tahun, kes ada pelbagai komorbiditi, tidak divaksinasi atau menerima vaksin sinovac atau kes merupakan *immuno compromised*;
 - meningkatkan penyertaan Klinik Swasta (GP) dalam pengurusan kes COVID-19;

SOALAN NO : 21

- memperluaskan perkhidmatan rundingan dalam talian-talian hotline; dan
- panggilan oleh robot (*Robocall*) bagi pesakit-pesakit yang tidak melakukan penilaian sendiri melalui Home Assessment Tool (HAT) di Mysejahtera bagi memantau keadaan pesakit di rumah.

3. Menurut data dari Global Initiative on Sharing Avian Influenza Data (GISAID), sebanyak 899 kes COVID-19 berpunca dari varian Omicron telah dikenalpasti. Daripada 899 kes ini, 272 merupakan kes COVID-19 di kalangan jemaah umrah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI DR. HAJI DZULKEFLY BIN AHMAD
[KUALA SELANGOR]**

TARIKH : 14 MAC 2022 (ISNIN)

SOALAN

DATUK SERI DR. HAJI DZULKEFLY BIN AHMAD [KUALA SELANGOR]
minta **MENTERI SUMBER MANUSIA** menyatakan kadar pengangguran
terkini dan apakah unjuran pihak Kerajaan bahawa kadar pengangguran
negara akan kembali stabil seperti sebelum era COVID-19.

JAWAPAN

Tuan Yang Di Pertua,

Berdasarkan Survei Tenaga Buruh oleh Jabatan Perangkaan Malaysia, kadar pengangguran Malaysia pada Disember 2021 merekodkan **pengurangan sebanyak 0.6 mata peratus kepada 4.2 peratus** berbanding 4.8 peratus pada Disember 2020.

Kerajaan mensasarkan penurunan kadar pengangguran kepada 4 peratus selaras dengan sasaran yang ditetapkan dalam Rancangan Malaysia Kedua Belas bagi tempoh 2021-2025. Kerajaan dari semasa ke semasa juga akan menambah baik langkah-langkah sedia ada dan akan mewujudkan lebih banyak program atau mekanisme bagi membantu rakyat mendapatkan pekerjaan dan mengatasi kadar pengangguran negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WILLIAM LEONG JEE KEEN (SELAYANG)

TARIKH : 14 MAC 2022 (ISNIN)

SOALAN

TUAN WILLIAM LEONG JEE KEEN (SELAYANG) minta **MENTERI PERUMAHAN DAN KERAJAAN TEMPATAN** menyatakan bahan pencemar, gas-gas toksik, bahaya alam sekitar daripada operasi insinerator sisa buangan kepada tenaga (waste-to-energy incinerator), dan kajian impak alam sekitar bagi menempatkan insinerator ini di tapak Rawang Land 3.

JAWAPAN

Tuan Yang di-Pertua,

Untuk makluman Ahli Yang Berhormat, selaras dengan persetujuan Jemaah Menteri pada 17 Jun 2020, lokasi cadangan projek loji *Waste to Energy* (WtE) Taman Beringin, Kepong, Kuala Lumpur telah berpindah ke Rawang Land 3, Selangor. Lanjutan itu, Unit Kerjasama Awam Swasta (UKAS) pada 19 Januari 2022 telah membentangkan Memorandum Jemaah Menteri bagi semakan semula terma-terma utama cadangan projek loji rawatan sisa pepejal WtE secara kerjasama awam swasta di Rawang, Selangor selaras dengan perjanjian perkhidmatan untuk kelulusan Jemaah Menteri. Pada masa ini, pihak UKAS dan beberapa agensi yang berkaitan sedang memuktamadkan draf perjanjian perkhidmatan bersama pihak syarikat.

Setelah perjanjian perkhidmatan ini dimuktamadkan dan ditandatangani, kajian impak alam sekitar (*Environmental Impact Assessment*, EIA) akan dijalankan oleh pihak syarikat dan perlu diluluskan oleh Jabatan Alam Sekitar (JAS) sebelum pembinaan loji WtE ini boleh dilaksanakan. Hal ini adalah kerana ianya merupakan sebahagian daripada syarat duluan (*condition precedent*) yang perlu dipenuhi oleh pihak syarikat sebelum perjanjian perkhidmatan boleh berkuat kuasa.

Selain itu, gas-gas yang dihasilkan oleh loji WtE akan dirawat oleh sistem *air pollution control* dan kualiti pelepasan akan dipantau secara berterusan oleh JAS menggunakan *continuous emission monitoring system* (CEMS). Gas-gas yang dihasilkan adalah gas karbon dioksida (CO₂) dan wap air manakala gas-gas lain seperti nitrogen dioksida (NO₂), sulphur dioksida (SO₂), dioxin dan furan adalah dalam kuantiti yang sedikit dan boleh diabaikan. Abu (*ash*) yang dihasilkan pula akan dihantar ke fasiliti yang diluluskan oleh JAS untuk proses seterusnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WILSON UGAK ANAK KUMBONG
(HULU RAJANG)**

TARIKH : 14 MAC 2022 (ISNIN)

SOALAN

DATUK WILSON UGAK ANAK KUMBONG (HULU RAJANG) minta **MENTERI BELIA DAN SUKAN** menyatakan sekiranya pihak Kementerian bercadang untuk menaik taraf Stadium Sg. Asap, Belaga dan membina stadium di Pekan Belaga.

JAWAPAN

Tan Sri Yang Di-Pertua,

Untuk makluman Ahli Yang Berhormat, Kementerian Belia dan Sukan (KBS) buat masa ini sedang memfokuskan kepada menyediakan kemudahan sukan massa terutamanya di kawasan yang masih belum mempunyai kemudahan sukan. KBS masih belum mempunyai perancangan untuk menaik membina stadium baharu di Pekan Belaga.

Berkenaan cadangan untuk menaik taraf Stadium Sg. Asap Belaga, Yang Berhormat bolehlah mengemukakan cadangan skop projek untuk pertimbangan lanjut pihak Kementerian.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN WONG HON WAI (BUKIT BENDERA)

TARIKH : 14 MAC 2022 (ISNIN)

SOALAN

TUAN WONG HON WAI (BUKIT BENDERA) minta **MENTERI DALAM NEGERI** menyatakan statistik penerimaan / kelulusan / penolakan permohonan MM2H (Malaysia My Second Home) mengikut negara asal pemohon sejak polisi baru dilaksanakan pada tahun 2021.

JAWAPAN

Tuan Yang Di Pertua,

Untuk makluman Ahli Yang Berhormat, Program Malaysia Rumah Keduaku (MM2H) telah mendapat sambutan yang menggalakkan setelah diaktifkan semula. Setakat 28 Februari 2022, Jabatan Imigresen Malaysia telah menerima sebanyak 211 permohonan untuk mewujudkan ID eMM2H untuk permohonan secara atas talian. Butiran permohonan ID eMM2H mengikut warganegara adalah seperti berikut:

BIL	WARGANEGARA	JUMLAH
1.	China	40
2.	Hong Kong	29
3.	Indonesia	23
4.	Thailand	17
5.	Australia	12
6.	Japan	9
7.	Bangladesh	8
8.	India	8
9.	Singapura	8
10.	Lain-Lain Negara	57
JUMLAH		211

Selanjutnya, setakat 10 Mac 2022, 26 permohonan daripada 211 permohonan tersebut telah diluluskan dan satu permohonan ditolak. Baki 184 permohonan masih diproses dan ada yang berstatus *keep in view* berikutan penyerahan dokumen yang tidak lengkap. Berikut adalah statistik kelulusan mengikut negara (prinsipal):

BIL	WARGANEGARA	JUMLAH
1.	China	17
2.	Japan	2
3.	Hong Kong	2
4.	Antigua & Barbuda	1
5.	Kanada	1
6.	Taiwan	1
7.	Saudi Arabia	1
8.	Zimbabwe	1
JUMLAH		26

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SHAHARIZUKIRNAIN BIN
ABD. KADIR [SETIU]**

TARIKH : 14 MAC 2022 (ISNIN)

SOALAN

TUAN SHAHARIZUKIRNAIN BIN ABD. KADIR minta **MENTERI KESIHATAN** menyatakan data terkini pesakit HIV dan AIDS di Malaysia serta peratus pesakit HIV dan AIDS yang berkaitan pengamalan gaya hidup LGBTQ.

JAWAPAN

Tuan Yang di-Pertua,

1. Bilangan kes HIV baru di Malaysia secara amnya telah menurun berbanding bilangan tertinggi kes HIV yang dilaporkan pada tahun 2002 iaitu sebanyak 6,978 orang, atau pada kadar 28.5 kes bagi setiap 100,000 penduduk. Manakala bagi tahun 2021, sebanyak 2,760 kes HIV baru telah dilaporkan, atau pada kadar 8.5 kes bagi setiap 100,000 penduduk pada tahun 2021, iaitu penurunan notifikasi sebanyak 70% semenjak tahun 2002.

2. Jangkitan HIV melalui transmisi seksual boleh berlaku melalui hubungan seksual tanpa perlindungan seperti pemakaian kondom dengan orang yang dijangkiti dan tidak mengira kecenderungan seksual atau gaya hidup seperti LGBTQ. Sehubungan dengan itu, data penyakit HIV yang dilaporkan oleh KKM adalah berdasarkan faktor risiko dan bukannya kecenderungan seksual seperti LGBTQ.

3. Pada peringkat awal wabak HIV, faktor risiko utama jangkitan adalah melalui perkongsian jarum suntikan di kalangan pengguna dadah suntikan. Walau bagaimanapun, mulai tahun 2011, transmisi seksual menjadi faktor risiko utama jangkitan yang dilaporkan kepada KKM. Oleh yang demikian, risiko jangkitan dapat dikurangkan jika setiap pasangan adalah setia kepada pasangan masing-masing.

4. Pada tahun 2021, sebanyak 63% jangkitan HIV dilaporkan menerusi hubungan homoseksual/biseksual, manakala 33% adalah menerusi hubungan heteroseksual.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI CHE ABDULLAH BIN MAT
NAWI [TUMPAT]**

TARIKH : 14 MAC 2022 (ISNIN)

SOALAN :

DATO' HAJI CHE ABDULLAH BIN MAT NAWI [TUMPAT] minta **MENTERI KESIHATAN** menyatakan perancangan Kementerian dalam menambah bilangan perjawatan dan elaun kritikal bagi jurupulih perubatan fisioterapi dan jurupulih perubatan carakerja yang telah lama terpinggir berbanding dengan jawatan lain di Kementerian Kesihatan Malaysia.

JAWAPAN:

Tuan Yang di-Pertua,

1. Skim Perkhidmatan Jurupulih Perubatan Carakerja dan Jurupulih Perubatan Fisioterapi tidak dibayar Bayaran Insentif Perkhidmatan Kritikal (BIPK) buat masa ini. Cadangan pemanjangan BIPK kepada skim perkhidmatan ini perlu mendapat kelulusan Jabatan Perkhidmatan Awam (JPA). Buat masa ini, JPA sedang menjalankan kajian rasionalisasi elaun perkhidmatan awam secara menyeluruh yang turut melibatkan BIPK.

2. Bagi tahun 2021, seramai 1,401 Jurupulih Perubatan Fisioterapi dan 1,188 Jurupulih Perubatan Carakerja yang berkhidmat di Kementerian Kesihatan Malaysia (KKM). Berdasarkan rekod KKM, terdapat peningkatan perjawatan Jurupulih Perubatan Carakerja dalam tempoh lima (5) tahun iaitu 1,346 jawatan pada tahun 2021 berbanding 1,230

SOALAN NO : 27

jawatan pada tahun 2016. Manakala bagi perjawatan Jurupulih Perubatan Fisioterapi bagi tahun 2021 adalah 1,538 jawatan berbanding 1,422 jawatan pada tahun 2016.

3. Penambahan perjawatan baharu bagi pegawai dalam bidang fisioterapi bagi fasiliti baharu/naiktaraf/gantian yang beroperasi mulai tahun 2019 hingga 2021 telah diluluskan dan diagihkan ke fasiliti-fasiliti yang telah beroperasi.

Sekian terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA :TUAN CHARLES ANTHONY
SANTIAGO [KLANG]**

TARIKH : 14 MAC 2022 (ISNIN)

SOALAN

TUAN CHARLES ANTHONY SANTIAGO minta **MENTERI KESIHATAN** menyatakan statistik kejadian buruk vaksin (*Vaccine Adverse Event*) mengikut jenama vaksin, kategori dan tahap kesan buruk, tempoh berlaku selepas disuntik dan umur. Bolehkah data tersebut juga dipaparkan di COVIDNOW ataupun pangkalan data Github.

JAWAPAN

Tuan Yang di-Pertua,

1. Seperti vaksin dan ubat-ubatan lain, vaksin COVID-19 juga boleh menyebabkan kesan sampingan. Walau bagaimanapun, kebanyakan kesan sampingan yang dilaporkan adalah ringan dan sederhana seperti sakit di tempat suntikan, demam, pening serta keletihan dan biasanya akan pulih dalam masa beberapa hari.
2. Sehingga 4 Mac 2022, sebanyak 67.6 juta dos vaksin COVID-19 telah diberikan dan susulan daripada itu, Bahagian Regulatori Farmasi Negara (NPRA) telah menerima sejumlah 25,610 laporan Kesan Advers Susulan Imunisasi (AEFI) bersamaan kadar pelaporan 379 laporan bagi setiap sejuta dos. Majoriti kes yang dilaporkan adalah tidak serius dan

SOALAN NO : 28

kebiasaannya akan sembuh dalam tempoh beberapa hari tanpa atau dengan rawatan. Laporan AEFI mengikut jenama vaksin adalah seperti berikut:

Bil.	Vaksin	Jumlah Laporan	Kadar
a.	Comirnaty	19,237	476 bagi setiap sejuta dos
b.	CoronaVac	5,017	236 bagi setiap sejuta dos
c.	Astrazeneca	1,308	233 bagi setiap sejuta dos
d.	Convidecia	46	218 bagi setiap sejuta dos
e.	Covilo	2	53 bagi setiap sejuta dos

3. Melalui pemantauan NPRA juga, sejak Program Imunisasi COVID-19 Kebangsaan (PICK) dimulakan pada 24 Februari 2021 sehingga 4 Mac 2022, terdapat 1,775 laporan (bersamaan kadar 26 laporan bagi setiap sejuta dos) dikategorikan sebagai AEFI serius, iaitu merujuk kepada kesan yang memerlukan kemasukan ke hospital, pemanjangan tempoh di wad, mengancam nyawa, menyebabkan kehilangan upaya yang signifikan atau memerlukan intervensi untuk mencegah kerosakan kekal tubuh, menyebabkan kecacatan semasa lahir, atau disyaki menyebabkan kematian. Walau bagaimanapun, laporan yang diterima ini memerlukan penyiasatan dan penilaian bagi menentukan hubungkait kesan yang dilaporkan dan vaksin yang diterima. Sebanyak 600 laporan melibatkan

kematian di kalangan penerima vaksin COVID-19 telah diterima dengan 443 laporan telah selesai penyiasatan dan penilaian oleh Jawatankuasa Khas Farmakovigilans Vaksin COVID-19 (JFK), di mana tiada kes kematian yang dilaporkan mempunyai hubungkait secara langsung dengan vaksin yang diterima. Sebanyak 157 laporan masih dalam proses penyiasatan sebelum dinilai oleh JFK.

4. Jawatankuasa Farmakovigilans Khas Vaksin COVID-19 (JFK) telah menjalankan penilaian ke atas 22 laporan kematian yang telah lengkap penyiasatan dan mendapati bahawa **kematian yang dilaporkan tersebut tiada hubungkait dengan vaksin penggalak COVID-19 yang diterima**. Terdapat 26 laporan lagi masih dalam proses penyiasatan sebelum ianya dibentangkan untuk penilaian oleh JFK. Secara keseluruhannya, hanya 48 pelaporan kematian (atau 3.5% daripada jumlah laporan AEFI diterima bagi dos penggalak) bersamaan dengan kadar 3 laporan bagi setiap sejuta dos. Data pelaporan yang diterima oleh NPRA secara keseluruhannya termasuk bagi dos penggalak menunjukkan trend yang konsisten seperti yang dilaporkan oleh agensi regulatori di negara-negara lain.

5. Statistik laporan Kesan Advers Susulan Imunisasi (AEFI) boleh diakses melalui laman sesawang github.com dan KKM sememangnya bercadang untuk memaparkan maklumat laporan AEFI (visualisasi) di laman COVIDNOW dalam masa terdekat. Maklumat statistik pelaporan AEFI vaksin COVID-19 yang terperinci juga boleh diakses melalui laman sesawang rasmi NPRA; *Summary Report on AEFIs of COVID-19 Vaccines*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI RICHARD RIOT ANAK JAEM
(SERIAN)**

TARIKH : 14 MAC 2022 (ISNIN)

SOALAN

DATO' SRI RICHARD RIOT ANAK JAEM (SERIAN) minta **MENTERI PERUMAHAN DAN KERAJAAN TEMPATAN** menyatakan bilakah Kementerian akan membina balai bomba baru di Bandar Mutiara Tebedu, Serian.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa komited dalam memperluaskan capaian perkhidmatan kebombaan bagi memastikan aspek keselamatan dan kesejahteraan rakyat terus terjamin.

Cadangan pembinaan Balai Bomba dan Penyelamat (BBP) Tebedu ini telah dirancang untuk dimasukkan di bawah Rancangan Malaysia Kedua Belas (RMKe-12), *Rolling Plan* Ke-3 (RP3) tahun 2023. Kementerian melalui Jabatan Bomba dan Penyelamat Malaysia (JBPM) telah memiliki sebidang tapak tanah bagi tujuan pembinaan balai bomba kategori D dengan keluasan 2.92 ekar di Lot 298, Blok 8, Mukim Kayan. Walau bagaimanapun, pelaksanaannya bergantung kepada kelulusan agensi pusat serta keupayaan peruntukan kewangan semasa.

Untuk makluman Ahli Yang Berhormat juga, kawasan Bandar Mutiara Tebedu telah mendapat khidmat kebombaan daripada BBP Serian dengan jarak 38 kilometer yang mengambil masa lebih kurang 40 minit untuk sampai ke kawasan tersebut.

Bagi memastikan penduduk di kawasan Tebedu mendapat perkhidmatan kebombaan yang sewajarnya, Kementerian melalui JBPM juga telah merancang untuk mempertingkatkan penubuhan Pasukan Bomba Komuniti di kawasan tersebut. Pasukan Bomba Komuniti ini akan bertindak sebagai pasukan tindak balas awal kecemasan (*first responder*) sementara menunggu ketibaan anggota bomba dari balai yang berhampiran. Pada masa kini, di kawasan Tebedu terdapat sebanyak 12 Pasukan Bomba Komuniti yang mendapat latihan dan dibekalkan dengan alat pemadam api oleh JBPM Negeri Sarawak.

Selain itu, pemerkasaan pembudayaan amalan keselamatan kebakaran dalam kalangan komuniti setempat kawasan Tebedu juga akan terus dipertingkatkan melalui pelaksanaan program-program seperti berikut:

- i. mewujudkan Program *Community Emergency Response Team* (CERT) melalui inisiatif Kerajaan Negeri Sarawak yang bertujuan untuk melatih masyarakat setempat di sesebuah lokaliti sebagai Pasukan Bertindak Awal (*first responder*);
- ii. mempertingkatkan kempen kesedaran keselamatan kebakaran termasuk Program 1 Rumah 1 Alat Pemadam Api (1RAPI), Program Sedia Urus Isi Rumah (SURI) dan penyediaan alat pengesan asap serta gas (MyAlert); dan
- iii. mempergiatkan program latihan dan pencegahan di kawasan luar bandar/ pedalaman (*Outreach and Summer Camp*) yang mana penganjurannya telah melibatkan hampir 13 kampung di kawasan Tebedu bermula dari tahun 2019 hingga 2020.

Kementerian akan memastikan perkhidmatan kebombaan yang diberikan di kawasan Tebedu, Serian, Sarawak sentiasa berada pada tahap yang optimum.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HAJI WAN HASSAN BIN MOHD RAMLI
(DUNGUN)**

TARIKH : 14 MAC 2022 (ISNIN)

SOALAN

TUAN HAJI WAN HASSAN BIN MOHD RAMLI (DUNGUN) minta
MENTERI PERUMAHAN DAN KERAJAAN TEMPATAN menyatakan :-

- (a) jumlah projek-projek perumahan yang terbengkalai di seluruh negara pada tahun 2015 - 2021; dan
- (b) jumlah kes tuntutan yang telah diselesaikan dan masih di Tribunal Tuntutan Perumahan.

JAWAPAN

Tuan Yang di-Pertua,

(a) Untuk makluman Ahli Yang Berhormat, dari tahun 2015 sehingga 31 Disember 2021, sebanyak 86 projek perumahan swasta di Semenanjung Malaysia telah disahkan terbengkalai oleh YB Menteri Perumahan dan Kerajaan Tempatan selaras dengan Akta Pemajuan Perumahan (Kawalan dan Pelesenan) 1966 [Akta 118]. Projek-projek ini meliputi 18,423 unit rumah dan melibatkan seramai 10,242 orang pembeli. Projek perumahan swasta di negeri Sabah dan Sarawak pula, dipantau secara terus di bawah kerajaan negeri masing-masing memandangkan Akta 118 hanya berkuat kuasa di Semenanjung Malaysia sahaja.

Jumlah projek perumahan swasta yang disahkan terbengkalai dari tahun 2015 hingga 2021 adalah seperti di Jadual 1.

**Jadual 1: Projek Perumahan Swasta Terbengkalai
Bagi Tahun 2015 Hingga 2021**

TAHUN	BILANGAN		
	JUMLAH PROJEK	UNIT RUMAH	JUMLAH PEMBELI
2015	11	1,178	989
2016	26	3,016	2,358
2017	3	736	474
2018	23	6,221	3,347
2019	3	3,115	1,872
2020	0	0	0
2021	20	4,157	1,202
JUMLAH	86	18,423	10,242

(b) Untuk makluman Ahli Yang Berhormat, jumlah kes tuntutan yang telah diselesaikan di Tribunal Tuntutan Pembeli Rumah (TTPR) dari tahun 2015 sehingga 2021 adalah sebanyak 11,516 kes, manakala yang masih dalam tindakan KPKT adalah sebanyak 138 kes. Perincian jumlah kes mengikut tahun adalah seperti di Jadual 2.

**Jadual 2: Statistik Kes Selesai dan Belum Diselesai TTPR
Bagi Tahun 2015 Hingga 2021**

TAHUN	BILANGAN	
	KES DISELESAIKAN	KES DALAM TINDAKAN
2015	1,461	0
2016	1,704	0
2017	1,883	0
2018	1,828	0
2019	2,232	0
2020	868	12
2021	1,540	126
JUMLAH	11,516	138

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK SRI RICHARD RIOT ANAK JAEM
(SERIAN)**

TARIKH : 14 MAC 2022 (ISNIN)

SOALAN

DATO' SRI RICHARD RIOT ANAK JAEM [SERIAN] minta **MENTERI
DALAM NEGERI** menyatakan bilakah projek pembinaan Kompleks
Imigresen, Kastam, Kuarantin dan Keselamatan (ICQS) Tebedu yang telah
diluluskan pada Rancangan Malaysia Ke-12 (RMK-12) akan bermula.

JAWAPAN

Tuan Yang Di Pertua,

Untuk makluman Ahli yang Berhormat, Kementerian Dalam Negeri sedang berunding dengan Kerajaan Negeri Sarawak untuk menaik taraf Kompleks Imigresen, Kastam, Kuarantin dan Keselamatan (ICQS) Tebedu. Keperluan projek ini adalah bagi memastikan kemudahan keluar masuk penumpang dan barangan melalui pintu masuk ini disediakan dengan komprehensif bagi menyokong pembukaan semula aktiviti perdagangan di Tebedu susulan daripada *Border Trade Agreement* (BTA) dan *Border Crossing Agreement* (BCA) yang akan ditandatangani oleh kedua-dua Kerajaan Malaysia dan Indonesia.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WIRA DR. MOHD HATTA BIN MD.
RAMLI (LUMUT)**

TARIKH : 14 MAC 2022 (ISNIN)

SOALAN

DATUK WIRA DR. MOHD HATTA BIN MD. RAMLI (LUMUT) minta **MENTERI PERUMAHAN DAN KERAJAAN TEMPATAN** menyatakan cadangan Kementerian untuk mengurangkan sampah plastik di Malaysia.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) komited untuk mengurangkan bahan plastik atau plastik sekali guna melalui pendekatan strategik komunikasi, pendidikan dan kesedaran awam bagi meningkatkan kesedaran masyarakat umum. Inisiatif ini bertujuan untuk mengurangkan penggunaan plastik dan seterusnya menggalakkan penggunaan bekas makanan dan minuman yang mesra alam serta boleh diguna semula.

KPKT melalui Perbadanan Pengurusan Sisa Pepejal dan Pembersihan Awam (SWCorp) juga giat melaksanakan pelbagai program dan kempen yang memberi fokus kepada usaha mengubah sikap masyarakat di semua peringkat. Antara program yang dilaksanakan adalah Kempen “Jangan Gunalah! Plastik Sekali Guna”, Kempen Buang Sampah Ke Dalam Tong Sampah dan Kempen Amalan 3R (*reduce, reuse and recycle*) yang dilaksanakan di pelbagai peringkat termasuk komuniti, institusi dan industri.

Di samping itu, pelaksanaan program pengasingan sisa di punca (*Separation at Source, SAS*) bagi sektor isi rumah (berkuat kuasa pada 1 September 2015) dan sektor komersial, industri dan institusi (berkuat kuasa pada 1 Ogos 2018) di tujuh (7) negeri yang menerima pakai Akta Pengurusan Sisa Pepejal dan Pembersihan Awam 2007 (Akta 672), bukan sahaja meningkatkan amalan 3R dalam kalangan masyarakat malah dapat meningkatkan jumlah sisa plastik terkumpul yang digunakan untuk kitar semula. Program SAS yang dilaksanakan tersebut telah menyumbang kepada peningkatan Kadar Kitar Semula Kebangsaan (KKSK) saban tahun. Malaysia telah mencapai KKSK sebanyak 31.52% pada tahun 2021 berbanding 30.67% pada tahun 2020. Tren kitar semula bagi sisa plastik juga menunjukkan peningkatan dari tahun 2013 sehingga 2020 seperti dalam jadual di bawah:

TAHUN	JUMLAH SISA KITAR SEMULA PLASTIK (TAN)
2013	374,693.00
2014	586,142.00
2015	999,125.00
2016	1,094,255.00
2017	1,562,730.52
2018	1,565,712.77
2019	2,760,177.09
2020	1,005,671.38

Di samping itu, KPKT telah membangunkan draf Garis Panduan Pembangunan Taman Eko Sisa (*Waste Eco Park*, WEP) yang akan dimuktamadkan pada tahun 2022. Garis panduan ini akan menjadi panduan kepada pihak pemaju dan semua pihak yang terlibat dalam merancang, mengawal dan menguruskan aktiviti pembangunan WEP di Malaysia. Pembangunan WEP ini kelak akan menyokong ekosistem ekonomi kitaran dalam merancakkan lagi industri kitar semula sisa termasuk sisa plastik.

Pada masa ini, KPKT juga sedang giat mengadakan libat urus dengan pelbagai Kementerian, Pihak Berkuasa Negeri (PBN), Pihak Berkuasa Tempatan (PBT), agensi swasta, pemain industri dan Badan Bukan Kerajaan (NGO) untuk mendapatkan pandangan dan maklum balas berhubung perancangan serta pelan tindakan ke arah model ekonomi kitaran. Sesi libat urus ini bertujuan untuk mendapatkan maklum balas pihak-pihak berkepentingan berhubung cadangan penubuhan Majlis Ekonomi Kitaran Negara (MEKN) yang diterajui oleh KPKT. Melalui platform MEKN tersebut, langkah-langkah penyelesaian yang efektif bagi mengurangkan sisa plastik akan dibincangkan dengan lebih teliti di bawah Kumpulan Kerja Teknikal Plastik dengan kerjasama kementerian-kementerian dan pemegang taruh lain yang berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : TUAN MUHAMMAD BAKHTIAR BIN WAN CHIK
[BALIK PULAU]**

TARIKH : 14 MAC 2022 (KHAMIS)

SOALAN

TUAN MUHAMMAD BAKHTIAR BIN WAN CHIK (BALIK PULAU) minta **MENTERI SUMBER MANUSIA** menyatakan berkenaan pemilihan 25 agensi dan 250 sub-agensi yang bertentangan dengan Akta Persaingan 2010 (Act 712) dan Akta Persaingan 2012 Bangladesh di mana ia mewujudkan ratusan “*vertical dan horizontal agreements*” dan monopoli yang besar.

JAWAPAN

Tuan Yang di-Pertua,

Memorandum Persefahaman Penggajian Pengambilan Pekerja antara Malaysia dengan Bangladesh telah ditandatangani pada 19 Disember 2021 untuk tempoh lima tahun. Memorandum Persefahaman ini adalah pembaharuan kepada yang ditandatangani pada 2016 dan bukanlah satu memorandum yang baru. Dalam Memorandum Persefahaman yang asal hanya 10 Agensi Pengambilan Pekerja Bangladesh yang dibenarkan untuk pengambilan pekerja.

Namun, Mesyuarat Jemaah Menteri pada 10 Disember 2021 telah bersetuju dalam pembaharuan Memorandum Persefahaman ini, kerajaan mengambil inisiatif untuk menambah 25 Agensi Pengambilan Pekerja Bangladesh utama dan 250 sub-ejen. Maka, jumlah tersebut adalah 275 agensi berbanding 10 agensi sahaja sebelum ini.

Kerajaan juga telah menekankan bahawa Malaysia hanya membenarkan 275 agensi dan bukan kesemua 1,600 agensi. Hal ini bagi mengelakkan negara ini menjadi lambakan pekerja asing dan timbul isu buruh paksa.

Oleh itu, tiada isu wujudnya sindiket atau monopoli dalam pelantikan Agensi Pengambilan Pekerja Bangladesh susulan perjanjian pengambilan pekerja Bangladesh dalam tempoh lima tahun antara kedua-dua negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 14 MAC 2022 (ISNIN)

SOALAN

DATO' HAJI MAHFUZ BIN HAJI OMAR [POKOK SENA] minta **MENTERI SUMBER MANUSIA** menyatakan apakah langkah dan perancangan Kerajaan dalam memastikan pengambilan pekerja warganegara Malaysia dilakukan oleh majikan dalam semua sektor.

JAWAPAN

Tuan Yang Di Pertua,

Bagi meningkatkan penyertaan rakyat dalam pekerjaan, Kementerian Sumber Manusia melalui PERKESO melaksanakan beberapa inisiatif antaranya adalah melalui program **JaminKerja-Insentif Penggajian (JKIP)** di bawah Sistem Insurans Pekerjaan yang dijangka akan memanfaatkan 300,000 pencari kerja dari seluruh negara.

Menerusi JKIP, para majikan yang menggajikan individu yang tidak aktif bekerja bakal menerima insentif sebanyak 20 peratus daripada gaji bulanan bagi tempoh enam (6) bulan pertama dan 30 peratus bagi 6 bulan berikutnya. Bagi golongan rentan pula, majikan layak menerima insentif sebanyak 30 peratus untuk 6 bulan pertama, sebelum dinaikkan kepada 40 peratus bagi 6 bulan berikutnya. Kadar insentif yang sama turut akan dipanjangkan bagi pengambilan pekerja golongan wanita yang telah menganggur melebihi tempoh setahun, ibu tunggal dan suri rumah.

Selain itu, sebagai kesinambungan kejayaan Program Perantisan, JKIP akan meneruskan program ini dengan pemberian insentif RM900 sebulan untuk tempoh enam bulan kepada majikan yang menggajikan golongan perantis lepasan sekolah dan graduan berumur 18 hingga 30 tahun dalam jawatan Eksekutif. Golongan Perantis ini perlu ditawarkan kontrak 6 bulan dengan bayaran gaji minima RM1,500.

PERKESO turut mempergiatkan beberapa program bagi menggalakkan penyertaan tenaga kerja serta memastikan pengambilan pekerja dapat dilaksanakan dengan berkesan melalui program-program berikut :

- i. Program Karnival Kerjaya;
- ii. Program Insentif Pengambilan Pekerja; dan
- iii. Program latihan kemahiran semula dan peningkatan kemahiran melalui Penyedia Latihan yang dilantik.

Selain itu, Sistem Insurans Pekerjaan (SIP) PERKESO juga menyediakan program-program bagi peningkatan modal insan dan kebolehpasaran pekerja seperti khidmat kaunseling kerjaya, pemprofilan kemahiran, penulisan *resume*, latihan persediaan temuduga, latihan kemahiran bahasa dan penyampaian serta seminar pekerjaan bagi mereka yang mencari pekerjaan.

Kerajaan turut meluaskan **Elaun Mencari Pekerjaan (EMP)** meliputi golongan yang tidak mencarum dengan PERKESO termasuklah graduan baharu, lepasan sekolah dan pekerja sektor tidak formal.

Pencari kerja yang belum mencarum dengan PERKESO perlu mendaftar di Portal Pekerjaan Negara, **MyFutureJobs** dan perlu menghadiri temuduga terbuka sekurang-kurangnya tiga (3) kali dalam tempoh dua bulan. **Insentif EMP akan diberikan sebanyak RM300 sebulan.** Sekiranya pencari kerja kembali bekerja atau mendapat pekerjaan melalui MyFutureJobs, **jumlah insentif sebanyak RM400** akan turut diberikan.

Kementerian melalui Pembangunan Sumber Manusia Berhad (PSMB) juga telah melancarkan inisiatif **PENJANA HRDCorp**. Lima (5) skim telah diperkenalkan yang terdiri daripada **Place & Train, B40 Development, SME Development, Industrial Revolution 4.0** dan **Gerak Insan Gemilang (GIG)**. Skim-skim ini diwujudkan untuk membantu rakyat mendapat penempatan pekerjaan, *self-employed* serta menambah dan meningkatkan kemahiran mereka.

Selain itu, PSMB juga menubuhkan **HRDCorp Placement Centre (HPC)** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga 31 Disember 2021, sebanyak **55,186 peluang pekerjaan tersedia** melalui HPC dan lebih **4,000 pekerja berjaya** ditempatkan melalui inisiatif ini.

SOALAN NO : 34

Dalam usaha mengurangkan kebergantungan kepada guna tenaga asing, Kerajaan masih berpegang kepada dasar-dasar sedia ada yang memberikan keutamaan kepada penggajian pekerja tempatan seperti berikut:

- i. menggalakkan sektor-sektor berintensifkan buruh beralih kepada penggunaan mekanisasi dan automasi bagi mengurangkan kebergantungan ke atas pekerja asing dan mewujudkan peluang pekerjaan yang memerlukan kemahiran;
- ii. penggajian pekerja asing dari mana-mana negara sumber hendaklah berdasarkan kepada keperluan sebenar industri dan sektor-sektor yang dibenarkan sahaja;
- iii. melaksanakan *multi-tier levy* pada 1 Januari 2022 dimana pengambilan pekerja asing adalah berdasarkan *Dependency Ratio Ceiling (DRC)* iaitu nisbah antara pekerja tempatan dan pekerja asing;
- iv. syarat-syarat permohonan pekerja asing diperketatkan dari segi penetapan nisbah pengambilan berdasarkan komposisi pekerja tempatan dan pekerja asing;
- v. hanya majikan yang berkeupayaan dan mematuhi standard perburuhan seperti pematuhan gaji minimum, menyediakan kemudahan penginapan beserta kemudahan asas dan tiada rekod pelanggaran kes buruh sahaja dipertimbangkan kelulusan pekerja asing. Keupayaan majikan ditentukan melalui proses saringan dan pemeriksaan Jabatan Tenaga Kerja;
- vi. mengutamakan *exit policy* penggajian pekerja asing dengan menyediakan pelan latihan kemahiran kepada pekerja tempatan, memberi keutamaan kepada mekanisme *Industrialised Building System (IBS)* dalam sektor pembinaan, peralihan kepada intensif mekanisasi dan automasi, restoran berkonsepkan layan diri dan sebagainya;

- vii. program *Technical and Vocational Education and Training* (TVET) untuk warga tempatan diperkasakan bagi melahirkan individu berkemahiran tinggi selaras dengan hasrat Negara untuk beralih daripada industri berintensif buruh kepada *high end industry*; dan
- viii. pembiayaan latihan di bawah Pembangunan Sumber Manusia Berhad (PSMB) melalui caruman levi majikan untuk melatih semula pekerja bagi meningkatkan kemahiran pekerja.

Pada masa yang sama, beberapa dasar baharu dengan tujuan memperkukuhkan sebahagian dasar sedia ada juga telah dilaksanakan oleh Kerajaan, antaranya seperti:

- i. mewajibkan pengiklanan kekosongan jawatan untuk tempoh tidak kurang dari 30 hari di portal MyFutureJobs bagi tujuan pengambilan pekerja asing dan pegawai dagang (ekspatriat). Sekiranya tiada pengisian dari kalangan pencari pekerja tempatan dalam tempoh tersebut, barulah majikan dibenarkan membuat permohonan pengambilan pekerja asing dan pegawai dagang;
- ii. supaya jawatan petugas barisan hadapan (*Frontliners*) tidak dibenarkan kepada pekerja bukan warganegara; dan
- iii. Kementerian Sumber Manusia melalui Talent Corporation Malaysia Berhad (TalentCorp) (ILMIA) telah membangunkan *Critical Occupations List* (COL) yang bertujuan memberi penekanan terhadap kebolehpasaran tempatan dengan mengenalpasti kemahiran dan pekerjaan yang sukar dipenuhi merangkumi keperluan tenaga kerja mahir dan separa mahir. COL juga digunakan sebagai rujukan dalam mempertimbangkan kelulusan penggajian ekspatriat asing oleh pihak berkuasa yang terlibat.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI BUNG MOKTAR BIN RADIN
[KINABATANGAN]**

TARIKH : 14 MAC 2022 (ISNIN)

SOALAN

Minta **MENTERI PEMBANGUNAN USAHAWAN DAN KOPERASI** menyatakan apakah usaha Kementerian dalam memastikan para peniaga kecil sederhana mampu berhadapan dengan cabaran perniagaan di kala pandemik COVID-19 dan apakah statistik perniagaan yang telah “gulung tikar” ekoran terkesan dengan pandemik COVID-19.

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) komited dalam membantu Perusahaan Mikro, Kecil dan Sederhana (PMKS) untuk mendepani cabaran perniagaan kesan pandemik COVID -19.

Untuk makluman Yang Berhormat, bagi tahun 2022, KUSKOP menyediakan bantuan bagi memulihkan usahawan dan koperasi terjejas melalui bantuan pembiayaan termasuk pembiayaan mikrokredit, geran keusahawanan dan pinjaman mudah merangkumi 38 program dengan implikasi kewangan sebanyak RM 4.96 billion dengan 322,017 penerima manfaat.

Selain itu, KUSKOP juga melaksanakan program yang berteraskan adaptasi teknologi bagi memperkukuhkan daya tahan PMKS yang merangkumi pelaksanaan enam program dengan peruntukan sebanyak RM10.8 juta dan mensasarkan 1,770 penerima manfaat.

Seterusnya, dalam usaha membantu para usahawan untuk mendepani cabaran perniagaan kesan pandemik COVID-19, KUSKOP telah merangka 16 program pemantapan kapasiti usahawan yang melibatkan seramai 24,121 usahawan dengan jumlah peruntukan sebanyak RM 28.1 juta bagi memantapkan kapasiti usahawan dan koperasi supaya lebih berdaya saing, berdaya maju, berinovasi dan berpengetahuan.

Di samping itu, KUSKOP turut menyediakan akses pasaran melalui 12 program dengan peruntukan sebanyak RM25.6 juta bagi memperluas peluang pasaran kepada 1,273 usahawan merangkumi premis dan ruang perniagaan, perniagaan dalam talian dan peluang menembusi pasaran domestik dan eksport.

Berdasarkan Kaji Selidik Ke Atas Usahawan semasa Perintah Kawalan Pergerakan 3.0 (PKP3.0), yang telah dilaksanakan oleh KUSKOP pada 15 hingga 28 Jun 2021 mendapati bahawa sebanyak

NO. SOALAN : 35

3.16% atau sebanyak 37,415 usahawan telah berhenti beroperasi atau gulung tikar. Majoritinya adalah usahawan mikro iaitu sebanyak 26,007 dan diikuti dengan PKS sebanyak 2,738.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJI TAJUDDIN BIN
ABDUL RAHMAN [PASIR SALAK]**

TARIKH : 14 MAC 2022 (ISNIN)

SOALAN

DATO' SRI HAJI TAJUDDIN BIN ABDUL RAHMAN minta **MENTERI KESIHATAN** menyatakan mengenai status permohonan projek menaik taraf Klinik Kesihatan Kampung Gajah.

JAWAPAN

Tuan Yang di-Pertua,

1. Kementerian Kesihatan Malaysia (KKM) mengambil maklum akan keadaan fizikal dan keperluan untuk menaik taraf Klinik Kesihatan Kampung Gajah yang melibatkan kerja-kerja pembaikan bumbung dan siling di klinik tersebut.
2. KKM sedang membuat penilaian dan menyediakan laporan teknikal terperinci dan kos keseluruhan pembaikan yang diperlukan sebelum 1 April 2022. Permohonan peruntukan menaik taraf tersebut akan dipertimbangkan setelah skop teknikal dimuktamadkan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN R. SIVARASA [SUNGAI BULOH]

TARIKH : 14 MAC 2022 (ISNIN)

SOALAN

TUAN R. SIVARASA [SUNGAI BULOH] minta **MENTERI SUMBER MANUSIA** menyatakan bila gaji minima akan diumumkan. Adakah Kementerian bercadang menggunakan formula biasa dan pendapatan garis kemiskinan baru, iaitu RM2208 sebulan, untuk pengiraan gaji minima untuk tahun 2022.

JAWAPAN

Tuan Yang di-Pertua,

Kajian Semula Perintah Gaji Minimum 2020 telah selesai dilaksanakan oleh Jawatankuasa Teknikal Perundingan Gaji Negara iaitu satu jawatankuasa yang dibentuk di bawah Majlis Perundingan Gaji Negara. Majlis Perundingan Gaji Negara dalam mesyuaratnya pada 18 November 2021 dan 9 Disember 2021 telah meneliti hasil Laporan Kajian Semula PGM 2020 ini.

Berdasarkan hasil kajian ini, Majlis Perundingan Gaji Negara telah membuat pertimbangan dan mengemukakan syor gaji minimum baharu kepada Kerajaan berdasarkan *balanced approach* dengan mengambil kira pandangan pihak pekerja, majikan dan kerajaan. Keputusan mengenai kadar gaji minimum baharu akan diumumkan kelak.

Pendapatan Garis Kemiskinan ialah nilai purata keseluruhan pendapatan isi rumah yang diukur berdasarkan corak perbelanjaan isi rumah. Dalam hal ini, kadar Pendapatan Garis Kemiskinan telahpun diambil kira sebagai satu daripada kriteria asas dalam pengiraan formula gaji minimum.

Kriteria asas formula ini juga turut mengguna pakai indikator sosioekonomi lain seperti penengah gaji bagi mengukur kemampuan pihak majikan membayar kadar gaji minimum. Bagi kriteria pelarasan pula, formula penetapan gaji minimum mengambil kira Indeks Harga Pengguna (*Consumer Price Index*, CPI) dengan izin, yang mencerminkan perubahan kos sara hidup, pertumbuhan produktiviti dan kadar pengangguran.

Kerajaan percaya kenaikan kadar gaji minimum mampu meningkatkan purata pendapatan individu yang bekerja sekali gus melonjakkan purata pendapatan satu isi rumah keluar daripada paras garis kemiskinan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' HAJI MOHD FASIAH BIN HAJI MOHD
FAKEH [SABAK BERNAM]**

TARIKH : 14.03.2022 (ISNIN)

SOALAN

Dato' Haji Mohd Fasih bin Haji Mohd Fakeh [Sabak Bernam] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan setakat manakah fasa peralihan di bawah Pelan Pemulihan Negara (PPN) telah menyebabkan trend kenaikan harga barang keperluan harian masa kini dan apakah faktor-faktor yang mendorong kenaikan harga barang berkenaan serta apakah tindakan penguatkuasaan yang telah diambil Kementerian bagi mengawal harga barang keperluan harian supaya tidak terus naik.

JAWAPAN:

Yang di-Pertua,

Untuk makluman Ahli Yang Berhormat, berhubung dengan faktor kenaikan harga barangan keperluan, pembukaan semula sektor ekonomi secara beransur-ansur melalui peralihan Pelan Pemulihan Negara telah menyebabkan permintaan kepada bekalan barangan keperluan dan makanan meningkat. Ini secara tidak langsung menyebabkan kenaikan pada harga barangan makanan ekoran permintaan tinggi dan penawaran yang terhad. Selain itu, kenaikan harga juga adalah disebabkan oleh susulan peningkatan harga komoditi-komoditi utama di pasaran dunia seperti jagung, kacang soya dan minyak.

Antara langkah-langkah yang diambil oleh Kementerian bagi mengawal kenaikan harga barang adalah seperti berikut:-

- i. Mengadakan Skim Harga Maksimum Musim Perayaan (SHMMP) dan Skim Harga Maksimum Keluarga Malaysia (SHMKM) bagi menetapkan harga maksimum untuk barangan tertentu pada tempoh tertentu;

(SHMMP Tahun Baru Cina 2022 berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala SHMKM dilaksanakan pada 1 Januari 2022 hingga 4 Februari 2022 yang melibatkan 43,348 jumlah pemeriksaan premis)

- ii. Melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item tersebut; dan
- iii. Bekerjasama dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa tanpa gagal.

Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka. Kementerian telah dan sedang melaksanakan pelbagai Ops seperti Ops Catut, Ops Pasar, Ops Cakna, Ops Rantai dan lain-lain ops bagi mengawal bekalan dan harga barang keperluan asas pengguna.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI MOHD. SALIM SHARIF
[JEMPOL]**

TARIKH : 14 MAC 2022 (ISNIN)

SOALAN

Minta **MENTERI PEMBANGUNAN USAHAWAN DAN KOPERASI** menyatakan apakah program yang telah dilaksanakan oleh MEDAC dan agensi di bawahnya untuk membantu usahawan mengembangkan perniagaan menerusi platform atas talian selaras dengan Revolusi Industri Keempat (IR 4.0).

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) komited dalam memperkukuhkan daya tahan serta daya saing Perusahaan Mikro, Kecil dan Sederhana (PMKS) melalui adaptasi teknologi dan digitalisasi termasuk menerusi penggunaan platform atas talian.

Sepanjang tahun 2021, sebanyak 21,151 usahawan mikro, kecil dan sederhana telah menerima manfaat daripada pelbagai program adaptasi digital dan teknologi yang dilaksanakan oleh KUSKOP dan agensi-agensi di bawahnya.

Antara program adaptasi teknologi bagi menggalakkan PMKS mengembangkan perniagaan mereka melalui platform atas talian adalah seperti berikut:

- (i) Program Bimbingan Atas Talian (E-Board) di bawah INSKEN;
- (ii) Program Pemasaran Online di bawah TEKUN;
- (iii) Platform Pybli (sebutan: Pi Beli) di bawah Perbadanan Nasional Berhad (Pernas);
- (iv) Platform Angsana Virtual Mall (AVM) di bawah UDA Holdings; dan
- (v) Platform e-dagang ODELA (sebutan: Order La) di bawah SME Bank.

KUSKOP juga sedang membangunkan aplikasi MyMall yang akan menjadi satu platform bersepadu bagi menyelaraskan semua inisiatif platform digital sedia ada di peringkat kementerian.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATUK SERI HAJI AHMAD BIN HAJI MASLAN [PONTIAN]

TARIKH : 14 MAC 2022 (ISNIN)

SOALAN

DATUK SERI HAJI AHMAD BIN HAJI MASLAN minta **MENTERI KESIHATAN** menyatakan punca-punca kes COVID-19 yang telah naik mendadak baru-baru ini. Berapa kali vaksin wajar diambil mengikut 'standard' antarabangsa dan mengapa seolah-olah keberkesanan vaksin boleh dipertikaikan. Apakah perancangan untuk menghadapi varian baru COVID-19.

JAWAPAN

Tuan Yang di-Pertua,

1. Salah satu punca peningkatan kes baharu COVID-19 adalah disebabkan oleh penularan jangkitan varian Omicron yang lebih mudah menular daripada varian-varian yang lain. Varian Omicron yang mempunyai 32 mutasi pada *protein spike* mempunyai keupayaan jangkitan antara 2.7 hingga 3.7 kali ganda berbanding varian Delta. Berdasarkan aktiviti surveilan genomik yang dilaksanakan, varian Omicron juga telah mendominasi jangkitan COVID-19 menggantikan varian Delta. Tambahan pula, kajian antarabangsa mendapati varian Omicron boleh menyebabkan jangkitan semula (*reinfection*) dengan lebih tinggi. Sebagai contoh, suatu kajian di England mendapati risiko jangkitan semula bagi varian Omicron adalah 5.4 kali lebih tinggi dari Delta.

2. Bagi penetapan polisi pemberian vaksin COVID-19 samada dari segi kategori populasi yang layak, jenis vaksin, bilangan dos dan sela masa setiap dos, dos tambahan serta dos penggalak, ianya melibatkan perbincangan yang teliti di dalam Kumpulan Kerja Teknikal (TWG) dan dengan kelulusan samada melalui Jawatankuasa Jaminan Akses kepada Vaksin COVID-19 (JKJAV) atau Jawatankuasa CITF (CITF-A, CITF-B dan CITF-C).

3. Sehingga kini, tiada standard antarabangsa bagi menentukan bilangan dos yang akan diberikan kerana ianya bergantung kepada data-data kajian klinikal, "*real world data*" dan kajian setempat di dalam dan luar negara. Setiap hasil kajian dibincangkan secara terperinci untuk membolehkan sebarang keputusan dibuat dan dilaksanakan.

4. Disamping itu, KKM juga melihat kepada keputusan yang dibuat oleh agensi berkaitan di negara luar seperti *United States Food and Drug Administration* (US FDA) serta Pertubuhan Kesihatan Antarabangsa (WHO).

5. Pemberian vaksin COVID-19 adalah bertujuan bagi mengurangkan jangkitan serius dan kematian serta mengelakkan dari sistem kesihatan awam dari lumpuh. Keberkesanan ini telah dibuktikan melalui data-data kemasukan ke wad bagi kategori 3 hingga 5, kemasukan ke Unit Rawatan Rapi (ICU) dan data kematian yang telah dimaklumkan oleh KKM dari masa ke semasa.

6. Satu kajian keberkesanan pemberian vaksin di bawah Program Imunisasi COVID-19 Kebangsaan (PICK) di Malaysia telah dilaksanakan oleh Institut Penyelidikan Klinikal (ICR) di bawah Institut Kesihatan Negara (NIH) dan Badan Bertindak Imunisasi COVID-19 (CITF) dan dijalankan dari 1 April hingga 12 September 2021 melibatkan 1,261,270 penerima vaksin. Hasil kajian tersebut menunjukkan dapatan berikut:

- (i) Keberkesanan vaksin secara keseluruhan dalam mengurangkan risiko jangkitan adalah 88% (julat dari 86% hingga 90%);
- (ii) Keberkesanan vaksin secara keseluruhan dalam mengurangkan

risiko jangkitan bergejala adalah 86% (julat dari 84% hingga 88%);

- (iii) keberkesanan vaksin dalam mengurangkan kemasukan ke ICU adalah 83% (julat dari 82% hingga 84%) dalam kalangan pesakit COVID-19;
- (iv) keberkesanan vaksin dalam mengurangkan risiko kematian adalah 88% (julat 87% hingga 88%) dalam kalangan pesakit COVID-19.

7. Kajian keberkesanan dos penggalak juga telah dilakukan oleh kumpulan yang sama dari 1 Oktober hingga 31 Disember 2021 menunjukkan individu yang mengambil dos penggalak mempunyai kadar insiden jangkitan COVID-19 yang empat (4) kali lebih rendah dari individu yang hanya mengambil dos primer.

8. Data-data terkini yang diperolehi juga menunjukkan bahawa:

- (i) Kumpulan individu yang tidak divaksinasi adalah paling berisiko untuk dijangkiti COVID-19 yang serius (terutama pada kategori 4 dan 5) dan juga paling berisiko untuk kematian akibat jangkitan COVID-19.
- (ii) Kumpulan individu yang telah menerima vaksin COVID-19 dos penggalak (booster) adalah paling terlindung, di mana dapat dilihat jumlah kes yang lebih rendah dijangkiti COVID-19 yang serius (kategori 3, 4, dan 5) dan juga kematian akibat COVID-19 di kalangan penerima dos penggalak berbanding kumpulan yang tidak divaksinasi (non-vaccinated) dan kumpulan yang lengkap divaksinasi tetapi belum menerima dos penggalak (vaccinated but unboosted)

9. Secara kesimpulannya, vaksin dos penggalak dapat memberi perlindungan yang terbaik daripada kematian dan gejala serius COVID-19.

Tuan Yang di-Pertua,

10. KKM telah menjangkakan peningkatan kes COVID-19 susulan kes Omicron pertama yang dikesan di Malaysia sejak 3 Disember 2021. Situasi ini bukan sahaja berlaku di Malaysia, malah negara-negara lain juga menghadapi peningkatan kes mendadak disebabkan varian Omicron. Menyedari situasi peningkatan kes mendadak yang sama juga berlaku di Malaysia, KKM telah mempersiapkan beberapa langkah proaktif:

- (i) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambahbaik pengurusan COVID-19 melalui pendekatan *FTTIS (Find, Test, Trace, Isolate and Support)* yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera dikemaskini dalam MySejahtera pengguna. Kes positif dan kontak rapat akan diberikan Perintah Pengawasan dan Pemerhatian (*Home Surveillance Order*, HSO) dan juga Pelepasan Perintah Pengawasan dan Pemerhatian (*Release Order*, RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);
- (ii) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut:
 - Mengenal pasti pesakit yang memenuhi kriteria untuk dipantau di rumah;

- Menilai dan memantau perkembangan pesakit sepanjang tempoh pengasingan;
 - Mengenalpasti dan menyelaraskan pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital;
 - Menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.
- (iii) Memastikan sistem kesihatan di Malaysia tidak lumpuh dengan peningkatan kes secara mendadak, KKM telah mengadakan usahasama dengan fasiliti kesihatan swasta dalam pengurusan kes COVID-19. Hospital-hospital swasta telah bekerjasama dalam menyediakan katil bagi merawat kes COVID-19. Pengamal-pengamal perubatan swasta juga dilibatkan dalam pemantauan kes-kes positif yang diasingkan di rumah;
- (iv) Membangunkan *COVID-19 Clinical Care Pathway* bagi tujuan memulakan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk. Rawatan antiviral ini akan meliputi pesakit di Klinik Kesihatan, CAC, PKRC dan juga hospital bagi pesakit yang dimasukkan ke wad. Rawatan akan dimulakan setelah bekalan ubat antiviral tersebut tersedia di Malaysia;
- (v) Mengaktifkan semula *National COVID-19 Rapid Response Task Force* (RRTF 2.0) bermula 7 Februari 2022 susulan peningkatan kes COVID-19 melebihi 10,000 kes sehari. Pasukan RRTF 2.0 ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATUK ROZMAN BIN ISLI [LABUAN]

TARIKH : 14.03.2022 (ISNIN)

SOALAN

Datuk Rozman bin Isli [Labuan] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan tindakan Kementerian bagi mengurangkan kos pengangkutan ke Wilayah Persekutuan Labuan dalam usaha mengawal kenaikan harga barangan di sini.

JAWAPAN:

Yang di-Pertua,

Kementerian sentiasa memantau bekalan dan harga barang dari pengeluar, pengimport, pemborong dan peruncit. Peranan Kementerian adalah untuk memastikan harga sebenar dapat diijual tanpa ada kenaikan harga akibat pengambilan keuntungan oleh peniaga atau amalan mencatut.

Dalam hubungan ini, bagi mengawal harga barangan termasuk di Wilayah Persekutuan Labuan, mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

Berkaitan dengan kos pengangkutan ke Wilayah Persekutuan Labuan yang naik kesan daripada pandemik Covid-19, perbincangan mengenainya perlu dirundingkan dengan Kementerian yang bertanggungjawab iaitu Kementerian Wilayah Persekutuan (KWP) dan Kementerian Pengangkutan (MOT).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI MOHD. SALIM SHARIF
[JEMPOL]**

TARIKH : 14.03.2022 (ISNIN)

SOALAN

**Datuk Seri Haji Mohd. Salim Sharif [Jempol] minta MENTERI
PERDAGANGAN DALAM NEGERI DAN HAL EHWAL PENGGUNA**
menyatakan perancangan untuk memantapkan inisiatif Program Jualan
Keluarga Malaysia agar dapat meringankan kos sara hidup rakyat dengan
lebih berkesan.

JAWAPAN

Yang di-Pertua,

Kerajaan melalui Kementerian Perdagangan Dalam Negeri dan Hal Ehwal Pengguna (KPDNHEP) serta Kementerian Pertanian dan Industri Makanan (MAFI) bekerjasama untuk mencari penyelesaian terhadap situasi kenaikan harga barangan ketika ini. Sehubungan dengan itu, pelaksanaan Program Jualan Keluarga Malaysia (PJKM) diadakan sebagai inisiatif Kerajaan untuk membantu meringankan kos sara hidup rakyat terutamanya pengguna dari kalangan berpendapatan rendah.

Program ini menawarkan pilihan kepada pengguna untuk mendapatkan pelbagai barangan keperluan harian seperti ayam, ikan, telur, sayur-sayuran, minyak masak, gula, tepung, beras serta barangan proses dengan **harga sehingga 20% lebih rendah** daripada harga pasaran setempat. Program ini telah pun dilancarkan oleh YAB Perdana Menteri Dato' Sri Ismail Sabri Yaakob pada 2 Disember 2021 di PPR Kerinchi Lembah Pantai.

Walau bagaimanapun, buat masa ini, program ini yang merupakan salah satu pelan jangka pendek bagi membantu meringankan kos sara hidup rakyat akan dilaksanakan sehingga bulan Mac 2022 sahaja.

Sekiranya program ini diarahkan untuk diteruskan selepas bulan Mac 2022, KPDNHEP berpandangan bahawa pelaksanaan PJKM di premis-premis jualan rakan-rakan strategik KPDNHEP seperti di pasaraya besar, pasar raya, pasar mini dan kedai serbaneka adalah lebih sesuai. Ini kerana capaian kepada rakyat adalah lebih meluas selain boleh dilaksanakan dalam tempoh yang lebih panjang berbanding pelaksanaan secara premium iaitu pelaksanaan yang diadakan disatu-satu lokasi/tapak terbuka. Lokasi/tapak yang dipilih adalah berhampiran dengan kawasan penempatan penduduk golongan B40 dan M40.

Selain itu, kaedah pelaksanaan di premis-premis rakan strategik turut dapat mengurangkan kos-kos yang terpaksa ditanggung oleh kerajaan serta rakan-rakan strategik KPDNHEP seperti kos logistik, kos pengangkutan, kos upah serta masalah kekurangan pekerja bagi pelaksanaan program secara ex-situ turut dapat diatasi.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN TAN KOK WAI (CHERAS)

TARIKH : 14 MAC 2022 (ISNIN)

SOALAN

TUAN TAN KOK WAI (CHERAS) minta **MENTERI DALAM NEGERI** menyatakan senarai semua parti politik yang berdaftar di dalam negara di Semenanjung, Sabah dan Sarawak dan sama ada parti-parti ini adalah parti yang berasaskan kaum atau tidak berasaskan kaum.

JAWAPAN

Tuan Yang Di Pertua,

Secara keseluruhan, jumlah pertubuhan bagi kategori politik yang telah didaftarkan sehingga 31 Januari 2022 di bawah Akta Pertubuhan 1966 (Akta 832) oleh Jabatan Pendaftaran Pertubuhan Malaysia (JPPM), Kementerian Dalam Negeri (KDN) adalah sebanyak **86,853** pertubuhan. Daripada jumlah tersebut, sebanyak **67** pertubuhan merupakan pertubuhan parti induk manakala **86,786** adalah pertubuhan cawangan parti politik.

Berhubung maklumat mengenai parti berasaskan kaum dan etnik, pertubuhan parti politik yang telah didaftarkan oleh JPPM adalah mengikut kumpulan kaum dan etnik di Malaysia termasuk Sabah dan Sarawak sepertimana yang dinyatakan dalam perlembagaan parti. Daripada jumlah keseluruhan pertubuhan parti politik yang didaftarkan, sebanyak **lapan (8)** pertubuhan mewakili kaum Melayu, **enam (6)** pertubuhan mewakili kaum Cina, **13** pertubuhan mewakili kaum India, manakala selebihnya adalah terbuka kepada semua kaum dan etnik di Malaysia.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN WONG SHU QI [KLUANG]

TARIKH : 14 MAC 2022 (ISNIN)

SOALAN

PUAN WONG SHU QI minta **MENTERI KESIHATAN** menyatakan jumlah Pakej Penjagaan COVID-19 (PPC) yang telah diedarkan kepada keluarga B40 dan nilai kos untuk setiap satu pakej tersebut.

JAWAPAN

Tuan Yang di Pertua,

1. Pada 19 September 2021, Kerajaan telah mengumumkan pemberian Pakej Penjagaan COVID-19 (PPC) yang bertujuan untuk meningkatkan perlindungan kesihatan bagi keluarga kumpulan B40 sebagai persediaan memasuki fasa endemik. Pemberian PPC akan memberi manfaat kepada kumpulan B40 berkeluarga antara lain, dapat mengurangkan beban kewangan perbelanjaan kesihatan, meningkatkan kualiti hidup rakyat di samping meningkat kesedaran kumpulan B40 terhadap kepentingan memastikan keluarga bebas daripada wabak COVID-19.

2. Setiap pek PPC mengandungi 4 unit pelitup muka guna semula, 4 unit kit ujian sendiri COVID-19, 1 unit oksimeter nadi, 1 unit termometer dan risalah kesihatan.

3. Sehingga 10 Mac 2022, sebanyak 2,129,998 pek Pakej Penjagaan COVID-19 (PPC) telah diedarkan kepada keluarga B40. Kerajaan telah memperuntukkan sebanyak RM471.6 juta untuk pemberian PPC kepada 3.6 juta Keluarga Malaysia B40. Ini termasuk kos item, penghasilan kotak, pembungkusan dan pengedaran kepada penerima di seluruh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN
DARIPADA : TUAN KARUPAIYA A/L MUTUSAMI
[PADANG SERAI]
TARIKH : 14.03.2022 (ISNIN)

SOALAN

Tuan Karupaiya A/L Mutusami [Padang Serai] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah telah digerakkan oleh Kementerian dalam mengawal inflasi yang berlaku pada barangan asas yang telah membebankan rakyat.

JAWAPAN

Tuan Yag di- Pertua,

Untuk makluman Yang Berhormat, secara umumnya, inflasi merupakan satu **kenaikan harga** yang berlaku bagi barangan dan perkhidmatan dalam satu tempoh masa tertentu. Kadar inflasi diukur melalui pengiraan **Indeks Harga Pengguna (IHP)** sebagai medium pengukuran bagi perubahan harga bakul tetap barangan dan perkhidmatan dalam satu tempoh masa.

Walau bagaimanapun, tanggapan rakyat apabila kadar inflasi menunjukkan peningkatan secara keseluruhannya, ada yang membuat kesimpulan secara umum bahawa harga bagi semua barangan dan perkhidmatan telah naik sehingga rakyat merasakan harga bagi semua barangan semakin mahal. Tanggapan ini adalah tidak benar sama sekali.

Nilai inflasi terdapat di setiap item sama ada barangan mahupun perkhidmatan di mana setiap item masing-masing mempunyai nilai inflasi yang berbeza. Ada item yang nilai inflasinya tinggi dan ada item yang nilainya rendah. Jika kita meneliti nilai inflasi setiap item barangan dan perkhidmatan ini, kita dapati bukan semua item mencatatkan peningkatan harga. Pengguna juga tidak membeli kesemua item-item di dalam bakul tetap barangan dan perkhidmatan ini, sebaliknya membeli mengikut keperluan individu.

Namun, tidak dinafikan kenaikan kadar inflasi ketika ini sedikit sebanyak membebankan rakyat dari segi kenaikan harga barang makanan. Oleh itu, sebagai Kerajaan yang prihatin, Kementerian telah mengambil inisiatif dengan melaksanakan perkara-perkara berikut:

- i) Pelaksanaan **Program Jualan Keluarga Malaysia (PJKM)** yang di 222 kawasan Parlimen dan kini akan diperluaskan pelaksanaannya meliputi kawasan Dewan Undangan Negeri (DUN). PJM dianjurkan setiap minggu secara serentak di lokasi yang berdekatan dengan golongan sasar B40 dan M40 bagi membantu golongan berkenaan mendapatkan barangan keperluan harian seperti ayam, ikan, telur, sayur-sayuran, minyak masak, gula, tepung, beras serta barangan proses dengan harga lebih rendah antara 20 dan 50 peratus daripada harga pasaran setempat. Sehingga 14 Februari 2022, seramai 1.18 juta pengunjung telah hadir ke program ini nilai jualan direkodkan melebihi RM22.85 juta;
- ii) Melaksanakan **Skim Harga Maksimum Musim Perayaan (SHMMP)** dan juga **Skim Harga Maksimum Keluarga Malaysia (SHMKM)** bagi membantu rakyat mendapatkan barang keperluan pada paras harga yang berpatutan dan munasabah, terutamanya semasa permintaan tinggi barang-barang tertentu pada musim-musim perayaan utama; dan
- iii) Pelaksanaan **Program Penyeragaman Harga**. Ini bagi membolehkan penduduk di luar bandar dan pedalaman membeli barang keperluan asas seperti beras, gula, tepung gandum, minyak masak, LPG dan Community Drumming (petrol dan diesel) pada harga yang ditetapkan atau dikawal oleh Kerajaan seperti mana di bandar.

Selain program-program ini, Kememterian juga sentiasa mempergiatkan aktiviti-aktiviti penguatkuasaan di bawah **Akta Kawalan Harga dan Antipencatutan 2011** yang bertujuan mengawal peniaga daripada mengambil keuntungan yang tidak munasabah dan secara tidak langsung

barangan dapat dijual pada harga berpatutan oleh peniaga dan menguatkuasakan **Perintah Kawalan Harga (Penandaan Harga oleh Penjual Runcit) 1993** dengan mewajibkan peniaga meletak tanda harga bagi membantu rakyat membuat perbandingan harga dan akhirnya membuat pilihan harga yang lebih murah serta berpatutan

Pengguna juga perlu memainkan peranan untuk mengurangkan kesan kenaikan harga barang dengan mengamalkan perbelanjaan harian secara bijak dan berhemah dengan mengamalkan langkah-langkah seperti berikut:

- Merancang perbelanjaan dengan baik dengan membuat perancangan sebelum pergi membeli-belah;
- Menukar kecenderungan atau *preference* dalam keadaan wujud item pengganti bagi item yang menunjukkan peningkatan harga diluar kemampuan pengguna;
- Sentiasa membuat perbandingan harga untuk memastikan pengguna memilih harga yang berpatutan;
- Pengguna juga boleh membuat perbandingan harga menerusi aplikasi Price Catcher supaya dapat membantu pengguna membuat keputusan pembelian yang bijak;
- Membeli barangan dalam kuantiti yang sewajarnya; dan
- Tidak membuat *panic buying* atau berbelanja dalam kuantiti yang melebihi keperluan sebenar yang akan menyebabkan harga melonjak naik.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 14 MAC 2022 (ISNIN)

SOALAN

TUAN KARUPAIYA A/L MUTUSAMI minta **MENTERI KESIHATAN** menyatakan penjelasan daripada Kementerian Kesihatan Malaysia mengenai peningkatan bilangan kes baharu COVID-19. Apakah langkah Kementerian dalam memastikan peningkatan tersebut dalam keadaan terkawal.

JAWAPAN

Tuan Yang di-Pertua,

1. Salah satu punca peningkatan kes baharu COVID-19 adalah disebabkan oleh penularan jangkitan varian Omicron yang lebih mudah menular daripada varian-varian yang lain. Varian Omicron yang mempunyai 32 mutasi pada *protein spike* mempunyai keupayaan jangkitan antara 2.7 hingga 3.7 kali ganda berbanding varian Delta. Berdasarkan aktiviti surveilan genomik yang dilaksanakan, varian Omicron juga telah mendominasi jangkitan COVID-19 menggantikan varian Delta. Tambahan pula, kajian antarabangsa mendapati varian Omicron boleh menyebabkan jangkitan semula (*reinfection*) dengan lebih tinggi. Sebagai contoh, suatu kajian di England mendapati risiko jangkitan semula bagi varian Omicron adalah 5.4 kali lebih tinggi dari Delta.

2. Kementerian Kesihatan Malaysia (KKM) telah menjangkakan peningkatan kes COVID-19 susulan kes Omicron pertama yang dikesan di Malaysia sejak 3 Disember 2021. Situasi ini bukan sahaja berlaku di Malaysia, malah negara-negara lain juga menghadapi peningkatan kes mendadak disebabkan varian Omicron. Menyedari situasi peningkatan kes mendadak yang sama juga berlaku di Malaysia, KKM telah mempersiapkan beberapa langkah proaktif:

- (i) Pelaksanaan pemberian dos penggalak vaksin COVID-19 bagi individu yang berusia 18 tahun keatas dan pemberian vaksinasi COVID-19 kepada kanak-kanak berusia 5-11 tahun (bermula 3 Februari 2022).
- (ii) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambah baik pengurusan COVID-19 melalui pendekatan *FTTIS (Find, Test, Trace, Isolate and Support)* yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera dikemaskini dalam MySejahtera pengguna. Kes positif dan kontak rapat akan diberikan Perintah Pengawasan dan Pemerhatian (*Home Surveillance Order*; HSO) dan juga Pelepasan Perintah Pengawasan dan Pemerhatian (*Release Order*; RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);
- (iii) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut:
 - Mengenal pasti pesakit yang memenuhi kriteria untuk dipantau di rumah;
 - Menilai dan memantau perkembangan pesakit sepanjang

tempoh pengasingan;

- Mengenalpasti dan menyelaras pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital;
- Menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.

- (iv) Memastikan sistem kesihatan di Malaysia tidak lumpuh dengan peningkatan kes secara mendadak, KKM telah mengadakan usahasama dengan fasiliti kesihatan swasta dalam pengurusan kes COVID-19. Hospital-hospital swasta telah bekerjasama dalam menyediakan katil bagi merawat kes COVID-19. Pengamal-pengamal perubatan swasta juga dilibatkan dalam pemantauan kes-kes positif yang diasingkan di rumah;
- (v) Membangunkan *COVID-19 Clinical Care Pathway* bagi tujuan memulakan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk. Rawatan antiviral ini akan meliputi pesakit di Klinik Kesihatan, CAC, PKRC dan juga hospital bagi pesakit yang dimasukkan ke wad. Rawatan akan dimulakan setelah bekalan ubat antiviral tersebut tersedia di Malaysia;
- (vi) Mengaktifkan semula *National COVID-19 Rapid Response Task Force* (RRTF 2.0) bermula 7 Februari 2022 susulan peningkatan kes COVID-19 melebihi 10,000 kes sehari. Pasukan RRTF 2.0 ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19. Antara objektif utama penubuhan pasukan RRTF 2.0 adalah bagi:
- Menyelamatkan nyawa dengan memastikan akses ke Pusat Kuarantin dan Rawatan COVID-19 Berisiko Rendah (PKRC) dan hospital terjamin serta melakukan pemantauan kes positif COVID-19 melalui Pusat Penilaian COVID-19 secara maya (VCAC);
 - Memastikan akses kecemasan dan darurat tersedia

SOALAN NO : 46

apabila diperlukan, seperti menyediakan jumlah ambulans yang mencukupi dan tepat waktu melalui sistem pengurusan berpusat;

- Memastikan kebajikan individu yang terkesan dengan jangkitan COVID-19 tidak terabai termasuk anak-anak kepada kes positif selain menitikberatkan kesihatan mental mereka;
- Memastikan pengendalian dan penyampaian komunikasi strategik yang berkesan bagi mengurangkan serta meredakan kegusaran dalam kalangan masyarakat umum.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATUK LIEW CHIN JIN @ CHRISTINA LIEW [TAWAU]

TARIKH : 14 MAC 2022 (ISNIN)

SOALAN

DATUK LIEW CHIN JIN @ CHRISTINA LIEW minta **MENTERI KESIHATAN** menyatakan projek naik taraf Hospital Tawau kini tidak mengikuti jadual sedia ada. Ia sepatutnya telah siap dibina pada bulan Mei tahun 2020 di bawah Rancangan Malaysia Kesebelas (2016-2020). Apakah kemajuan kerja dan sama ada projek itu akan disiapkan tahun ini.

JAWAPAN

Tuan Yang di-Pertua,

1. Untuk makluman Ahli Yang Berhormat, Projek Naiktaraf Hospital Tawau, Tawau, Sabah, (Reka Dan Bina) telah diluluskan oleh Unit Perancang Ekonomi, Jabatan Perdana Menteri (UPE, JPM) di bawah *Rolling Plan* 1, Rancangan Malaysia Kesebelas (RMKe-11). Jabatan Kerja Raya Malaysia (JKR) adalah Agensi Pelaksana bagi projek tersebut.

2. Projek ini telah bermula pada 30 Mei 2017 dengan tarikh siap asal pada 25 Mei 2020 (tempoh pembinaan 36 bulan) dan telah diberikan lanjutan masa sehingga 8 April 2022. Walau bagaimanapun, pihak kontraktor mengalami masalah untuk melaksanakan projek ini yang mana sehingga 31 Januari 2022, kemajuan fizikal sebenar adalah sebanyak 69% berbanding jadual sebanyak 96%. Oleh yang demikian, pihak JKR

SOALAN NO : 47

Malaysia sedang memantau rapi pelaksanaan projek untuk mengambil tindakan selanjutnya.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK WIRA DR. MOHD HATTA BIN
MD. RAMLI [LUMUT]**

TARIKH : 14 MAC 2022 (ISNIN)

SOALAN

DATUK WIRA DR. MOHD HATTA BIN MD. RAMLI minta **MENTERI KESIHATAN** menyatakan sama ada terdapat peningkatan kematian perinatal bagi kalangan kandungan yang ibunya telah menerima suntikan vaksin COVID- 19.

JAWAPAN

Tuan Yang di-Pertua,

1. Kematian Perinatal adalah merujuk kepada kelahiran mati (*Stillbirth*) dan kematian bayi yang berumur kurang daripada satu (1) minggu.
2. Berdasarkan pemantauan kelahiran mati dan kematian kanak-kanak yang dilaporkan melalui *Stillbirth dan Under 5 Mortality Reporting System* (SU5MR), Kementerian Kesihatan Malaysia (KKM), tiada rekod kelahiran mati (*stillbirth*) dan kematian bayi kurang satu minggu yang disebabkan oleh COVID-19.
3. Sehingga kini, pihak KKM juga tidak menerima laporan atau data berkaitan kematian perinatal dalam kalangan ibu hamil yang menerima suntikan Vaksin COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 14 MAC 2022 (ISNIN)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan usaha-usaha yang sedang dan telah dilakukan oleh Kerajaan untuk mencipta lebih banyak pekerjaan baru (New Jobs) di negara ini.

JAWAPAN

Tuan Yang Di-Pertua,

Pada tahun 2021, Kerajaan telah berjaya menempatkan 558,633 peluang pekerjaan melalui 27 inisiatif di bawah Majlis Pekerjaan Negara yang diselaraskan oleh LAKSANA, Kementerian Kewangan. Pencapaian ini melebihi sasaran awal yang ditetapkan iaitu 500,000 peluang pekerjaan. Meskipun berdepan dengan cabaran yang sukar berikutan pelaksanaan Perintah Kawalan Pergerakan dan penutupan beberapa sektor ekonomi, Kerajaan berjaya mencapai sasaran yang ditetapkan dalam usaha membantu rakyat mendapatkan pekerjaan.

Pada masa yang sama, Kerajaan melalui Kementerian Perdagangan Antarabangsa dan Industri dan 9 Agensi Promosi Pelaburan telah berjaya mewujudkan 148,300 pekerjaan baharu melalui pelaburan dalam negara di mana 109,605 atau 73.9 peratus daripadanya dalam kategori mahir dan separuh mahir. Daripada jumlah tersebut, sebanyak 77,353 pekerjaan baharu yang dicipta adalah dalam sektor pembuatan iaitu 44,723 daripada sektor perkhidmatan, 25,233 daripada sektor pembinaan dan 991 daripada sektor pertanian.

Kerajaan melalui Kementerian Perdagangan Antarabangsa dan Industri dan sembilan Agensi Promosi Pelaburan juga telah berjaya mewujudkan 148,300 pekerjaan baharu melalui pelaburan dalam negara di mana 109,605 atau 73.9 peratus daripadanya dalam kategori mahir dan separuh mahir. Daripada jumlah tersebut, sebanyak 77,353 pekerjaan baharu yang dicipta adalah dalam sektor pembuatan iaitu 44,723

SOALAN NO : 50

daripada sektor perkhidmatan, 25,233 daripada sektor pembinaan dan 991 daripada sektor pertanian.

Kerajaan turut melaksanakan Pelan Strategik Penciptaan Pekerjaan Nasional yang disokong oleh lima *Specialised Task Force* di bawah Majlis Pekerjaan Negara. Pelan ini dirangka dengan mengadakan sesi libat urus bersama 103 wakil daripada sektor awam mahupun swasta. Secara keseluruhan, Majlis Pekerjaan Negara telah mengenal pasti 32 inisiatif utama termasuk enam Game Changers yang berpotensi untuk mewujudkan peluang pekerjaan baharu di Malaysia. Setiap inisiatif tersebut akan diterajui oleh Kementerian dan Agensi Kerajaan yang berkaitan di mana *milestone* bagi setiap inisiatif akan dipantau oleh LAKSANA secara berkala.

Kerajaan yakin Inisiatif Jamin Kerja dan Pelan Strategik Penciptaan Pekerjaan Nasional ini dapat meneruskan momentum pemulihan ekonomi dan menyediakan lebih banyak peluang pekerjaan bagi Keluarga Malaysia serta menangani isu-isu berkaitan seperti kekurangan pekerja dalam sektor yang tertentu, kesaksamaan peluang untuk golongan rentan serta isu berkaitan penggajian. Adalah diharapkan melalui pelaksanaan inisiatif Jamin Kerja ini, usaha dan momentum pemulihan ekonomi dapat menurunkan kadar pengangguran negara kepada 4 peratus menuju ke tahap guna tenaga penuh.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN NOR AZRINA BT. SURIP (MERBOK)

TARIKH : 14 MAC 2022 (ISNIN)

SOALAN

PUAN NOR AZRINA BINTI SURIP (MERBOK) minta **MENTERI DALAM NEGERI** menyatakan permohonan melalui naturalisasi pantas berbanding permohonan kerakyatan bagi anak-anak kepada warganegara Malaysia dan anak-anak angkat yang mengambil masa bertahun-tahun untuk diproses dan kebanyakannya tidak diluluskan walaupun anak-anak ini ada kaitan dengan kesetiaan kepada Malaysia.

JAWAPAN

Tuan Yang Di Pertua,

Untuk makluman Ahli Yang Berhormat, penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan imigresen. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK DR. SHAHRUDDIN BIN MD.
SALLEH [SRI GADING]**

TARIKH : 14 MAC 2022 (ISNIN)

SOALAN

DATUK DR. SHAHRUDDIN BIN MD. SALLEH minta **MENTERI KESIHATAN** menyatakan:

- (a) statistik bilangan pegawai perubatan tetap dan kontrak yang telah meletakkan jawatan mengikut tahun; dan
- (b) apakah faktor yang menjadi sebab mereka ini meletakkan jawatan.

JAWAPAN:

Tuan Yang di-Pertua,

1. Berdasarkan rekod Kementerian Kesihatan Malaysia (KKM), Pegawai Perubatan lantikan kontrak yang telah meletak jawatan sejak tahun 2017 hingga 2021 adalah seramai 2,032 orang iaitu:
 - i. 2017: 110 orang;
 - ii. 2018: 168 orang;
 - iii. 2019: 475 orang;
 - iv. 2020: 511 orang; dan
 - v. 2021: 768 orang.

2. Manakala, Pegawai Perubatan lantikan tetap yang telah meletakkan jawatan sejak tahun 2017 hingga 2021 adalah seramai 3,313 orang iaitu
 - i. 2017: 869 orang;
 - ii. 2018: 734 orang;
 - iii. 2019: 915 orang;
 - iv. 2020: 534 orang; dan
 - v. 2021: 261 orang.

3. Dalam hal penentuan peletakan jawatan, keputusan tersebut adalah merupakan hak yang diputuskan sendiri oleh pegawai. Alasan perletakan jawatan tersebut antaranya adalah seperti berikut:
 - (i) berkhidmat dalam sektor swasta dan Badan Berkanun;
 - (ii) sebab peribadi;
 - (iii) melanjutkan pelajaran;
 - (iv) masalah kesihatan;
 - (v) berhijrah ke luar negara; dan
 - (vi) membuka klinik sendiri.

Sekian terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN JUGAH ANAK MUYANG (LUBUK ANTU)

TARIKH : 14.3.2021 (ISNIN)

SOALAN

TUAN JUGAH ANAK MUYANG (LUBUK ANTU) minta **MENTERI PEMBANGUNAN LUAR BANDAR** nyatakan pada peringkat manakah status permohonan projek akses jalan di kawasan jajaran Ulu Lemanak, Ulu Engkari, Ulu Batang Ai, Jalan Lidong Skrang Sereta Jalan Basi.

JAWAPAN

Tuan Yang di-Pertua,

Untuk makluman Yang Berhormat, Projek Jalan masuk ke pelbagai kampung di sepanjang Ulu Batang Ai, Lubok Antu, Sri Aman telah diluluskan pelaksanaannya di bawah *Rolling Plan* Keempat, Rancangan Malaysia Kesebelas (RP4, RMKe-11) Tahun 2020 dengan kos keseluruhan berjumlah RM187.5 juta. Skop projek ini adalah menaik taraf jalan sepanjang 25 km dengan spesifikasi JKR R1. Status semasa projek ini adalah sedang dalam peringkat kerja-kerja awalan dan dijangka pelantikan kontraktor dapat diselesaikan pada suku keempat tahun 2022.

Manakala, bagi Projek Membina Jalan Sri Aman - Lidong, Sri Aman, Sarawak telah diluluskan di bawah *Rolling Plan* Keempat, Rancangan Malaysia Kesebelas (RP4, RMKe-11) Tahun 2019 dengan kos keseluruhan berjumlah RM63.0 juta. Skop projek ini adalah membina jalan sepanjang 10.5 km dengan spesifikasi JKR R1 dan sebuah jambatan. Status semasa projek ini adalah sedang dalam peringkat rekabentuk dan dijangka dapat ditender pada suku keempat tahun 2022.

Seterusnya, projek Jalan Ulu Skrang, Lubok Antu, Sarawak (Fasa 2) telah diluluskan di bawah *Rolling Plan* Pertama, Rancangan Malaysia Kesebelas (RP1, RMKe-11) dengan kos keseluruhan berjumlah RM28.5 juta. Skop kerja projek ini adalah membina 13 buah jambatan kecil dan pembentung (culvert) di jajaran projek Fasa 1 sepanjang 10km. Status terkini projek adalah di peringkat perolehan tender.

Untuk makluman Yang Berhormat juga, Projek Jalan Basi (Brayun-Sg Basi ke Kuching/Sibu Trunk Road), Bahagian Sri Aman telah dipohon untuk dilaksanakan di bawah *Rolling Plan* Kedua, Rancangan Malaysia Keduabelas (RP2, RMKe-12) Tahun 2022. Walau bagaimanapun, projek ini tidak diluluskan dalam Bajet 2022 dan Kementerian akan mengemukakan semula permohonan projek ini dalam *Rolling Plan* Ketiga, Rancangan Malaysia Keduabelas (RP3, RMKe-12) Tahun 2023.

Untuk makluman Yang Berhormat juga, kementerian ini tidak menerima permohonan bagi pelaksanaan projek akses jalan di kawasan jajaran Ulu Lemanak dan Ulu Engkari. Walau bagaimanapun, Kerajaan Negeri Sarawak telah pun meluluskan beberapa projek-projek jalan di kawasan berkenaan menggunakan peruntukan Kerajaan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[BANDAR KUCHING]**

TARIKH : 14 MAC 2022 (ISNIN)

SOALAN

DR. KELVIN YII LEE WUEN minta **MENTERI KESIHATAN** menyatakan rancangan Kementerian untuk melaksanakan undang-undang melarang penjualan tembakau dan produk rokok lain kepada sesiapa yang dilahirkan selepas tahun 2005.

JAWAPAN

Tuan Yang di-Pertua,

1. Kawalan hasil tembakau dan produk merokok pada masa kini adalah tertakluk di bawah Peraturan-peraturan Kawalan Hasil Tembakau (PPKHT) 2004.
2. Bagi menambah baik kawalan sedia ada, Kementerian Kesihatan Malaysia (KKM) sedang dalam proses gubalan Rang Undang-Undang baharu bagi mengawal hasil tembakau dan semua jenis produk merokok dan juga termasuk peruntukan khusus mengenai larangan penjualan kepada generasi yang lahir pada tahun 2005 dan seterusnya.
3. Ketika ini, kumpulan yang lahir pada tahun 2005 dan tahun-tahun berikutnya masih lagi belum mencapai usia 18 tahun yang mana

kumpulan ini adalah dilarang untuk memiliki, membeli atau melakukan aktiviti merokok.

4. Antara usaha-usaha yang telah dijalankan untuk melaksanakan undang-undang tersebut adalah seperti:

- (i) mengkaji pelaksanaan berkaitan cadangan melarang penjualan dan pemilikan produk tembakau dan produk merokok yang lain termasuk rokok elektronik atau vape kepada generasi yang lahir selepas 1 Januari 2005 dengan mengambil contoh pendekatan pelaksanaan di New Zealand, Amerika Syarikat dan Filipina;
- (ii) menjalankan beberapa sesi libat urus bersama pihak industri, badan bukan kerajaan, badan profesional dan pemegang taruh yang lain yang terlibat dengan pelaksanaan larangan penjualan dan pemilikan produk tembakau dan produk merokok yang lain termasuk rokok elektronik atau vape kepada generasi yang lahir selepas 1 Januari 2005;
- (iii) memperkukuhkan aktiviti penguatkuasaan berkaitan larangan merokok dengan penglibatan pelbagai agensi termasuk penurunan kuasa kepada pegawai-pegawai awam yang berkecualan; dan
- (iv) khusus bagi golongan perokok, pihak KKM sedang memperkukuhkan perkhidmatan rawatan berhenti merokok melalui kerjasama pintar antara sektor awam dan swasta melalui Perkhidmatan Berhenti Merokok mQuit dan meningkatkan kebolehdapatan perkhidmatan rawatan ini secara dalam talian melalui laman sesawang **www.jomquit.com**.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB TUAN SIVAKUMAR A/L VARATHARAJU NAIDU
(BATU GAJAH)**

TARIKH : 14 MAC 2022 (ISNIN)

SOALAN

TUAN SIVAKUMAR VARATHARAJU NAIDU (BATU GAJAH) minta **MENTERI DALAM NEGERI** menyatakan hasrat Kerajaan untuk membekalkan peralatan antidron kepada Jabatan Penjara Malaysia. Berapa jumlah kes pencerobohan dron yang berlaku di penjara-penjara Malaysia untuk menyeludup masuk artikel-artikel larangan seperti dadah, telefon bimbit dan sebagainya kepada banduan-banduan yang berada dalam tahanan.

JAWAPAN

Tuan Yang Di Pertua,

Untuk makluman Ahli Yang Berhormat, statistik Jabatan Penjara Malaysia bagi tempoh 2015 sehingga 14 Februari 2022, menunjukkan jumlah pencerobohan dron ke dalam institusi penjara, Jabatan Penjara Malaysia adalah sebanyak 48 kes. Bagi tahun ini sahaja iaitu bermula Januari 2022 sehingga 14 Februari 2022 telah dilaporkan sebanyak 6 kes yang melibatkan pencerobohan dron ke dalam institusi penjara.

Ancaman dron didapati bukan sahaja melibatkan penyeludupan artikel larangan seperti dadah dan telefon bimbit, bahkan penggunaan dron juga dilihat tidak mustahil berpotensi sebagai modus operandi yang baru oleh penjenayah dalam menyeludup masuk senjata api bagi kegunaan banduan di dalam penjara yang mampu menggugat dan mengancam keselamatan sistem kepenjaraan.

Menyedari keperluan mendesak tersebut, Jabatan Penjara Malaysia, melalui Kementerian Dalam Negeri telah mengangkat permohonan bagi mendapatkan bekalan peralatan Alat Pengesan Dron (*Aeroscope Portable Unit*), *Drone Jamming Gun (C-UAV Jammer YZ-101)*, *Quadcopter Drone (Matrice 300 RTK & MAVIC 2 Enterprise)* dan aksesori kelengkapan dron melibatkan anggaran kos sebanyak RM1.9 juta bagi menangani ancaman pencerobohan dron dan jenayah tanpa sempadan yang melibatkan banduan di institusi penjara. Status permohonan tersebut telah pun berada di peringkat kelulusan pihak Kementerian Kewangan di bawah material keselamatan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : PUAN ISNARAISAH MUNIRAH MAJILIS
[KOTA BELUD]**

TARIKH : 14 MAC 2022 (ISNIN)

SOALAN

PUAN ISNARAISAH MUNIRAH MAJILIS [KOTA BELUD] minta **MENTERI SUMBER MANUSIA** menyatakan kadar terkini *underemployment* atau guna 'tenaga tak penuh' (GTTP) dan jalinan kerjasama rentas Kementerian dalam merangka pelan dan dasar untuk meningkatkan tahap padanan pekerjaan (*Job Matching*).

JAWAPAN

Tuan Yang Di-Pertua,

Konsep asas guna tenaga tidak penuh atau *underemployment* merujuk kepada mereka yang bekerja kurang 30 jam seminggu semasa minggu rujukan disebabkan keadaan kerja atau kerja yang tidak mencukupi.

Berdasarkan Survei Tenaga Buruh oleh Jabatan Perangkaan Malaysia pada suku tahun keempat 2021, dengan pengoperasian aktiviti perniagaan yang berterusan pada tempoh tersebut telah menyebabkan bilangan orang yang bekerja kurang dari 30 jam seminggu menurun sebanyak 15.2 peratus kepada 393.8 ribu orang berbanding 464.6 ribu orang pada suku tahun ketiga 2021.

Menerusi Majlis Pekerjaan Negara di bawah Kementerian Kewangan, pelbagai inisiatif telah direncana oleh pihak Kerajaan dalam mengekalkan dan mewujudkan peluang pekerjaan baharu untuk rakyat.

Kementerian Sumber Manusia bersama Kementerian Pembangunan Usahawan dan Koperasi (MEDAC) telah dipertanggungjawab mempengerusikan salah satu daripada lima (5) Pasukan Petugas Khas atau *Specialised Taskforce* dengan izin yang diwujudkan di bawah Majlis Pekerjaan Negara iaitu Pasukan Petugas Khas Sumber Manusia dan Keusahawanan.

Pasukan Petugas Khas Sumber Manusia dan Keusahawanan memainkan peranan yang amat penting dalam menyokong Majlis Pekerjaan Negara melalui beberapa objektif utama iaitu:

- (i) meningkatkan penciptaan pekerjaan;
- (ii) memaksimumkan tahap pengekalan pekerjaan (*job retention*);
- (iii) membuat padanan pekerjaan secara komprehensif bagi mengatasi isu *underemployment*; dan
- (iv) mengkaji dan merangka mekanisma perlindungan keselamatan sosial bagi pekerjaan sendiri (*self-employed*).

Menerusi Pasukan Petugas Khas ini, pelaksanaan beberapa inisiatif bagi menyediakan peluang pekerjaan dan latihan kemahiran dan peningkatan kemahiran kepada rakyat dipantau. Antaranya adalah program Insentif Penggajian Jamin Kerja yang akan menyediakan lebih 300,000 peluang pekerjaan dan program latihan dan peningkatan kemahiran yang mensasarkan seramai 220,000 peserta dan akan dipantau menerusi platform *Upskill* Malaysia.

Selain itu, Kementerian Sumber Manusia turut bekerjasama dengan beberapa kementerian/ agensi lain bagi pelaksanaan program-program berkaitan penempatan pekerjaan dengan mengambil kira padanan pekerjaan, antaranya:

- (i) bersama Kementerian Pengajian Tinggi dan Kementerian Belia dan Sukan untuk melaksanakan program-program penempatan pekerjaan dengan menganjurkan aktiviti temuduga.
- (ii) bersama Microsoft Malaysia, Junior Achievement Malaysia dan CloudSwyft dalam melaksanakan Program Kemahiran Digital Bagi Kerjaya Hari Esok. Program bertujuan untuk mendedahkan peserta kepada kursus dan pensijilan kemahiran digital berkonsepkan 'bersedia untuk masa depan', kemahiran insaniah dan peluang penempatan pekerjaan yang berpotensi.

Kerajaan turut meluaskan Elaun Mencari Pekerjaan meliputi golongan yang tidak mencarum dengan PERKESO termasuklah graduan baharu, lepasan sekolah dan pekerja sektor tidak formal.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L SUBRAMANIAM
[SUNGAI SIPUT]**

TARIKH : 14 MAC 2022 (ISNIN)

SOALAN

Minta **MENTERI PEMBANGUNAN USAHAWAN DAN KOPERASI** menyatakan senarai latihan keusahawanan yang dikendalikan oleh MEDAC sekali gus peratusan penglibatan usahawan India dari tahun 2018-2022. Nyatakan peluang pekerjaan yang bakal disediakan kepada usahawan yang telah hadir ke latihan tersebut.

JAWAPAN

Tuan Yang di-Pertua,

Kementerian ini melalui agensinya telah melaksanakan pelbagai inisiatif merentasi pelbagai kaum bagi memastikan kelangsungan perniagaan dan pendapatan usahawan walaupun di era pandemik COVID-19.

Institut Keusahawanan Negara (INSKEN)

Antara program latihan dan bimbingan yang dilaksanakan oleh INSKEN dengan penglibatan usahawan India dari tahun 2018 hingga 2021 ialah:

- a) Program Latihan Bisnes (IBT);
- b) Latihan Asas Keusahawanan (KAK);
- c) Latihan Asas Industri (INBT);
- d) Program Usahawan Dropship dan Ejen (DNA);
- e) Kelas Asas Platform (Lazada/Shopee);
- f) Program Bimbingan Jualan Atas Talian (e-Board); dan
- g) Program Konsultasi Bisnes

Sepanjang tempoh 4 tahun (2018 hingga 2021) **penglibatan usahawan India hanya 5% hingga 6% sahaja** dalam program-program INSKEN. Untuk menggalakkan penyertaan kaum India, pada tahun 2021, INSKEN telah melaksanakan Kursus Asas Keusahawanan dengan kerjasama Majlis Belia India Malaysia sebagai inisiatif dalam memperkasakan agenda pembangunan sosioekonomi belia dan masyarakat India secara keseluruhannya. Seramai **40 orang belia India** telah mengikuti program tersebut. Keberhasilan dan keberkesanan program-program latihan yang disediakan oleh INSKEN adalah agar usahawan memahami dan mempraktikkan tugas yang disediakan semasa program berlangsung. Ini bagi memastikan usahawan yang terlibat dapat mempraktikkan ilmu tersebut dalam perniagaan yang diusahakan. Manakala program bimbingan menyasarkan peserta yang terlibat dapat meningkatkan purata hasil jualan sekurang-kurangnya 20%.

SOALAN NO : 57

Usahawan yang mengikuti program bimbingan akan dibimbing dan dipantau oleh pakar industri dan pakar platform *online* supaya lebih memahami dan lebih dekat dengan industri yang diceburi oleh usahawan.

TEKUN Nasional

Untuk makluman, program latihan keusahawanan yang dilaksanakan TEKUN Nasional adalah terhad kepada usahawan TEKUN Nasional yang telah mendapat pembiayaan sahaja melalui pelaksanaan Seminar Asas Keusahawanan (SAK) dengan memberi pendedahan melalui beberapa modul keusahawanan, pemasaran dan perakaunan.

Sejak tahun 2018, TEKUN telah melaksanakan 191 siri seminar di seluruh negara dengan kehadiran peserta seramai 40,447 orang. Daripada jumlah ini, pada tahun 2021, seramai **479 peserta** adalah dalam kalangan kaum India yang menerima pembiayaan melalui Skim Pembiayaan Usahawan Masyarakat India (SPUMI).

Bank Rakyat

Program Pembangunan Usahawan di bawah Bank Rakyat dikendalikan melalui **Program SUTERA** (*Sustainable – Teamwork – Radical*). Program pembangunan usahawan ini menawarkan inisiatif seperti yang berikut:

- a) **Kursus Asas Keusahawanan (KAK)** – Program pembangunan bagi usahawan informal secara percuma;
- b) ***Surviving The New Norm (STNN)*** – Program pembangunan usahawan merangkumi aspek pengurusan kewangan dalam norma baharu dan perniagaan melalui platform digital;
- c) ***One to One Coaching (O2O)*** – Program bimbingan daripada pakar industri bagi usahawan mikro selama 3 bulan;
- d) **Jom Ubah Minda Peniaga (JUMP)** – Program pembangunan usahawan ke platform digital yang dikendalikan oleh PERNAS; dan

- e) **Santai Namun Sampai – Program Jelajah Bank Rakyat** bersama usahawan. Program ini menawarkan khidmat Klinik Usahawan bagi memberi perkhidmatan rundingan kepada usahawan.

Sehingga Februari 2022, seramai **260 usahawan kaum India** telah menerima pembiayaan dari Bank Rakyat dengan jumlah **sebanyak RM35.26 juta**.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' JOHARI BIN ABDUL (SUNGAI
PETANI)**

TARIKH JAWAB : 14 MAC 2022 (ISNIN)

SOALAN

DATO' JOHARI BIN ABDUL (SUNGAI PETANI) minta **MENTERI PERUMAHAN DAN KERAJAAN TEMPATAN** menyatakan seperti yang telah diumumkan oleh Menteri bahawa Kerajaan berhasrat untuk mengambil alih kuarters perumahan guru-guru yang ditinggalkan kosong dan makin memburuk. Adakah Kementerian bercadang menjual semua kuarters ini kepada orang awam agar bangunan-bangunan ini dapat diselamatkan dan kewujudan mereka yang tidak terurus di tengah masyarakat dapat diselesaikan.

JAWAPAN

Tuan Yang di-Pertua,

Untuk makluman Ahli Yang Berhormat, pelaksanaan cadangan penjualan kuarters ini memerlukan penelitian yang lebih mendalam kerana melibatkan peraturan penjualan aset milik Kerajaan yang diselaraskan oleh Bahagian Pengurusan Aset Awam, Kementerian Kewangan dan pelbagai agensi penyedia kemudahan kuarters perumahan yang lain.

Selain itu, kajian terperinci oleh agensi pemilik kuarters perlu dibuat sebelum cadangan penjualan kuarters boleh dilaksanakan. Aspek perpindahan hak milik kuarters kediaman kerajaan kepada hak milik individu secara penjualan juga perlu dikaji. Ini bagi memastikan proses pengambilalihan tidak bertentangan dengan prosedur Kerajaan dan peraturan atau undang-undang semasa di samping pertambahan implikasi kewangan dari segi kos baik pulih kuarters sedia ada sebelum rumah berkenaan dapat dijual. Dalam hal ini, KPKT terbuka untuk berbincang berhubung sebarang kerjasama yang boleh diadakan dengan Bahagian Pengurusan Aset Awam, Kementerian Kewangan mahupun dengan agensi penyedia kuarters seperti Kementerian Pelajaran Malaysia (KPM).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI HASANUDDIN BIN MOHD
YUNUS (HULU LANGAT)**

TARIKH : 14 MAC 2022 (ISNIN)

SOALAN

DATUK HAJI HASANUDDIN BIN MOHD YUNUS (HULU LANGAT) minta **MENTERI PERUMAHAN DAN KERAJAAN TEMPATAN** menyatakan mengapa balai bomba masih belum dibina di kawasan kerap banjir, berhampiran empangan, serta berkepadatan penduduk tinggi seperti di Batu 11/14 Hulu Langat, serta menambah bilangan bot penyelamat untuk balai bomba yang terletak di kawasan bencana.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) telah membuat kajian keperluan pembinaan balai bomba di kawasan Batu 11 dan Batu 14, Hulu Langat. Berdasarkan markah risiko kebakaran yang diperolehi, terdapat keperluan bagi membina sebuah balai bomba kategori C di kawasan tersebut. Pada masa ini, JBPM sedang dalam proses mengenal pasti tapak tanah yang bersesuaian bagi tujuan pembinaan balai bomba yang baharu. Kementerian melalui JBPM telah merancang supaya permohonan pembinaan balai bomba di kawasan tersebut dimasukkan dalam Rancangan Malaysia Kedua Belas (RMKe-12) mengikut keutamaan. Walau bagaimanapun, pelaksanaannya bergantung kepada kelulusan agensi pusat serta keupayaan peruntukan kewangan semasa.

Kawasan Batu 11 kini mendapat perkhidmatan kebombaan daripada Balai Bomba dan Penyelamat (BBP) Bandar Tun Hussein Onn dengan jarak 3 kilometer yang mengambil masa lebih kurang 6 minit untuk sampai. Kawasan Batu 14 juga mendapat perkhidmatan kebombaan daripada balai bomba yang sama dengan jarak 14 kilometer yang mengambil masa lebih kurang 32 minit untuk sampai.

Bagi memastikan penduduk di kawasan Batu 11 dan Batu 14 mendapat perkhidmatan kebombaan yang sewajarnya, terdapat juga bantuan awal daripada Pasukan Bomba Sukarela (PBS) Taman Sri Nanding dan PBS Hulu Langat. Maklumat lanjut berkaitan PBS ini adalah seperti jadual di bawah:

Bil.	PBS	Jarak Masa		Jumlah Ahli	Peralatan
		Batu 11	Batu 14		
1.	Sri Nanding	10 km 22 minit	3 km 6 minit	15	i. Proton Arena ii. Peralatan perlindungan diri (PPE)
2.	Hulu Langat	7 km 16 minit	5 km 10 minit	37	iii. Peralatan asas pemadaman

Berhubung isu penambahan bot yang dibangkitkan oleh Ahli Yang Berhormat, sebanyak sepuluh (10) buah bot penyelamat telah ditempatkan di enam (6) buah balai bomba yang terlibat dengan bencana banjir di kawasan tersebut iaitu BBP Pandan Indah, BBP Ampang, BBP Bangi, BBP Kajang, BBP Semenyih dan BBP Tun Hussein Onn. Susulan kejadian banjir di kawasan Hulu Langat, KPKT telah menambah sebanyak empat (4) buah bot baharu yang ditempatkan di BBP Pandan Indah (1 unit), BBP Semenyih (1 unit) dan BBP Tun Hussein Onn (2 unit). Ini menjadikan keseluruhan 14 buah bot penyelamat telah ditempatkan di enam (6) buah balai bomba yang berhampiran dan sekiranya kejadian banjir berulang di kawasan Hulu Langat, proses penyelamatan dan pemindahan mangsa banjir dapat dilaksanakan dengan lebih berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISAH MUNIRAH
MAJILIS [KOTA BELUD]**

TARIKH : 14 MAC 2022 (ISNIN)

SOALAN

PUAN ISNARAISAH MUNIRAH MAJILIS minta **MENTERI KESIHATAN** menyatakan adakah sumber data, sains dan saranan dari World Health Organization (WHO) menjadi sandaran keputusan Kerajaan memberikan suntikan dos penggalak vaksin COVID-19 kepada golongan dewasa yang sihat tubuh badan.

JAWAPAN

Tuan Yang di-Pertua,

1. Sebelum sebarang keputusan dimuktamadkan bagi pemberian dos penggalak dilaksanakan, Kementerian Kesihatan Malaysia (KKM) menggunakan pendekatan berlandaskan bukti dan sains terutamanya dari segi keberkesanan dan keselamatan vaksin termasuk merujuk kepada saranan Pertubuhan Kesihatan Sedunia (WHO).

2. *The Scientific Advisory Group for Emergencies (SAGE), WHO* telah membuat semakan serta mengemaskini *WHO SAGE Roadmap For Prioritizing Use Of Covid-19 Vaccines* pada 21 Januari 2022. Semakan ini mengambil kira ketersediaan vaksin yang semakin meningkat, kadar liputan vaksin, data epidemiologi serta situasi semasa termasuk varian COVID-19 yang membimbangkan.

3. Melihat kepada situasi epidemiologi semasa termasuk vaksin COVID-19 yang sedia ada mempunyai kesan sederhana dalam mengurangkan penularan dalam konteks Varian Keprihatinan (VoC) SARS-CoV-2, terutamanya *Omicron*. Oleh itu, objektif utama penggunaan vaksin dalam konteks global adalah untuk mengelakkan penyakit yang teruk dan kematian akibat COVID- 19, melindungi sistem kesihatan sambil turut mengurangkan morbiditi termasuk keadaan selepas COVID-19.

4. WHO **SAGE Roadmap** ini juga mengetengahkan kenyataan di dalam situasi di mana perlindungan vaksinasi melebihi 50% daripada populasi seperti Malaysia pemberian vaksin kepada kanak-kanak remaja dan keutamaan dos tambahan serta dos penggalak perlu dipertimbangkan. Selain daripada itu, pelan Hala Tuju ini turut menitikberatkan kepentingan mengutamakan pemberian bekalan vaksin yang tersedia untuk mengoptimumkan impak ke atas kesihatan, keadaan sosioekonomi dan ekuiti, dan memberi tumpuan kepada dasar vaksin sesuatu negara.

5. WHO juga turut memberikan saranan kadar liputan siri primer yang rendah, sederhana dan tinggi dalam kumpulan yang diberikan keutamaan seperti yang berisiko tinggi.

- i. **Negara yang mempunyai kadar liputan siri primer yang rendah**, keutamaan adalah untuk mencapai kadar liputan siri primer yang tinggi antara kumpulan keutamaan yang lebih tinggi sebelum menawarkan dos vaksin kepada kumpulan keutamaan yang lebih rendah;
- ii. **Negara yang mempunyai kadar liputan siri primer yang sederhana hingga tinggi dalam kumpulan keutamaan yang lebih tinggi (*higher priority group*)** biasanya harus mengutamakan sumber yang ada untuk mula-mula mencapai kadar liputan dos penggalak yang tinggi dalam kumpulan penggunaan keutamaan yang lebih tinggi sebelum menawarkan dos vaksin kepada kumpulan penggunaan keutamaan yang

lebih rendah (*lower priority group*);

- Dalam situasi tertentu, pertimbangan perlu dilaksanakan dalam mengoptimalkan kesan penggunaan vaksin atau menawarkan penggalak dos kepada **kumpulan berisiko tinggi seperti orang tua** untuk mengelakkan lebih banyak kemasukan ke hospital dan kematian atau menawarkan dos siri utama kepada **orang dewasa yang selebihnya, remaja, dan kanak-kanak**.
- Ini bergantung kepada beberapa faktor termasuk **situasi negara tersebut, bekalan serta program vaksinasi, dinamik wabak termasuk VoC dan imuniti yang disebabkan oleh jangkitan, produk vaksin, keberkesanan vaksin, dan pengurangan perlindungan imuniti (*waning immunity*)**.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DR. KELVIN YII LEE WUEN
[KUCHING]**

TARIKH : 14 MAC 2022 (ISNIN)

SOALAN

DR. KELVIN YII LEE WUEN bertanyakan **MENTERI KESIHATAN** tentang pelan Kerajaan untuk meningkatkan penerimaan dos penggalak di kalangan komuniti yang masih kurang menerima dos penggalak ini. Ini termasuk bagaimana meningkatkan penerimaan PICKids di kalangan ibu bapa yang mungkin menyoal keperluan vaksin tersebut apabila kadar hospitalisasi dan kematian di kalangan 12 tahun ke bawah adalah agak kurang.

JAWAPAN

Tuan Yang di-Pertua,

1. Kementerian Kesihatan Malaysia (KKM) telah menubuhkan Jawatankuasa Komunikasi Strategik bagi memperkukuhkan aktiviti penyampaian maklumat kepada komuniti tentang keperluan mengambil vaksin dan dos penggalak ini. Melalui Jawatankuasa ini, kerjasama telah dijalankan dengan lain-lain agensi seperti Kementerian Perpaduan Negara (KPN), Kementerian Pembangunan Luar Bandar (KPLB) dan Suruhanjaya Komunikasi dan Multimedia (SKMM) bagi mendekatkan komuniti dengan maklumat jelas dan tepat berkaitan kepentingan, keberkesanan dan keselamatan vaksin serta dos penggalak, melalui jentera-jentera di bawah agensi berkenaan. Kerjasama dengan media arus perdana juga sedang dipertingkatkan agar sama-sama membantu dalam usaha ini.

2. Selain dari usaha-usaha diatas, bagi meningkatkan penerimaan vaksinasi kanak-kanak, KKM melaksanakan beberapa pendekatan bagi meningkatkan penerimaan vaksinasi dalam kalangan ibu bapa. Sesi libat urus dengan agensi-agensi pemegang taruh kanak-kanak telah dilaksanakan yang mana Kementerian Pendidikan Malaysia (KPM), JAKIM, Jabatan Kebajikan Masyarakat (JKM), KPN dan KPLB telah bersetuju membantu dalam meningkatkan pendaftaran dan memberi kesedaran kepada ibubapa. Bagi kawasan Lembah Klang, sistem tempahan janjitemu telah diperkenalkan bagi membolehkan ibu bapa membuat pilihan lokasi dan masa untuk anak mereka.

3. Selain itu, KKM juga menjalankan aktiviti promosi dan pendidikan kesihatan yang memaparkan pakar dari pelbagai bidang bagi menjawab persoalan yang ditimbulkan berkenaan vaksinasi COVID-19. Antara kaedah yang digunakan oleh KKM dalam melaksanakan aktiviti promosi ialah:

- Bahan konvensional seperti soalan lazim, poster, banner serta factsheet yang telah diedarkan oleh Jabatan Kesihatan Negeri kepada orang ramai.

SOALAN NO : 61

- Bual bicara berkaitan vaksin COVID-19 melalui televisyen, radio dan sesi live di media sosial.
- Bahan-bahan media baharu seperti video dan infografik yang dimuat naik di media sosial seperti facebook, instagram, twitter, youtube, tiktok.
- Aktiviti promosi melalui laman web seperti MyHealth dan infosihat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : PUAN VIVIAN WONG SHIR YEE
[SANDAKAN]**

TARIKH : 14 MAC 2022 (ISNIN)

SOALAN

PUAN VIVIAN WONG SHIR YEE minta **MENTERI KESIHATAN** menyatakan mengapa Sabah masih kekal sebagai negeri yang mempunyai kadar vaksinasi lengkap yang paling rendah kalangan populasinya dan apakah langkah yang diambil oleh Kementerian untuk menangani kadar vaksinasi rendah ini.

JAWAPAN

Tuan Yang di-Pertua,

1. Sehingga 14 Mac 2022, kadar vaksinasi bagi Program Imunisasi COVID-19 Kebangsaan (PICK) bagi negeri Sabah adalah seperti berikut:

- (i) Seramai 2,087,790 individu dewasa berumur 18 tahun dan ke atas telah menerima vaksin dos lengkap iaitu 78.5% dari keseluruhan populasi dewasa yang layak;
- (ii) Seramai 315,971 remaja telah menerima vaksin dos lengkap iaitu 74.1% dari populasi remaja di Sabah;
- (iii) Seramai 79,500 kanak-kanak berumur 5 hingga di bawah 12 tahun telah menerima vaksin dos pertama mereka iaitu 19.3% dari populasi kanak-kanak; dan

- (iv) Secara keseluruhan , seramai 2,403,761 individu yang layak telah menerima vaksin dos lengkap iaitu 62.6% dari keseluruhan populasi yang layak.

2. Berdasarkan kepada kadar vaksinasi di atas, negeri Sabah masih belum mencapai sasaran yang ditetapkan untuk populasi dewasa, remaja dan keseluruhan populasi yang layak iaitu 90%, 90% dan 80%. Kadar vaksinasi di negeri Sabah ini juga merupakan di antara yang terendah di Malaysia.

3. Pelbagai langkah telah dan sedang dilaksanakan di negeri Sabah bagi mencapai peratusan yang tinggi mengikut sasaran yang ditetapkan termasuk:

- (i) Melaksanakan *Rapid Convenience Monitoring* (RCM) bagi mendapat kadar liputan sebenar di lokaliti setempat dan juga menjalankan *opportunistic vaccination* semasa kajian ini dijalankan;
- (ii) Menambah bilangan Pusat Pemberian Vaksinasi (PPV) terutama PPVGP, PPVHS dan PPV Offsites bagi meningkatkan pemberian vaksin *primary series* bagi individu yang layak termasuk dewasa, remaja dan kanak-kanak serta vaksin dos penggalak;
- (iii) Melaksanakan program *outreach* ke kawasan-kawasan pendalaman dan sukar dicapai terutama bagi golongan terpinggir seperti penduduk yang tinggal di rumah atas laut (“*sea gypsies*” atau kaum Bajau laut dan lain-lain) dan berada di pulau-pulau sekitar negeri Sabah;
- (iv) Menambah bilangan PPV AOV (selepas waktu bekerja), PPV OV (*opportunistic vaccination*) di klinik dan hospital kerajaan; dan
- (v) Menjalankan hebahan dan promosi berterusan melalui media

SOALAN NO : 62

sosial dan media arus perdana dan juga melalui ketua-ketua masyarakat setempat dan pihak pertubuhan bukan kerajaan (NGO).

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 14 MAC 2022 (ISNIN)

SOALAN

TUAN CHA KEE CHIN minta **MENTERI KESIHATAN** menyatakan apakah Kementerian akan mewajibkan vaksinasi COVID-19 untuk kanak-kanak yang berusia 5 hingga 11 tahun, dan sama ada sekolah akan digunakan sebagai pusat vaksinasi untuk mereka kerana ramai murid sekolah rendah di Rasah ditempatkan untuk vaksinasi di PPV yang sejauh 30 km dari tempat tinggal atau sekolah, kenapakah keadaan ini berlaku.

JAWAPAN

Tuan Yang di-Pertua,

1. Pemberian vaksin bagi Kanak-Kanak ini adalah secara **sukarela** dan Ibu bapa perlu memberikan kebenaran bertulis untuk anak divaksinasi. Bagi kanak-kanak yang tidak mengambil suntikan vaksin COVID-19, kanak-kanak tersebut boleh bersekolah seperti biasa namun perlu mengamalkan SOP yang telah ditetapkan di sekolah.

2. Pemberian vaksinasi bagi kanak-kanak berumur 5 - 11 tahun dijalankan di sekolah, klinik kesihatan dan hospital termasuk di fasiliti swasta. Pelaksanaan PICKids di Negeri Sembilan adalah melalui PPV Off-site, PPV Klinik Kesihatan, PPV Hospital, PPV Sekolah dan Pasukan Outreach Sekolah. Negeri Sembilan terdapat 4 buah PPV Sekolah yang

SOALAN NO : 63

akan meliputi 42 sekolah berhampiran dan 20 Pasukan *Outreach* Sekolah yang akan meliputi 96 buah sekolah.

3. Di daerah Seremban yang turut meliputi Rasah, PICKids dilakukan melalui Pasukan *Outreach* Sekolah dan sebuah PPV *Off-site* (di Nilai). Vaksinasi melalui Pasukan *Outreach* Sekolah dilakukan dalam kawasan sekolah manakala vaksinasi melalui PPV *Offsite* dilakukan untuk kanak-kanak yang tinggal atau bersekolah di sekitar dan berhampiran dengan PPV *Offsite* tersebut.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : **LISAN**

DARIPADA : **TUAN SYED SADDIQ BIN SYED
ABDUL RAHMAN [MUAR]**

TARIKH : **14 MAC 2022 (ISNIN)**

SOALAN

TUAN SYED SADDIQ BIN SYED ABDUL RAHMAN minta **MENTERI KESIHATAN** menyatakan laporan perbelanjaan keseluruhan Kementerian sehingga kini untuk pembelian vaksin COVID-19 termasuk perbelanjaan Kementerian untuk booster shot dan suntikan vaksin untuk kanak-kanak. Apa perincian perbelanjaan untuk setiap jenis vaksin, dan syarikat-syarikat yang diberikan kelulusan untuk memperolehi bekalan vaksin.

JAWAPAN

Tuan Yang di-Pertua,

1. Sehingga 18 Februari 2022 itu, KKM telah menempah sebanyak **88.1 juta dos** vaksin dengan anggaran kos berjumlah **RM4.72 bilion** untuk kegunaan populasi dewasa, remaja dan kanak-kanak.
2. Daripada jumlah tersebut, dos vaksin keluaran Pfizer (Malaysia) Sdn. Bhd. yang diperoleh adalah sebanyak **44,799,300 dos** untuk kegunaan populasi dewasa dan remaja, dan **6,600,000 dos** untuk kegunaan kanak-kanak.
3. Perincian perolehan keseluruhan vaksin COVID-19 adalah seperti berikut:

BIL.	PENGELUAR	BIL. DOS	LIPUTAN POPULASI
1.	COVAX Facility AstraZeneca	6.4 juta (2 dos/seorang)	10% (3.2 juta penduduk)
2.	Pfizer & BioNTech (BNT162b2) - Dewasa & Remaja	44.8 juta (2 dos/seorang)	70% (22.4 juta penduduk)
3.	Pfizer & BioNTech (BNT162b2) - Paediatrik	6.6 juta (2 dos/seorang)	10.3% (3.3 juta kanak-kanak)
4.	AstraZeneca / University of Oxford (AZD1222)	6.4 juta (2 dos/seorang)	10% (3.2 juta penduduk)
5.	Sinovac Biotech Ltd./Pharmaniaga Lifescience Sdn. Bhd. (CoronaVac)	20.4 juta (2 dos/seorang)	31.8% (10.2 juta penduduk)
6.	CanSino Biologics Inc. (AD5-nCOV)	3.5 juta (1 dos/seorang)	10.9% (3.5 juta penduduk)
JUMLAH		88.1 juta dos	143.13 % (46.03 juta penduduk dewasa, remaja & kanak- kanak)

4. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam **Prosiding**

**Jawatankuasa Kira-Kira Wang Negara (PAC), Mesyuarat Khas
Parlimen Keempat Belas yang diadakan pada 2 Ogos 2021.**

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN GOBIND SINGH DEO
[PUCHONG]**

TARIKH : 14 MAC 2022 (ISNIN)

SOALAN

TUAN GOBIND SINGH DEO minta **MENTERI KESIHATAN** menyatakan bilangan pegawai perubatan yang telah diambil tindakan di bawah tuduhan mengeluarkan kad vaksin palsu. Nyatakan apakah tindakan tegas yang diambil bagi mengelakkan perkara ini berlaku lagi.

JAWAPAN

Tuan Yang di-Pertua,

1. Kementerian Kesihatan memandang serius terhadap isu berkaitan penjualan sijil palsu COVID-19 dan akan mengambil tindakan yang tegas ke atas pihak yang bertanggungjawab. Untuk makluman Ahli Yang Berhormat, berdasarkan siasatan dan semakan bersama-sama pihak PDRM didapati semua kes yang dikesan adalah melibatkan pelaksanaan vaksinasi berbayar yang dijalankan oleh pihak swasta (*Private Purchase Vaccination*).
2. Dalam hal ini, pengamal perubatan swasta yang terlibat telah memberikan laporan pemberian vaksinasi yang palsu kepada KKM melalui sistem MyVAS bagi tujuan rekod dan pengeluaran sijil vaksinasi. Buat masa ini siasatan masih dijalankan oleh pihak polis dan KKM akan memberikan kerjasama yang sepenuhnya.
3. Mengikut Akta Perubatan (pindaan) 2012 dan Peraturan-peraturan Perubatan (Pindaan) 2017, mana-mana pengamal perubatan yang membuat salah laku tertakluk kepada jenis kesalahan boleh dikenakan hukuman maksimum termasuklah di bawah Seksyen 30(1)(e) iaitu dibuang dari daftar Majlis Perubatan Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN CHOW KON YEOW [TANJONG]

TARIKH : 14 MAC 2022 (ISNIN)

SOALAN

TUAN CHOW KON YEOW [TANJONG] minta **MENTERI SUMBER MANUSIA** menyatakan pendekatan yang diambil bagi menangani masalah guna tenaga mahir membabitkan semua sektor khususnya perindustrian dalam negara kini. Perincikan jumlah graduan mengikut pecahan sektor dan senaraikan juga jumlah kekurangan tenaga mahir bagi setiap sektor di setiap negeri sejak tahun 2018 sehingga kini.

JAWAPAN

Tuan Yang Di Pertua,

Berdasarkan Survei Tenaga Buruh oleh Jabatan Perangkaan Malaysia, peratus penduduk bekerja dalam kategori mahir menurun kepada 27.8% pada suku tahun keempat 2021 berbanding 29.5% pada suku tahun keempat 2020.

Kerajaan melihat isu peluang pekerjaan yang tidak seiring dengan kadar kelayakan akademik terutama terhadap golongan graduan dapat diatasi dengan cara analisa data dan maklumat yang tepat berkaitan keperluan tenaga mahir. Keperluan tenaga mahir tidak terhad kepada jenis dan bidang kemahiran serta kepakaran sahaja tetapi maklumat berkenaan tahap kelayakan serta bilangan yang diperlukan juga perlu diperolehi.

Sehubungan itu, Kerajaan melalui Talent Corporation Malaysia Berhad giat memberi penekanan kepada peningkatan kebolehpasaran graduan dengan mengaplikasikan penggunaan Senarai Pekerjaan Kritikal bertujuan untuk:

- i. mengenalpasti kemahiran-kemahiran dan pekerjaan-pekerjaan yang sukar dipenuhi merangkumi keperluan tenaga kerja mahir dan separa mahir merentasi sektor-sektor utama negara;
- ii. digunakan sebagai instrumen dalam membantu meningkatkan kebolehpasaran graduan; dan
- iii. mengimbangi penawaran dan permintaan dalam pasaran tenaga kerja.

Selain itu, Jabatan Pembangunan Kemahiran melaksanakan Sistem Latihan Dual Nasional berkonsepkan *Work-Based Learning* dengan izin . Ia merupakan pembelajaran dalam persekitaran kerja sebenar melalui kemahiran *hands-on* kepada aktiviti kerja di syarikat. Latihan ini membabitkan dua situasi pembelajaran iaitu 70 hingga 80 peratus latihan praktikal di syarikat dan 20 hingga 30 peratus latihan teori di Pusat Latihan.

Di samping itu, Sistem Latihan Dual Nasional ini menjadi platform komprehensif kepada mahasiswa yang berhasrat mengembangkan kepakaran melalui perolehan kemahiran teknikal, sosial dan kemanusiaan melalui sosialisasi di tempat kerja sebenar. Program ini turut menawarkan prospek kerjaya menarik yang merangkumi bidang pekerjaan utama di Malaysia berasaskan Standard Kemahiran Pekerjaan Kebangsaan yang menggariskan kompetensi atau kemahiran diperlukan bagi pekerjaan mengikut sektor.

Tuan Yang Di Pertua,

Perincikan jumlah graduan mengikut pecahan sektor dan senaraikan juga jumlah kekurangan tenaga mahir bagi setiap sektor di setiap negeri sejak tahun 2018 sehingga kini adalah seperti berikut:

- i. Statistik Siswazah 2020 pula oleh Jabatan Perangkaan Malaysia melaporkan jumlah siswazah bekerja dalam **sektor pertanian** pada tahun 2018 ialah seramai 55.2 ribu orang, tahun 2019 seramai 55.9 ribu orang manakala tahun 2020 seramai 77.8 ribu orang.
- ii. Jumlah siswazah bekerja dalam **sektor perlombongan dan pengkuarian** pada tahun 2018 ialah seramai 41.0 ribu orang, tahun 2019 seramai 42.0 ribu orang manakala tahun 2020 seramai 44.6 ribu orang.

SOALAN NO : 66

- iii. Jumlah siswazah bekerja dalam **sektor pembuatan** pada tahun 2018 ialah seramai 486.6 ribu orang, tahun 2019 seramai 522.6 ribu orang manakala tahun 2020 seramai 637.5 ribu orang.
- iv. Jumlah siswazah bekerja dalam **sektor pembinaan** pada tahun 2018 ialah seramai 207.5 ribu orang, tahun 2019 seramai 219.4 ribu orang manakala tahun 2020 seramai 228.0 ribu orang.
- v. Jumlah siswazah bekerja dalam **sektor perkhidmatan** pada tahun 2018 ialah seramai 3,111,000 orang, tahun 2019 seramai 3,280,900 orang manakala tahun 2020 seramai 3,365,200 orang.
- vi. Berdasarkan Statistik Guna Tenaga oleh Jabatan Perangkaan Malaysia, **kekosongan jawatan bagi kategori mahir** pada tahun 2018 ialah sebanyak 47.2 ribu jawatan, tahun 2019 sebanyak 48.3 ribu jawatan, tahun 2020 sebanyak 40.5 ribu jawatan manakala tahun 2021 sebanyak 42.9 ribu jawatan.

**Cadangan Jawapan kepada Pertanyaan Lisan Dewan Rakyat pada
14 Mac 2022 daripada Tuan Chow Kon Yeow [Tanjong]**

DIPERSETUJUI / TIDAK DIPERSETUJUI

.....

(A. MANIAM)

Timbalan Ketua Setiausaha (Dasar dan Antarabangsa)

Kementerian Sumber Manusia

Tarikh: Mac 2022

DILULUSKAN / TIDAK DILULUSKAN

.....

(DATUK MUHD KHAIR RAZMAN BIN MOHAMED ANNUAR)

Timbalan Ketua Setiausaha (Operasi)

Kementerian Sumber Manusia

[Menjalankan Tugas Ketua Setiausaha]

Tarikh: Mac 2022

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI SHAMSUL ISKANDAR @ YUSRE
BIN MOHD AKIN [HANG TUAH JAYA]**

TARIKH : 14.03.2022 (ISNIN)

SOALAN

Datuk Seri Shamsul Iskandar @ Yusre bin Mohd Akin [Hang Tuah Jaya] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan strategi dan perancangan Kementerian selepas tamatnya Skim Harga Maksimum Keluarga Malaysia (SHMKM) berikutan kenaikan harga mendadak harga barangan dan punca kenaikan harga ayam mempunyai kaitan langsung dengan harga dedak yang meningkat dan tiadanya kawalan harga.

JAWAPAN:

Yang di-Pertua,

Kerajaan telah melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : DR. AZMAN BIN ISMAIL [KUALA KEDAH]

TARIKH : 14 MAC 2022 (ISNIN)

SOALAN

DR. AZMAN BIN ISMAIL [KUALA KEDAH] minta **MENTERI SUMBER MANUSIA** menyatakan langkah-langkah yang sedang diambil oleh Kementerian untuk meningkatkan jumlah keahlian kesatuan sekerja dari 6% jumlah pekerja kepada 30%. Apakah pencapaian usaha ini setakat ini.

JAWAPAN

Tuan Yang Di Pertua,

Kementerian Sumber Manusia melalui Jabatan Hal Ehwal Kesatuan Sekerja memainkan peranan yang penting dalam menyelia, memantau dan mengawal hal ehwal kesatuan sekerja di Malaysia. Bagi memberi kesedaran dan pendedahan mengenai kesatuan sekerja, kerajaan sentiasa melengkapkan pengetahuan pihak-pihak yang berkepentingan termasuk pemegang taruh, warga industri, para akademik dan pelajar dengan pengetahuan dan maklumat mengenai kesatuan sekerja dan amalan berkesatuan di Malaysia.

Jadual 1:

Bilangan Kesatuan Sekerja dan Keahlian Bagi Tempoh 2017-2021

TAHUN	BILANGAN KESATUAN	KEAHLIAN
2017	742	929,232
2018	751	930,734
2019	762	948,772
2020	770	956,542
2021	747	940,914

Tren bilangan kesatuan sekerja dalam tempoh lima (5) tahun iaitu mulai 2017 hingga 2020 menunjukkan peningkatan tetapi secara perlahan begitu juga dengan bilangan keahlian pekerja dalam kesatuan. Namun, bilangan kesatuan dan keahlian mula menunjukkan penurunan pada tahun 2021 berikutan kesan pandemik COVID-19 yang masih belum berakhir.

Langkah-langkah yang diambil oleh Kementerian melalui Jabatan Hal Ehwal Kesatuan Sekerja untuk meningkatkan jumlah keahlian kesatuan sekerja adalah dengan memberi pendedahan yang berterusan mengenai peranan dan faedah berkesatuan kepada pihak yang akan memasuki alam pekerjaan dan juga pekerja-pekerja yang masih belum menjadi ahli kesatuan sekerja. Selain itu, Kerajaan juga menyediakan pelbagai platform latihan dan dana untuk kesatuan meningkatkan pengetahuan dan kemahiran ahli-ahlinya. Antara program-program yang dilaksanakan adalah:

SOALAN NO : 68

- i. Program Kesedaran Berkesatuan Bersama Graduan dan Pelajar;
- ii. Program *Outreach* Bersama Pekerja, Kesatuan Sekerja, Pelajar, Pelatih dan Mahasiswa;
- iii. Kursus Pengurusan Kesatuan Sekerja;
- iv. Seminar *Labour Enrichment and Professionalisme (LEAP)*; dan
- v. Penganugerahan Geran Pembangunan Kesatuan Sekerja (GPKS).

Kerajaan juga sedang dalam tindakan meminda Akta Kesatuan Sekerja 1959 (Akta 262) yang mana di dalam cadangan pindaan ini akan membuka ruang kepada kepelbagaian penubuhan kesatuan sekerja (*multiplicity*) di Malaysia. Dengan pindaan ini nanti adalah dijangka akan meningkatkan penubuhan kesatuan sekerja di Malaysia dan secara tidak langsung akan meningkatkan bilangan keahlian dan penglibatan pekerja-pekerja dalam kesatuan sekerja.

Cadangan Jawapan kepada Pertanyaan Lisan Dewan Rakyat pada
14 Mac 2022 daripada Dr. Azman Bin Ismail [Kuala Kedah]

DIPERSETUJUI / TIDAK DIPERSETUJUI

.....

(A. MANIAM)

Timbalan Ketua Setiausaha (Dasar dan Antarabangsa)
Kementerian Sumber Manusia

Tarikh: Februari 2022

DILULUSKAN / TIDAK DILULUSKAN

.....

(DATUK MUHD KHAIR RAZMAN BIN MOHAMED ANNUAR)

Timbalan Ketua Setiausaha (Operasi)
Kementerian Sumber Manusia
[Menjalankan Tugas Ketua Setiausaha]

Tarikh: Februari 2022

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DR. LEE BOON CHYE [GOPENG]

TARIKH : 14 MAC 2022 (ISNIN)

SOALAN

DR. LEE BOON CHYE minta **MENTERI KESIHATAN** menyatakan berapa jumlah AEFI atau kesan sampingan vaksinasi COVID-19.

JAWAPAN

Tuan Yang di-Pertua,

1. Seperti vaksin dan ubat-ubatan lain, vaksin COVID-19 juga boleh menyebabkan kesan sampingan. Walau bagaimanapun, kebanyakan kesan sampingan yang dilaporkan adalah ringan dan sederhana seperti sakit di tempat suntikan, demam, pening serta keletihan dan biasanya akan pulih dalam masa beberapa hari.
2. Sehingga 4 Mac 2022, Sistem Pelaporan AEFI NPRA telah menerima sejumlah 25,610 laporan AEFI vaksin COVID-19 yang perlu dinilai, termasuk 1,355 laporan melibatkan penerima dos penggalak dan 141 laporan bagi penerima vaksin kanak-kanak berusia 5 hingga 11 tahun. Kadar pelaporan AEFI melalui Sistem AEFI NPRA ini secara keseluruhannya direkodkan pada 379 laporan bagi setiap sejuta dos.
3. Hasil penilaian ke atas laporan yang diterima, 93% atau 23,835 daripada AEFI yang dilaporkan adalah bagi kes-kes yang tidak serius. Demam, sakit pada tempat suntikan, sakit kepala, sakit otot dan keletihan

merupakan antara kesan advers yang paling kerap dilaporkan oleh penerima vaksin. Kesan-kesan ini biasanya akan pulih dalam masa satu hingga dua hari.

4. Daripada jumlah keseluruhan laporan AEFI yang diterima, terdapat 1,775 laporan (bersamaan kadar 26 laporan bagi setiap sejuta dos) yang dikategorikan sebagai AEFI serius berdasarkan klasifikasi Pertubuhan Kesihatan Sedunia (WHO), iaitu merujuk kepada kesan yang menyebabkan kemasukan ke dalam wad atau pemanjangan tempoh di wad, membahayakan nyawa, menyebabkan kehilangan upaya yang signifikan atau memerlukan intervensi untuk mencegah kerosakan kekal tubuh, menyebabkan kecacatan semasa lahir, atau disyaki menyebabkan kematian.

5. Walau bagaimanapun, perlu diingatkan bahawa statistik yang dinyatakan adalah berdasarkan jumlah laporan AEFI yang DITERIMA di mana hubungkait kesan advers dengan vaksin masih belum lagi dinilai dan disahkan. Untuk makluman, NPRA menerima semua jenis laporan AEFI yang disyaki atau berkemungkinan disebabkan vaksin. Untuk maklumat lanjut, *Summary Report on AEFIs of COVID-19 Vaccines* boleh dicapai di laman sesawang rasmi NPRA melalui link www.npra.gov.my.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : DATUK SERI MOHD REDZUAN MD YUSOF
[ALOR GAJAH]**

TARIKH : 14 MAC 2022 (ISNIN)

SOALAN

DATUK SERI MOHD REDZUAN MD YUSOF [ALOR GAJAH] minta **MENTERI SUMBER MANUSIA** menyatakan secara terperinci perancangan kerajaan bagi kedudukan sumber pencarian rakyat sekiranya semua syarikat telah menerapkan digitalisasi di dalam operasi harian dan tidak memerlukan tenaga kerja.

JAWAPAN

Tuan Yang Di-Pertua,

Transformasi digital merupakan satu proses mengautomasikan proses kerja bagi meningkatkan produktiviti, kecekapan serta mengurangkan kesan hazard pekerjaan khususnya yang melibatkan kerja rutin dan 3D (*Dirty, Difficult and Dangerous*) **dengan izin.**

Dalam hal ini, ianya boleh meningkatkan kos perubatan serta penurunan prestasi apabila bekerja dalam tempoh masa yang panjang. Oleh itu, apabila kerja rutin ini melalui proses pendigitalan, sumber tenaga kerja sedia ada boleh ditempatkan ke bahagian lain yang lebih bersesuaian.

Pelaksanaan pendigitalan dan penggunaan teknologi terkini di bawah inisiatif **Dasar Industry4WRD** akan menambah bilangan pekerja mahir di negara ini terutamanya di sektor pembuatan.

Manakala, di bawah **Rangka Tindakan Ekonomi Digital Malaysia** yang dilancarkan pada Februari 2020 menyasarkan sebanyak 500,000 peluang pekerjaan baru berteknologi tinggi akan diwujudkan oleh pihak industri seiring dengan peningkatan literasi digital. Peluang pekerjaan dengan pendapatan tinggi ini akan meningkatkan ekonomi dan kesejahteraan sosial rakyat di negara ini.

Sektor peruncitan mempunyai potensi teknikal yang tinggi untuk penggunaan digitalisasi dan automasi. Dianggarkan bahawa 53 peratus daripada aktiviti nya boleh dibuat secara automatik.

Melalui digitalisasi, peruncit boleh memanfaatkan pengurusan stok yang cekap dan dipacu teknologi contohnya dalam aktiviti pembungkusan produk untuk penghantaran dan pengurusan stok barangan. Data digitalisasi mampu mengurus rekod jualan, mengumpul maklumat pelanggan atau produk, dan aktiviti lain.

SOALAN NO : 70

Teknologi boleh mengajar robot untuk berfikir, menulis, melukis seperti manusia tetapi kita harus diingat, sifat semula jadi manusia tetap tidak boleh dilakukan oleh robot.

Walaupun pada dasarnya pekerjaan yang sebelum ini dilakukan secara berulang seperti pembungkusan akan digantikan dengan robot tetapi perkara yang melibatkan kreativiti dan inovasi masih memerlukan manusia untuk berfikir dan mencipta sesuatu.

Selari dengan perubahan industri yang menuju ke arah revolusi perindustrian 4.0 yang melibatkan transformasi digital, Kerajaan menerusi Jabatan Tenaga Manusia telah merangka pelbagai strategi untuk memastikan kursus-kursus TVET yang ditawarkan dapat memenuhi keperluan industri semasa dan akan datang.

Pelbagai program peningkatan kemahiran dan latihan semula ada ditawarkan untuk melatih tenaga kerja sedia ada khususnya yang terlibat dengan penempatan pekerjaan dalam bidang baharu.

Dalam masa yang sama, Jabatan Tenaga Manusia sedang aktif meningkatkan kemahiran dan kompetensi tenaga pengajar Institut Latihan Jabatan Tenaga Manusia dalam bidang berkaitan pendigitalan seperti:

- i. Keselamatan Siber (*cybersecurity*),
- ii. Teknologi Pembuatan Termaju (*Advanced Manufacturing*),
- iii. Teknologi Nano (*Nanotechnology*),
- iv. Teknologi realiti terimbuh (*Augmented Reality*) dan;
- v. Realiti Maya (*Virtual Reality*)

Pusat Latihan Pengajar dan Kemahiran Lanjutan juga sedang melaksanakan dua Projek Revolusi Industri Ke-4 di bawah Peruntukan RMKe-12 kepada Jurulatih *Training of Trainers* **dengan izin.**

Kedua projek ini dilaksanakan di bawah inisiatif Dasar Industry4WRD dan Latihan Peningkatan Kemahiran Teknologi Baru Muncul, Rentas Disiplin & Kemahiran Sosial Masa Depan (*New Emerging Technology, Cross Discipline & Future Social Skills*) kepada Pengajar TVET bagi memastikan mereka memperoleh kemahiran tinggi dan berkualiti dalam melaksanakan latihan TVET, dan dapat melahirkan tenaga kerja mahir negara yang memenuhi keperluan industri berteknologi tinggi.

Kesimpulannya, penerapan digitalisasi atau automasi ini tidak akan dapat menggantikan tenaga manusia. Bagi sektor perkhidmatan khususnya yang banyak melibatkan perkara yang subjektif untuk membuat keputusan, tenaga kerja manusia masih diperlukan dalam peratusan yang tinggi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB DATUK SERI TIONG KING SING (BINTULU)

TARIKH : 14 MAC 2022 (ISNIN)

SOALAN

DATO' SERI TIONG KING SING (BINTULU) minta **MENTERI DALAM NEGERI**

menyatakan :-

(a) apakah rancangan Kementerian untuk naik taraf bangunan Jabatan Pendaftaran Negara Bahagian Bintulu dalam masa terdekat ini; dan

(b) adakah Kementerian akan menambah banyak lagi keanggotaan JPN Bintulu (25 masa kini) bagi menampung keperluan seluruh Bahagian Bintulu memandangkan urusan Kad Pengenalan Diri hanya boleh diuruskan di JPN Bintulu

JAWAPAN

Tuan Yang Di Pertua,

a) Untuk makluman Ahli Yang Berhormat, pada masa ini, pejabat Jabatan Pendaftaran Negara (JPN) Bintulu beroperasi di Pejabat Persekutuan Negeri Sarawak, Bintulu dengan perjawatan seramai 20 orang. Perkhidmatan pejabat JPN Bintulu masih mampu menampung keperluan daerah tersebut. Pejabat sedia ada amat mudah untuk diakses oleh orang awam yang memerlukan perkhidmatan JPN dan pejabat tersebut juga merupakan hub pusat cetak. Pihak JPN juga sering mengadakan Program Menyemai Kasih Rakyat (MEKAR) yang bergerak secara mobile bagi menyampaikan perkhidmatan JPN kepada masyarakat luar bandar di daerah Bintulu.

Sehubungan itu, berdasarkan keperluan semasa, Kementerian Dalam Negeri (KDN) tiada perancangan untuk membesarkan pejabat JPN tersebut. Walau bagaimanapun, KDN dalam proses membina sebuah pejabat JPN di Daerah Mukah yang dijangka siap pada tahun 2023. KDN melalui JPN sentiasa proaktif dalam memastikan penyampaian perkhidmatan kepada rakyat di tahap optimum dengan meneliti lokasi yang bersesuaian jika terdapat keperluan pada masa hadapan tertakluk kepada kelulusan Kerajaan.

b) JPN akan melaksanakan pengisian kekosongan jawatan melalui urusan lantikan pegawai baharu pada penghujung Februari 2022. Seramai 30 orang Pembantu Pendaftaran Gred KP19 akan melaporkan diri di JPN

SOALAN : 71

Sarawak melalui urusan pengisian ini. Penempatan dan agihan pengisian pegawai lantikan baharu ini akan dilaksanakan oleh JPN Sarawak berdasarkan kekosongan dan keperluan bahagian-bahagian di seluruh Negeri Sarawak.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA HAJAH
AZIZAH BINTI DATUK SERI
PANGLIMA HAJI MOHD DUN
[BEAUFORT]**

TARIKH : 14 MAC 2022 (ISNIN)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN** minta **MENTERI KESIHATAN**
menyatakan apakah strategi Kementerian bagi menggalakkan
penerimaan vaksin/booster terutama di kalangan 'vaccine hesitant'.

JAWAPAN

Tuan Yang di-Pertua,

1. Kementerian Kesihatan telah menubuhkan Jawatankuasa Komunikasi Strategik bagi memperkukuhkan aktiviti penyampaian maklumat kepada komuniti tentang keperluan mengambil vaksin dan dos penggalak ini. Melalui Jawatankuasa ini, kerjasama telah dijalankan dengan lain-lain agensi seperti Kementerian Perpaduan Negara (KPN), Kementerian Pembangunan Luar Bandar (KPLB), Suruhanjaya Komunikasi dan Multimedia bagi mendekatkan komuniti dengan maklumat jelas dan tepat berkaitan kepentingan, keberkesanan dan keselamatan vaksin serta dos penggalak, melalui jentera-jentera di bawah agensi berkenaan. Kerjasama dengan media arus perdana juga sedang dipertingkatkan agar sama-sama membantu dalam usaha ini.

SOALAN NO : 72

2. Selain itu, KKM juga menjalankan aktiviti promosi dan pendidikan kesihatan yang memaparkan pakar dari pelbagai bidang bagi menjawab persoalan yang ditimbulkan berkenaan vaksinasi COVID-19
3. Antara kaedah yang digunakan oleh KKM dalam melaksanakan aktiviti promosi ialah:
 - (i) Bahan konvensional seperti soalan lazim, poster, banner serta factsheet yang telah diedarkan oleh Jabatan Kesihatan Negeri kepada orang ramai.
 - (ii) Bual bicara berkaitan vaksin COVID-19 melalui televisyen, radio dan sesi live di media sosial.
 - (iii) Bahan-bahan media baharu seperti video dan infografik yang dimuat naik di media sosial seperti facebook, instagram, twitter, youtube, tiktok.
 - (iv) Aktiviti promosi melalui laman web seperti MyHealth dan infosihat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' SRI HAJAH ROHANI BINTI
HAJI ABDUL KARIM [BATANG
LUPAR]**

TARIKH : 14 MAC 2022 (ISNIN)

SOALAN

DATO' SRI HAJAH ROHANI BINTI HAJI ABDUL KARIM minta **MENTERI KESIHATAN** menyatakan pendirian Kerajaan terhadap kanak-kanak yang tidak dibenarkan divaksinasi oleh ibu bapa. Adakah hak mereka dalam mendapatkan pendidikan di sekolah akan disekat.

JAWAPAN

Tuan Yang di-Pertua,

1. Pemberian vaksin bagi kanak-kanak berusia 5 hingga 11 tahun adalah secara **sukarela**. Ibu bapa perlu memberikan kebenaran bertulis untuk anak divaksinasi.
2. Manakala, bagi kanak-kanak yang tidak mengambil suntikan vaksin COVID-19, kanak-kanak tersebut tetap boleh bersekolah seperti biasa namun perlu mengamalkan SOP yang telah ditetapkan oleh Kementerian Pendidikan Malaysia (KPM).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : TUAN WONG KAH WOH [IPOH TIMUR]

TARIKH : 14 MAC 2022 (ISNIN)

SOALAN

TUAN WONG KAH WOH [IPOH TIMUR] minta **MENTERI SUMBER MANUSIA** menyatakan berapa wang daripada jumlah RM45 bilion peruntukan tambahan yang diumumkan pada November 2021 telah digunakan untuk tujuan pembiayaan Program Subsidi Upah (PSU).

JAWAPAN

Tuan Yang Di-Pertua

Pada 11 Oktober 2021, Rang Undang-Undang Langkah-Langkah Sementara bagi Pembiayaan Kerajaan (Penyakit Koronavirus 2019 (COVID-19)) (Pindaan) diluluskan untuk meningkatkan peruntukan di bawah dana Kumpulan Wang Covid-19 (KWC) sebanyak RM45 bilion daripada RM65 bilion kepada RM110 bilion. Pindaan ini akan membiayai perbelanjaan tambahan KWC-19 yang berjumlah RM45 bilion **untuk membiayai pakej bantuan pelbagai program memerangi wabak itu sejak awal tahun 2021 serta projek Rancangan Malaysia Ke-12.**

Daripada jumlah pembiayaan perbelanjaan tambahan tersebut, sebanyak RM12.7 bilion adalah untuk menampung peruntukan tambahan Program Subsidi Upah daripada RM18.3 bilion kepada RM31 bilion melalui Belanjawan 2021 dan beberapa pakej rangsangan ekonomi iaitu PERMAI, PEMERKASA, PEMERKASA + dan PEMULIH. Pada tahun 2021, Kerajaan telah memperuntukkan sebanyak RM8.01 bilion untuk PSU3.0 dan PSU4.0. Manakala bagi PSU1.0 dan PSU2.0 pada tahun 2020 telah diperuntukkan sebanyak RM15.3 bilion.

Kerajaan dalam Bajet 2022 telah memperuntukkan sebanyak RM600 juta bagi melaksana dan melanjutkan PSU5.0 atau Program SIP Subsidi Upah Bersasar. PSU5.0 adalah bersasar untuk sektor pelancongan yang masih terjejas akibat pandemik COVID-19.

SOALAN NO: 74

Berdasarkan rekod statistik PERKESO sehingga 13 Februari 2022, jumlah keseluruhan majikan yang terlibat dengan PSU1.0 sehingga PSU5.0 adalah sebanyak 357 ribu majikan dan melibatkan 2.95 juta pekerja dengan bayaran sebanyak RM20.19 bilion. Bagi permohonan PSU5.0 yang telah dibuka permohonannya bermula 1 Januari 2022, sebanyak 3,189 permohonan telah diterima yang melibatkan 56,909 pekerja. Kerajaan melalui PERKESO telah menyalurkan sebanyak RM 14.6 juta kepada majikan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' RAMLI BIN DATO' MOHD NOR
(CAMERON HIGHLAND)**

TARIKH : 14.3.2022 (ISNIN)

SOALAN

DATO' RAMLI BIN DATO' MOHD NOR (CAMERON HIGHLAND) minta **MENTERI PEMBANGUNAN LUAR BANDAR** menyatakan adalah pihak Kementerian bercadang untuk melihat semula syarat-syarat untuk kontraktor pengangkutan yang membawa murid-murid Orang Asli di negara ini supaya ianya dipermudahkan.

JAWAPAN

Tuan Yang di-Pertua,

Kementerian Pembangunan Luar Bandar (KPLB) melalui Jabatan Kemajuan Orang Asli (JAKOA) komited dalam memastikan bantuan pendidikan kepada anak-anak Orang Asli terus menjadi agenda utama.

Isu laluan dan lokasi pengangkutan sekolah murid Orang Asli yang berbeza mengikut lokasi, bentuk muka bumi, keadaan jalan, jenis kenderaan yang tidak bersesuaian dan mempunyai risiko yang berbeza menyebabkan penyedia perkhidmatan pengangkutan tidak berminat untuk menyertai sebutharga / tender Jabatan. Sehubungan itu, KPLB melalui JAKOA telah mengangkat beberapa cadangan kaedah perolehan kepada Kementerian Kewangan untuk memudahkan syarat-syarat kontraktor pengangkutan yang membawa murid-murid Orang Asli di Negara ini.

Di antara cadangan kaedah perolehan yang dicadangkan adalah melaksanakan perolehan secara lantikan terus sekiranya sebutharga/tender terbuka kali pertama gagal disebabkan hanya satu pembekal sahaja yang berminat namun tertakluk kepada peruntukan dan rundingan harga yang menguntungkan Kerajaan. Cadangan perlaksanaan bayaran minima kepada pengusaha pengangkutan sebanyak 30% dari nilai kontrak bulanan bagi setiap laluan yang mengalami pengurangan jumlah murid bagi menampung kos operasi yang tinggi.

KPLB melalui JAKOA juga memohon beberapa pengecualian kepada pengusaha pengangkutan di kalangan Orang Asli, seperti pengecualian berdaftar dengan Kementerian Kewangan dan/atau Suruhanjaya Syarikat Malaysia, dikecualikan daripada Tatacara Rundingan Harga yang berkuatkuasa dan pengecualian dari mengenakan Bon Pelaksanaan.

Sekian, terima kasih

PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS

PERTANYAAN : LISAN

DARIPADA : PUAN RUSNAH BINTI ALUAI
[TANGGA BATU]

TARIKH : 14 MAC 2022 (ISNIN)

SOALAN

PUAN RUSNAH BINTI ALUAI minta **MENTERI KESIHATAN** menyatakan apakah strategi pelan tindak balas yang dilancarkan oleh Kementerian bagi menangani kes bunuh diri yang semakin meningkat di Malaysia berdasarkan *National Suicide Policy*.

JAWAPAN

Tuan Yang di-Pertua,

1. Kementerian Kesihatan Malaysia amat menyedari tentang peningkatan kejadian bunuh diri dalam kalangan rakyat. Walau bagaimanapun, tiada *National Suicide Policy* seperti yang dinyatakan oleh Ahli Yang Berhormat. Namun, KKM telah membangunkan **Pelan Strategik Kebangsaan Kesihatan Mental (2020-2025)** yang antara lainnya memfokuskan untuk menangani tingkah laku bunuh diri.
2. Dalam pelan strategik ini, kerjasama pintar (*smart partnership*) antara agensi kerajaan, swasta dan NGO bagi mempromosikan kesihatan mental kepada kumpulan sasar juga diberi penekanan. Ini termasuk usaha bagi meningkatkan akses kepada perkhidmatan kesihatan mental, menambahbaik kesiapsiagaan kesihatan mental dalam menghadapi kecemasan, krisis dan bencana termasuklah Kempen **Let's TALK Minda Sihat** yang dilaksanakan bagi menangani stigma terhadap kesihatan

mental dan penyakit mental.

3. Inisiatif KKM dalam melantik seramai 200 orang Pegawai Psikologi (Kaunseling) Kontrak pada Ogos 2020 juga sangat membantu dalam menangani isu kesihatan mental dan tingkah laku bunuh diri. Pegawai-pegawai ini bertugas :

- (i) melaksanakan sesi kaunseling kepada klien yang dikenal pasti mengalami masalah kesihatan mental dan memerlukan intervensi awal;
- (ii) melaksanakan intervensi kepada individu dan keluarga yang terjejas kesihatan mental akibat pelbagai faktor psikososial seperti keganasan rumah tangga, penderaan, penagihan serta penyalahgunaan substans;
- (iii) melaksanakan sesi kaunseling kepada individu yang berpenyakit kronik yang juga mengalami tanda-tanda awal keresahan dan kemurungan;
- (iv) menjadi penyelarass di peringkat daerah untuk perkhidmatan kesihatan mental dan psikososial (MHPSS); dan
- (v) sebagai *Liaison Officer* dalam memudahkan sesi libat urus bersama kementerian, agensi dan NGO di dalam pelaksanaan aktiviti advokasi bagi mencegah tingkah laku bunuh diri di peringkat komuniti.

4. Selain itu, KKM juga telah mewujudkan **Majlis Penasihat Promosi Kesihatan Mental** dan **Kumpulan Kerja Teknikal Pencegahan Bunuh Diri Kebangsaan** yang dianggotai pakar-pakar kesihatan mental dan pihak berkepentingan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT**

PERTANYAAN : JAWAB LISAN

**DARIPADA : TUAN JUGAH ANAK MUYANG @
TAMBAT [LUBOK ANTU]**

TARIKH : 14 MAC 2022 (ISNIN)

SOALAN

TUAN JUGAH ANAK MUYANG @ TAMBAT [LUBOK ANTU] minta **MENTERI SUMBER MANUSIA** menyatakan adakah pihak Kementerian merasakan ianya adalah wajar untuk menggubal semula paras gaji minima di Semenanjung Malaysia serta Sabah dan Sarawak seiring dengan peningkatan kos sara hidup pada masa kini.

JAWAPAN

Tuan Yang di-Pertua,

Di bawah Seksyen 25(1), Akta Majlis Perundingan Gaji Negara 2011 [Akta 732], Majlis dikehendaki mengkaji semula perintah gaji minimum sekurang-kurangnya sekali dalam tiap-tiap dua tahun. Dalam hal ini, Perintah Gaji Minimum semasa telah dikaji dan Kerajaan dalam proses menggubal semula Perintah Gaji Minimum.

Kajian semula PGM yang dilaksanakan adalah seiring dengan kos sara hidup pada masa kini di Semenanjung Malaysia, Sabah dan Sarawak. Dalam menetapkan kadar gaji minimum, kos sara hidup diukur melalui indikator perubahan Indeks Harga Pengguna (CPI). Indikator-indikator sosioekonomi lain yang digunapakai dalam formula penetapan gaji minimum termasuk Pendapatan Garis Kemiskinan, penengah gaji (keupayaan majikan membayar gaji pekerja), pertumbuhan produktiviti buruh, dan kadar pengangguran.

Selain formula gaji minimum, Majlis Perundingan Gaji Negara turut menggunakan pendekatan seimbang (*balanced approach*) dengan mengambil kira kepentingan pihak majikan, pekerja dan kerajaan dalam penetapan gaji minimum. Pendekatan ini penting agar majikan mampu melaksanakan kadar gaji minimum yang baharu dan pekerja dapat mengekalkan pekerjaan. Melalui pendekatan ini Kerajaan percaya daya saing negara dapat dikekalkan di peringkat domestik dan antarabangsa dalam merealisasikan hasrat Kerajaan untuk menjadi negara berpendapatan tinggi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ABD RAHIM BIN BAKRI (KUDAT)

TARIKH : 17 MAC 2022 (KHAMIS)

SOALAN

DATUK ABD RAHIM BIN BAKRI (KUDAT) minta **MENTERI PERUMAHAN DAN KERAJAAN TEMPATAN** menyatakan bilakah Projek Balai Bomba Daerah Pitas dikomisionkan kerana sehingga kini belum kelihatan siap sepenuhnya.

JAWAPAN

Tuan Yang di-Pertua,

Untuk makluman Ahli Yang Berhormat, Projek Balai Bomba dan Penyelamat (BBP) Pitas ini telah diluluskan di bawah Rancangan Malaysia Kesepuluh (RMKe-10), *Rolling Plan* Kelima (RP5) Tahun 2015. Kontrak asal bagi projek pembinaan ini bermula pada 21 Disember 2016 dan tarikh siap asal mengikut kontrak adalah pada 20 Jun 2018. Namun, ekoran prestasi kerja yang kurang memuaskan di pihak kontraktor, perkara ini telah dibentangkan dalam Mesyuarat *Contract Coordination Panel* (CCP) pada awal September 2019. Selanjutnya, Notis Penamatan Pengambilan Kerja Kontraktor telah dikeluarkan pada awal Oktober 2019 dengan status kemajuan fizikal sebanyak 74.14%.

Susulan penamatan tersebut, Kementerian Perumahan dan Kerajaan Tempatan (KPKT) telah melaksanakan proses perolehan secara tender terbuka pra-kelayakan bagi lantikan kontraktor penyelamat pada 2 Mac 2020 (tarikh iklan). Walau bagaimanapun, didapati tiada petender yang melepasi syarat-syarat tender yang telah ditetapkan.

Oleh yang demikian, bagi memastikan projek ini dapat disiapkan segera agar perkhidmatan kebombaanan di kawasan Pitas dapat diberikan secara optimum, Kementerian ini telah membuat perolehan semula. Keputusan penilaian tender telah diperolehi dan akan dibentangkan dalam Mesyuarat Lembaga Pemutus KPKT pada bulan Mac 2022. Kontraktor penyelamat dijangka akan mula memasuki tapak pada bulan April 2022 dan projek ini dijangka siap sepenuhnya pada bulan Oktober 2022.

Untuk makluman Ahli Yang Berhormat juga, kawasan Pitas telah mendapat khidmat perlindungan kebakaran daripada BBP Kota Marudu yang terletak kira-kira 50 kilometer dan mengambil masa 1 jam 15 minit untuk sampai. Selain itu, terdapat juga bantuan daripada Pasukan Bomba Sukarela (PBS) yang berdekatan iaitu PBS Daerah Pitas yang mempunyai kekuatan keanggotaan seramai 20 orang ahli dan telah dibekalkan dengan kelengkapan peralatan perlindungan diri (PPE) dan peralatan pemadaman oleh JBPM Negeri Sabah.

SOALAN NO: 79

Bagi meningkatkan aspek keselamatan kebakaran di kawasan Pitas, Kementerian melalui JBPM telah merancang untuk memperluaskan penubuhan Bomba Komuniti yang akan dilengkapi dengan pengetahuan mengenai pencegahan kebakaran, latihan kebombaan serta dibekalkan dengan peralatan asas kawalan awal kebakaran seperti alat pemadam api. Pasukan Bomba Komuniti ini akan bertindak sebagai pasukan tindak balas awal kecemasan (*first responder*) sementara menunggu ketibaan anggota bomba dari balai yang berhampiran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN AHMAD FADHLI BIN SHAARI
(PASIR MAS)**

TARIKH : 14 MAC 2022 (ISNIN)

SOALAN

TUAN AHMAD FADHLI BIN SHAARI (PASIR MAS) minta **MENTERI PERUMAHAN DAN KERAJAAN TEMPATAN** menyatakan status kajian berhubung banjir dan kawalan banjir dan sejauh mana hasil kajian ini diintegrasikan serta digunakan dalam perancangan bandar-bandar baru dan sedia ada terutamanya di bandar-bandar tumpuan di ibu kota.

JAWAPAN

Tuan Yang di-Pertua,

Untuk makluman Ahli Yang Berhormat, kajian berhubung banjir dan kawalan banjir secara menyeluruh ini turut melibatkan beberapa Jabatan dan Kementerian lain yang turut terlibat dalam perkara ini. Namun, Kementerian Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa) telah menyediakan Rancangan Fizikal Negara Keempat (RFN4) yang dilancarkan pada 17 November 2021. Dasar ini telah mengenal pasti tindakan bagi meningkatkan kesiapsiagaan terhadap bencana secara keseluruhan termasuk perancangan pembangunan baharu. Langkah-langkah yang diperlukan bagi meningkatkan kesiapsiagaan terhadap bencana adalah seperti berikut:

- i) menyediakan peta bahaya bencana di peringkat tempatan untuk memudah cara perancangan berasaskan risiko. Peta risiko bencana perlu dijadikan asas perancangan guna tanah dalam menentukan kesesuaian guna tanah pada masa hadapan, langkah-langkah mitigasi yang perlu dirangka serta penyediaan kemudahan infrastruktur dan utiliti yang berkesan serta berdaya tahan;
- ii) melaksanakan kajian penilaian risiko dan kerapuhan (*risk & vulnerability assessment*) untuk mengenal pasti tahap risiko bencana di suatu kawasan bagi tujuan perancangan pembangunan baharu;
- iii) menyediakan dan menaik taraf kemudahan dan infrastruktur bersesuaian berpandukan hasil kajian penilaian risiko dan kerapuhan sebagai panduan untuk meningkatkan kesiapsiagaan

semasa berlaku bencana. Sebagai contoh membuat perancangan laluan alternatif terutama bagi projek yang berkepentingan nasional;

- iv) menubuhkan pusat pemindahan mangsa bencana pelbagai fungsi (*disaster management training centre*) untuk penduduk setempat di kawasan yang bersesuaian. Bagi kawasan penempatan yang dikenal pasti mempunyai risiko bencana tinggi, sebuah pusat latihan pengurusan bencana perlu ditubuhkan untuk memudah cara program *Community-Based Disaster Risk Management* (CBDRM) demi memperkasa penduduk setempat dalam kesediaan menghadapi bencana. Sekiranya tempat ini berada di luar musim bencana, pusat pemindahan ini boleh digunakan untuk pelbagai kemudahan dan aktiviti komuniti setempat;
- v) mengurus banjir kilat melalui konsep "*Sponge City*" dalam pengurusan air perbandaran. "*Sponge City*" merupakan konsep penyimpanan dan penggunaan air hujan berskala besar yang membantu mengurangkan risiko banjir kilat dan meningkatkan jumlah air yang boleh diguna semula. Oleh itu, konsep ini merupakan langkah responsif yang perlu dimanfaatkan di kawasan perbandaran yang sering mengalami banjir kilat dan gangguan bekalan air. Aplikasi konsep "*Sponge City*" adalah berbeza di setiap bandar bergantung kepada keperluan dan konteks setempat;
- vi) menjalankan Kajian Perancangan Guna Tanah bagi Pembangunan "*Sponge City*". Garis panduan perancangan guna tanah bagi pembangunan "*Sponge City*" perlu disediakan supaya pembangunan yang dirancang dapat mengurangkan risiko bencana di samping menghasilkan guna tanah yang lebih teratur, kemas dan sistematik. Garis panduan ini akan membantu

agensi yang bertanggungjawab terutamanya PBT dalam melaksanakan pembangunan “*Sponge City*” dari segi perancangan, pembangunan, perundangan, pengurusan dan penguatkuasaan. Kajian ini juga perlu mengenal pasti bandar-bandar yang sering mengalami masalah banjir kilat dan kekurangan bekalan air yang serius. Ini membolehkan bandar-bandar berpotensi untuk dikenal pasti sebagai projek perintis menjalani transformasi dan diubah suai semula sebagai “*Sponge City*”;

- vii) mengaplikasikan konsep “*Living with Flood*” iaitu sebuah pendekatan untuk menyesuaikan masyarakat setempat dengan risiko banjir. Di kawasan lembangan banjir, kaedah-kaedah adaptasi melalui *nature-based solutions* (NbS), kerja-kerja tebatan banjir dan penyesuaian persekitaran fizikal perlu diaplikasikan bergantung kepada intensiti banjir. Sekiranya kaedah NbS dan tebatan banjir dikenal pasti tidak sesuai, langkah-langkah penyesuaian persekitaran fizikal perlu diutamakan seperti pembinaan struktur bangunan yang mesra banjir.

Langkah-langkah yang digariskan ini diterjemahkan di peringkat Negeri dan Tempatan melalui Rancangan Struktur Negeri dan Rancangan Tempatan bagi tujuan kawalan perancangan. KPKT melalui PLANMalaysia juga telah menyediakan Kajian Rancangan Fizikal Zon Persisiran Pantai Negara Ke-2 (RFZPPN2) yang mengambil kira tahap kerapuhan (*vulnerability*) terhadap bencana banjir dan hakisan pantai bagi kawasan perbandaran dan petempatan yang terletak di zon persisiran pantai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 14.03.2022 (ISNIN)

SOALAN

Tuan Ma'mun bin Sulaiman [Kalabakan] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan usaha-usaha Kerajaan dalam merangka pelan-pelan jangka pendek dan jangka panjang bagi menangani kenaikan drastik harga barangan keperluan terutama barangan makanan di mana terdapat ketidakseimbangan dengan kadar upah yang masih rendah dan peratusan pengangguran akibat kehilangan pekerjaan yang semakin tinggi di kalangan rakyat.

JAWAPAN:

Yang di-Pertua,

Untuk makluman Yang Berhormat, Pelan Jangka Pendek yang diambil adalah mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barangan tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Kerajaan juga melaksanakan Program Jualan Keluarga Malaysia (PJKM) di seluruh negara di lokasi tertentu yang menawarkan barangan pada jualan pada harga yang berpatutan bagi barang keperluan pengguna.

Pelan Jangka Panjang adalah Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barangan secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

Kementerian bekerjasama rapat dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal. Kementerian sentiasa memantau kos-kos input di pasaran agar kerajaan dapat mengenalpasti punca kenaikan harga di setiap peringkat perniagaan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN RUBIAH BT. WANG (KOTA SAMARAHAN)

TARIKH : 14 MAC 2022 (ISNIN)

SOALAN

PUAN RUBIAH BINTI HAJI WANG (KOTA SAMARAHAN) minta **MENTERI DALAM NEGERI** menyatakan menerangkan status terkini bilangan permohonan kewarganegaraan yang diterima dan bilangan permohonan yang diluluskan khususnya daripada kanak- kanak 18 tahun ke bawah yang berstatus warganegara tetapi belum ditentukan dari Sabah atau Sarawak.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Pendaftaran Negara (JPN) dari tahun 2017 hingga 15 Februari 2022, sebanyak **9,259 permohonan** kewarganegaraan yang diterima untuk kanak-kanak di bawah umur 18 tahun dari Sabah dan Sarawak dan dari jumlah itu, **198 permohonan** diluluskan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB PUAN RUBIAH BT. WANG (KOTA
SAMARAHAN)**

TARIKH : 14 MAC 2022 (ISNIN)

SOALAN

PUAN RUBIAH BINTI HAJI WANG (KOTA SAMARAHAN) minta **MENTERI DALAM NEGERI** menyatakan menerangkan status terkini bilangan permohonan kewarganegaraan yang diterima dan bilangan permohonan yang diluluskan khususnya daripada kanak- kanak 18 tahun ke bawah yang berstatus warganegara tetapi belum ditentukan dari Sabah atau Sarawak.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Pendaftaran Negara (JPN) dari tahun 2017 hingga 15 Februari 2022, sebanyak **9,259 permohonan** kewarganegaraan yang diterima untuk kanak-kanak di bawah umur 18 tahun dari Sabah dan Sarawak dan dari jumlah itu, **198 permohonan** diluluskan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN AHMAD FAHMI BIN MOHAMED
FADZIL (LEMBAH PANTAI)**

TARIKH : 14 MAC 2022 (ISNIN)

SOALAN

TUAN AHMAD FAHMI BIN MOHAMED FADZIL (LEMBAH PANTAI) minta **MENTERI PERUMAHAN DAN KERAJAAN TEMPATAN** menyatakan adakah Kerajaan akan membentang satu Rang Undang-Undang Pembangunan Semula Bandar Raya atau undang-undang yang berkenaan, berhubung usaha pembangunan semula terutama bangunan-bangunan lama di kawasan bandar.

JAWAPAN

Tuan Yang di-Pertua,

Untuk makluman Ahli Yang Berhormat, berdasarkan Garis Panduan Pelaksanaan Pembaharuan Semula Bandar (*urban renewal*) yang disediakan oleh Kementerian Perumahan dan Kerajaan Tempatan (KPKT) melalui PLANMalaysia (Jabatan Perancangan Bandar dan Desa), pembangunan semula bandar ditafsirkan sebagai satu program yang komprehensif dan bersepadu untuk tempoh jangka panjang bagi menangani isu keusangan dari segi fizikal, persekitaran dan sosial di sesuatu kawasan bandar.

Sehingga kini, tiada perundangan yang khusus bagi pelaksanaan pembangunan semula bandar di negara ini. Walau bagaimanapun, bagi menangani isu bangunan usang khususnya yang melibatkan skim strata, Jabatan Ketua Pengarah Tanah dan Galian (JKPTG) sedang menggubal pindaan terhadap Akta Hakmilik Strata 1985 (Akta 318) berkaitan persetujuan pemilik petak serta tatacara penamatan skim strata bagi membolehkan pembinaan semula bangunan.

Akta Perancangan Bandar dan Desa 1976 (Akta 172) juga membolehkan Pihak Berkuasa Perancang Tempatan (PBPT) mengenal pasti dan mengisytiharkan kawasan untuk dibangunkan sebagai kawasan pemajuan melalui subseksyen 38(1). Seterusnya menurut subseksyen 38(2), apabila sesuatu kawasan diisytiharkan sebagai kawasan pemajuan, adalah menjadi kewajipan PBPT untuk mengambil melalui pembelian atau pengambilan paksa di bawah Akta Pengambilan Tanah 1960, semua tanah beri hak milik yang terletak di dalam kawasan itu, dan kawasan itu hendaklah dimajukan mengikut rancangan kawasan khas yang diwartakan.

Menurut subseksyen 38(2) Akta 172 juga, PBPT boleh menubuhkan perbadanan dengan kelulusan Menteri Besar atau Ketua Menteri untuk menjalankan dan memegang tanggungjawab, perjalanan dan pengurusan

apa-apa projek, skim atau perusahaan yang telah dirancang atau diusahakan oleh PBPT, mengenai pembangunan suatu kawasan pemajuan. Pengenalpastian kawasan pemajuan bermula semasa penerimaan suatu rancangan kawasan khas.

Untuk makluman Ahli Yang Berhormat juga, walaupun satu bentuk perundangan masih tidak wujud, tetapi banyak program pembaharuan semula bandar telah dilaksanakan sejak tahun 2000 lagi. Ia melibatkan pelaksanaan oleh pihak swasta bagi kawasan pembaharuan semula bandar yang menghasilkan pulangan ekonomik yang sewajarnya. Bagi kawasan/bangunan usang yang tidak membawa pulangan ekonomik kepada pihak swasta, maka satu bentuk/kaedah pembaharuan semula bandar hendaklah dipertimbangkan bagi mengelakkan kawasan/bangunan tersebut terus merosot serta menimbulkan isu *urban decay*.

Sehubungan itu, KPKT berpandangan terdapat keperluan untuk menjalankan kajian secara terperinci bagi menentukan kesesuaian penggubalan satu undang-undang khusus berkaitan pembaharuan semula bandar.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN WONG KAH WOH [IPOH
TIMUR]**

TARIKH : 14 MAC 2022 (ISNIN)

SOALAN

TUAN WONG KAH WOH minta **MENTERI KESIHATAN** menyatakan sejauh manakah tindakan yang telah diambil oleh Kerajaan terhadap syor pengambilalihan aplikasi Mysejahtera oleh pihak Kerajaan seperti dalam Laporan Jawatankuasa Kira-Kira Wang Negara (PAC) Parlimen yang dibentangkan di Dewan Rakyat pada 1 Disember 2021.

JAWAPAN

Tuan Yang di-Pertua,

1. Kementerian Kesihatan telah mengambil alih aplikasi MySejahtera secara rasmi pada bulan Disember 2021. MySejahtera adalah satu aplikasi orang ramai (*mass application*) yang kompleks dan memerlukan satu pasukan dengan kepakaran canggih yang khusus.
2. Kementerian Kesihatan sebagai pemilik MySejahtera kini telah menubuhkan Jawatankuasa Pemandu MySejahtera yang dipengerusikan oleh YB Menteri dengan keahlian pelbagai pihak seperti Kementerian Sains, Teknologi dan Inovasi, MAMPU, MDEC dan MCMC untuk tujuan tadbir urus dan hala tuju MySejahtera termasuklah dalam mempertimbangkan kos dibandingkan dengan manfaat untuk

SOALAN NO : 84

pengambilan MySejahtera secara sepenuhnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN LIM LIP ENG (KEPONG)

TARIKH : 14 MAC 2022 (ISNIN)

SOALAN

TUAN LIM LIP ENG (KEPONG) minta **MENTERI DALAM NEGERI** menyatakan sebab-sebab Kerajaan enggan menandatangani Konvensyen Status Pelarian 1951 dan Protokol Status Pelarian 1967. Berapa jumlah terkini pelarian di Malaysia mengikut kewarganegaraan asal mereka.

JAWAPAN

Tuan Yang di-Pertua,

Pendirian Kerajaan sama ada untuk menandatangani Konvensyen Mengenai Status Pelarian 1951 dan Protokol 1967 adalah diselaraskan oleh Majlis Keselamatan Negara selaku agensi yang bertanggungjawab mengenai pengurusan Pendatang Asing Tanpa Izin yang memegang kad UNHCR di Malaysia.

Sehingga 31 Disember 2021, seramai 180,448 orang Pendatang Asing Tanpa Izin yang memegang kad UNHCR dan pemohon suaka direkodkan oleh agensi *United Nations High Commissioner for Refugees*. Daripada jumlah keseluruhan tersebut, warganegara Myanmar mencatatkan angka tertinggi seramai 155,406 orang atau 86.12%. Daripada jumlah tersebut, etnik Rohingya mencatatkan komposisi terbesar iaitu seramai 103,380 orang dan bakinya adalah etnik lain-lain. Manakala 3.73% atau 6,738 orang adalah terdiri daripada warganegara Pakistan dan 3,308 orang atau 1.83% warganegara Syria.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

**DARIPADA : YB DATUK SERI PANGLIMA WILFRED MADIUS
TANGAU (TUARAN)**

TARIKH : 14 MAC 2022 (ISNIN)

SOALAN

DATUK SERI PANGLIMA MADIUS TANGAU (TUARAN) minta **MENTERI DALAM NEGERI** menyatakan sejauh manakah pelaksanaan kesemua rekomendasi dalam RCI mengenai pendatang asing di Sabah setakat ini dan bilakah kad pengenalan Malaysia yang sedia ada diganti dengan kad pengenalan baru berteknologi tinggi.

JAWAPAN

Tuan Yang Di Pertua,

Seperti Ahli Yang Berhormat sedia maklum, Jawatankuasa Pengurusan Warga Asing di Sabah (JKPWAS) telah ditubuhkan oleh Kerajaan susulan daripada syor Suruhanjaya Siasatan Diraja (Royal Commission of Inquiry - RCI) Mengenai Pendatang Asing di Sabah bertujuan untuk mengkaji dan membincangkan isu berkaitan pendatang dan warga asing di Sabah.

Oleh yang demikian, isu berkaitan pendatang dan warga asing di Sabah telah dibincangkan melalui platform JKPWAS. Kementerian Dalam Negeri sentiasa peka terhadap isu orang yang tidak berdokumen (*undocumented*) di Sabah. Perihal pengurusan warga asing di Sabah memerlukan *political will* serta komitmen yang tinggi daripada semua pihak. Ini termasuk daripada pemimpin politik, ketua-ketua masyarakat dan kaum untuk mencari persamaan dan kesepakatan dalam mendapatkan penyelesaian kepada isu yang telah lama berpanjangan ini. Kerjasama dan komitmen ini adalah amat perlu bagi memastikan isu ini tidak lagi dipolitikkan oleh mana-mana pihak selepas suatu keputusan dimuktamadkan kelak.

Manakala bagi menjawab pertanyaan Ahli Yang Berhormat berhubung kad pengenalan berteknologi tinggi. Kerajaan mengambil maklum dan sentiasa terbuka untuk menambahbaik kualiti MyKad sedia ada dari semasa ke

semasa. Untuk makluman, MyKad sedia ada telah mempunyai ciri-ciri keselamatan bermutu tinggi serta lebih canggih seperti berikut:

- i. Ia diperbuat daripada bahan polikarbonat sepenuhnya dan telah diuji ketahanannya di makmal yang diiktiraf;
- ii. Cip MyKad melalui beberapa peringkat pengujian termasuklah sebelum proses memasukkan cip ke dalam MyKad; dan
- iii. Turisan laser pada nama, nombor Kad Pengenalan dan gambar kecil (ghost image) bagi mengelakkan maklumat daripada dipinda dan sekiranya terdapat pindaan, pindaan tersebut dapat dikesan dengan mudah dan pantas.

Oleh yang demikian, keselamatan MyKad adalah terjamin dan tidak terancam oleh sindiket-sindiket yang berniat untuk mengeluarkan MyKad secara tidak teratur.

Dalam masa yang sama, selaras dengan perkembangan teknologi dan keperluan semasa, Kementerian melalui JPN sedang mengkaji dan meneliti cadangan berkaitan pelaksanaan Inisiatif Identiti Digital Nasional (IDN) dari sudut rangka kerja perundangan, struktur tadbir urus dan sebagainya sebelum ia dilaksanakan di Malaysia. IDN merupakan antara inisiatif penting dalam usaha Kerajaan untuk memenuhi agenda digitalisasi sosial negara. Ia adalah suatu platform pengesahan yang dipercayai (*Verifiable Platform of*

Trust) yang boleh dimanfaatkan oleh individu, sektor awam dan swasta untuk pengesahan identiti pengguna semasa melakukan transaksi secara digital. Walau bagaimanapun, IDN tidak akan menggantikan penggunaan dan fungsi MyKad fizikal malah ia akan memperkukuhkan pelaksanaan dan keselamatan MyKad sedia ada.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : DATUK ROZMAN BIN ISLI (LABUAN)

TARIKH JAWAB : 14 MAC 2022 (ISNIN)

SOALAN

DATUK ROZMAN BIN ISLI (LABUAN) minta **MENTERI PERUMAHAN DAN KERAJAAN TEMPATAN** menyatakan adakah Kerajaan bercadang untuk mewujudkan sebuah Tabung Bencana di peringkat Pihak Berkuasa Tempatan agar persiapan dan bantuan bencana dapat disalurkan dengan lebih lancar dan berkesan.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa menyokong hasrat kerajaan untuk menyelesaikan masalah rakyat di semua peringkat termasuk Kerajaan Tempatan. KPKT turut dipertanggungjawabkan sebagai agensi penyelarar bagi kerja-kerja pembersihan pasca bencana banjir dan kesiapsiagaan dengan membantu menyegerakan operasi pengurusan dan pelaksanaan pembersihan sebagai komitmen dalam pasca pemulihan bencana banjir.

Kerajaan Persekutuan telah menubuhkan Tabung Bantuan Bencana Negara (TBBN) di bawah Agensi Pengurusan Bencana Negara (NADMA). Pihak NADMA bertanggungjawab untuk menyelarar penyaluran bantuan tersebut kepada pihak Jawatankuasa Bencana Negeri, Jawatankuasa Bencana Daerah dan pihak lain yang berkaitan. Untuk bencana banjir yang melanda negara baru-baru ini, NADMA telah menyalurkan peruntukan sejumlah RM106 juta untuk diagihkan sebagai Bantuan Wang Ihsan (BWI) kepada mangsa-mangsa bencana banjir.

Memandangkan sistem bantuan melalui tabung bencana sedia ada telah berjalan dengan baik di setiap peringkat, KPKT tidak bercadang untuk mewujudkan tabung bencana di peringkat PBT.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB PUAN KASTHURIRAANI A/P PATTO (BATU KAWAN)

TARIKH : 14 MAC 2022 (ISNIN)

SOALAN

PUAN KASTHURIRAANI A/P PATTO (BATU KAWAN) minta **MENTERI DALAM NEGERI** menyatakan :-

(a) bilangan kes kematian dalam tahanan (lock-up), penjara dan tahanan imigresen dari tahun 2015 sehingga kini mengikut pecahan balai polis, penjara serta tahanan imigresen dimana kematian berlaku, jantina, kaum, umur, latar belakang kematian, bilangan anggota penguatkuasa yang disabit bersalah yang mengakibatkan kematian dalam tahanan dan wang pampasan yang telah dibayar kepada keluarga individu kes kematian dalam tahanan; dan

(b) bolehkah Suruhanjaya Integriti Agensi Penguatkuasaan (SIAP) menyiasat kematian dalam tahanan dan merujuknya ke mahkamah. Jika ya, berapa kes telah dirujuk ke mahkamah dan jika tidak, mengapa.

JAWAPAN

Tuan Yang Di Pertua,

Untuk makluman Ahli Yang Berhormat, Kementerian Dalam Negeri melalui Polis Diraja Malaysia, Jabatan Penjara Malaysia dan Jabatan Imigresen Malaysia sering menitik beratkan isu kebajikan dan keselamatan tahananbanduan di lokap polis, penjara dan depot imigresen.

Bagi tempoh 2015 sehingga 28 Februari 2022, terdapat 87 kematian tahanan lokap melibatkan 84 orang lelaki dan tiga orang wanita. Antara sebab-sebab kematian yang dikenal pasti oleh pihak hospital adalah berpunca daripada serangan jantung, pendarahan otak dan gantung diri.

Manakala 56 orang banduan lelaki dan seorang banduan wanita telah meninggal dunia dari tahun 2015 sehingga 2021 disebabkan beberapa punca antaranya gantung diri, serangan jantung, *Human Immunodeficiency Virus* (HIV), jangkitan kuman dalam darah serta jangkitan kuman pada paru-paru.

Bagi tempoh 2015 sehingga 15 Februari 2022 pula, terdapat 356 kematian dalam kalangan tahanan depot imigresen iaitu 304 orang lelaki, 43 orang wanita dan sembilan orang kanak-kanak lelaki. Antara sebab-sebab kematian yang dikenal pasti oleh pihak hospital adalah berpunca daripada penyakit *Septic Shock*, *Tuberculosis* (TIBI), *Severe Pneumonia*, jangkitan paru-paru, komplikasi jantung, denggi, kencing manis, sesak nafas dan kegagalan fungsi organ.

Sepanjang tempoh tersebut tiada pegawai polis, pegawai penjara mahupun anggota penguatkuasa imigresen yang telah disabitkan bersalah mengakibatkan kematian tahanan atau banduan yang terbabit. Justeru, tiada sebarang bayaran pampasan yang terlibat.

Kerajaan sentiasa menitikberatkan kepentingan terbaik untuk semua tahanan dan banduan yang ditahan. Antara langkah-langkah yang diambil oleh pihak Kementerian Dalam Negeri bagi mencegah kematian semasa dalam tahanan termasuklah:

- (i) menyediakan Fail Rekod Kesihatan untuk setiap tahanan;
- (ii) memantau dan menyelaras urusan pembekalan, penyimpanan dan pemberian ubat-ubatan kepada tahanan;
- (iii) memastikan peralatan kecemasan lengkap dan berkeadaan baik pada setiap masa;
- (iv) membuat pemeriksaan dan penyaringan penyakit ke atas tahanan baharu tiba;
- (v) melakukan rawatan awal, segera dan mengikut keutamaan melalui kerjasama Kementerian Kesihatan Malaysia;
- (vi) memeriksa, diagnosis dan merawat penyakit yang ringan,

- merujuk semua kes yang di luar kemampuan kepada pegawai perubatan atau hospital berhampiran untuk rawatan selanjutnya;
- (vii) memantau sajian makanan yang disediakan untuk tahanan;
 - (viii) mencegah tindakan bunuh diri oleh tahanan;
 - (ix) membuat pemantauan berkala tahap kesihatan mental banduan atau tahanan melalui ujian *Depression Anxiety Stress Scales* (DASS); dan
 - (x) melaksanakan inisiatif pemeriksaan kesihatan Orang Kena Tahan (OKT) oleh pengamal perubatan swasta bagi membantu kekurangan pegawai perubatan Kerajaan sedia ada.

Suruhanjaya Integriti Agensi Penguatkuasaan (EAIC) sebagaimana fungsinya yang diperuntukkan di bawah seksyen 4 Akta Suruhanjaya Integriti Agensi Penguatkuasaan 2009 [*Akta 700*], boleh menyiasat aduan berkaitan kematian dalam tahanan berdasarkan ruang lingkup salah laku di bawah seksyen 24 Akta 700. Sekiranya EAIC berpandangan ia adalah berdasarkan kepentingan awam, EAIC boleh menyiasat kes tersebut berdasarkan peruntukan seksyen 28 Akta yang sama.

Walau bagaimanapun, Akta 700 tidak memperuntukkan kuasa kepada EAIC untuk merujuk dapatan siasatan kepada Mahkamah. Sekiranya EAIC mendapati hasil dapatan siasatan salah laku itu merupakan suatu kesalahan jenayah, EAIC hendaklah merekodkan dapatannya dan merujuk laporan

SOALAN : 88

serta kertas siasatan kepada Pendakwa Raya sebagaimana yang diperuntukkan di bawah perenggan 30(1)(c) Akta 700.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI SHABUDIN BIN YAHAYA
[TASEK GELUGOR]**

TARIKH : 14.03.2022 (ISNIN)

SOALAN

Datuk Haji Shabudin bin Yahaya [Tasek Gelugor] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah tindakan yang diambil terhadap kartel yang dipercayai mengawal harga barangan keperluan harian sehingga menyusahkan pengguna.

JAWAPAN

Yang di-Pertua,

1. Untuk makluman Ahli Yang Berhormat, Kementerian Perdagangan Dalam Negeri dan Hal Ehwal Pengguna (KPDNHEP) memandang serius isu perlakuan kartel yang menyumbang kepada kenaikan harga barang serta sabotaj ekonomi negara. Oleh itu, Kementerian melalui Suruhanjaya Persaingan Malaysia (MyCC) tidak akan teragak-agak untuk mengambil tindakan tegas terhadap pelaku-pelaku kartel itu.
2. Baru-baru ini, MyCC telah mengenakan penalti kewangan sebanyak RM 2.19 juta terhadap 5 perusahaan kapal Ro-Ro di Langkawi kerana didapati telah terlibat dalam kartel menaikkan dan menetapkan tambang bagi kenderaan komersial serta kenderaan persendirian yang menggunakan kapal Ro-Ro milik perusahaan-perusahaan tersebut. Selain itu, MyCC turut mengenakan penalti kewangan sebanyak RM 1.04 juta terhadap 7 pengusaha operator gudang di Pelabuhan Klang kerana terlibat dalam kartel penetapan harga berhubung dengan perkhidmatan pengendalian muatan panjang dan muatan berat kargo import dan eksport di Pelabuhan Klang.
3. Secara totaliti, jumlah penalti kewangan yang dikenakan oleh MyCC sejak 2013 kepada perusahaan-perusahaan yang terlibat di dalam kartel adalah lebih kurang RM 154 juta. Antara kes-kes kartel yang disiasat oleh MyCC melibatkan Persatuan Insurans Am Malaysia dan 22 Syarikat Insurans Am, Malaysia Airlines, AirAsia dan AirAsia X, Pengusaha-pengusaha Depoh Kontena di Pulau Pinang, Ahli-

ahli Persatuan Pembuat Roti dan Manisan di Sibu dan Pembuat-Pembuat Air Batu di Selangor, Wilayah Persekutuan dan Putrajaya.

4. Pada masa yang sama, MyCC kini sedang giat menjalankan penilaian aduan dan siasatan terhadap lebih dari 500 perusahaan yang disyaki terlibat dalam kartel terutamanya kartel tipuan bida dalam perolehan kerajaan. Dalam bilangan tersebut, ada juga lebih dari 20 perusahaan yang disiasat kerana disyaki terlibat dalam kartel berkaitan barangan keperluan harian.
5. Selain dari itu, usaha-usaha lain untuk menangani kartel adalah melalui kajian semula pasaran, program advokasi dan juga nasihat dasar kepada agensi kerajaan.
6. Pada Oktober 2021, MyCC telah menerbitkan Kajian Semula Pasaran Sektor Pengangkutan di bawah Akta Persaingan 2010 yang memberi fokus kepada ekosistem logistik pelabuhan dan waranti kenderaan bermotor. Selain itu, terdahulu MyCC juga telah menjalankan kajian semula pasaran berkaitan sektor perkhidmatan (borong dan runcit bagi produk terpilih), makanan, farmaseutikal, bahan binaan, pasaran ayam daging dan badan profesional. Selaras dengan penerbitan Kajian tersebut, Kementerian bersama MyCC telah meneliti isu-isu persaingan, perundangan dan pasaran yang dibangkitkan dalam kajian semula pasaran tersebut yang berpotensi mengganggu-gugat proses persaingan dalam pasaran dan seterusnya mencadangkan serta merencana solusi terhadap isu-isu persaingan yang telah dikenal pasti tersebut.
7. Menerusi kajian semula pasaran yang dijalankan juga, MyCC turut mengenal pasti herotan pasaran serta gangguan terhadap rangkaian

bekalan dalam pelbagai pasaran yang berpotensi menyumbang kepada kenaikan kos pengeluaran serta harga barangan.

8. Untuk mempertingkatkan lagi pematuhan kepada undang-undang serta polisi persaingan, MyCC turut mengeluarkan nasihat dasar dan pandangan ekonomi kepada Kementerian dan agensi kerajaan berkenaan isu-isu persaingan yang menyentuh kos sara hidup. Sehingga kini, MyCC telah mengeluarkan sebanyak 69 nasihat dasar dan 20 pandangan ekonomi bagi memastikan dasar Kerajaan adalah sejajar dengan prinsip persaingan dan seterusnya membantu dalam membasmi perlakuan kartel tersebut.
9. Untuk makluman Ahli Yang Berhormat juga, MyCC juga melaksanakan program-program advokasi yang berimpak tinggi bagi menyuntik kesedaran kepada Kementerian dan agensi kerajaan, persatuan dan pemain industri serta rakyat umum berkenaan isu penetapan harga dan kartel yang melanggar Akta Persaingan 2010 (Akta 712). Sehingga kini MyCC telah melaksanakan sebanyak 321 program advokasi dan majoritinya bertumpukan kepada kartel.
10. Akhir sekali, bagi memperkasakan penguatkuasaan Akta Persaingan 2010 (Akta 712) terhadap kartel-kartel, MyCC sedang giat membuat pindaan terhadap Akta tersebut dengan menambah baik peruntukan perundangan sedia ada serta memasukkan peruntukan-peruntukan baru bagi menjamin penguatkuasaan Akta Persaingan 2010 (Akta 712) yang lebih holistik dan berkesan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 14.03.2022 (ISNIN)

SOALAN

Tuan Wong Ling Bui [Sarikei] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah faktor-faktor yang diambil kira oleh Kementerian semasa menetapkan harga terhadap sesuatu barang makanan.

JAWAPAN:

Yang di-Pertua,

Kementerian mengadakan pelbagai perbincangan dan libat urus bersama kementerian berkaitan terutama MAFI dan agensi kerajaan dalam menentukan harga barang yang hendak dikawal. Sesi libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa bagi mendapatkan gambaran sebenar situasi bekalan dan harga.

Penetapan harga dibuat berdasarkan faktor-faktor penawaran dan permintaan, kos-kos input terlibat di semua peringkat rantai bekalan, isu-isu semasa dalam dan luar negara serta merujuk kepada trend harga semasa. Perbandingan dengan rekod pemantauan harga lama oleh kementerian juga antara faktor terlibat dalam penentuan harga akan datang. Penetapan harga turut mengambil kira kepentingan semua pihak di pelbagai peringkat rantai bekalan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : 14 MAC 2022 (ISNIN)

SOALAN

Minta **MENTERI PEMBANGUNAN USAHAWAN DAN KOPERASI** menyatakan apakah pelan tindakan yang dilaksanakan dan dirangka oleh pihak Kementerian bagi menggalakkan penglibatan usahawan mikro, kecil dan sederhana untuk mendigitalisasikan perniagaan mereka memandangkan prospeknya yang semakin meluas dan dijangka akan berkembang di masa hadapan.

JAWAPAN

Tuan Yang di-Pertua,

Kementerian Pembangunan Usahawan dan Koperasi (KUSKOP) komited dalam memperkukuhkan daya tahan serta daya saing Perusahaan Mikro, Kecil dan Sederhana (PMKS) terutamanya melalui adaptasi teknologi dan digitalisasi.

Bagi menggalakkan dan mempercepatkan penerimgunaan pendigitalan dalam kalangan PMKS, KUSKOP melalui agensi-agensi akan melaksanakan beberapa program pendigitalan PMKS pada tahun ini. Antaranya adalah seperti berikut:

- (i) Program Bimbingan Jualan Atas Talian (e-Board) di bawah INSKEN;
- (ii) Platform Pybli (sebutan: Pi Beli) di bawah Perbadanan Nasional Berhad (Pernas);
- (iii) Platform Angsana Virtual Mall (AVM) di bawah UDA Holdings;
- (iv) Program Pemasaran Online di bawah TEKUN; dan
- (v) Program Adaptasi Teknologi PMKS (MyTAP).

Usaha yang dilaksanakan oleh KUSKOP ini adalah selari dengan sasaran yang telah ditetapkan di bawah Rancangan Malaysia Ke-12 (RMKe-12) untuk memastikan 90% atau lebih daripada 800,000 PMKS mendigitalisasikan operasi perniagaan mereka menjelang 2025.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : TUAN LIM KIT SIANG (ISKANDAR PUTERI)

TARIKH : 14 MAC 2022 (ISNIN)

SOALAN

TUAN LIM KIT SIANG (ISKANDAR PUTERI) minta **MENTERI DALAM NEGERI** menyatakan mengapa tidak ada sesiapa pun dalam Suruhanjaya Pencegahan Rasuah Malaysia (SPRM) yang telah didakwa berhubung dengan kematian Teoh Beng Hock walaupun pihak polis sudah menyelesaikan siasatan dan kebenaran untuk mendakwa telah diberikan.

JAWAPAN

Tuan Yang Di Pertua,

Polis Diraja Malaysia (PDRM) dalam menjalankan siasatan ke atas kes kematian Teoh Beng Hock, telah membuka kembali Kertas Siasatan kes berkenaan di bawah Seksyen 342 Kanun Keseksaan (Kurungan Salah). Kertas siasatan telah dirujuk ke Pejabat Peguam Negara pada 24 Februari 2020 dan pihak PDRM diminta untuk meneruskan siasatan dan mengemukakan kembali kertas siasatan ke pejabat Peguam Negara setelah siasatan lengkap dijalankan.

Untuk makluman, pihak polis telah menjalankan rakaman percakapan ke atas 13 orang saksi dan siasatan masih berterusan. Sehubungan itu, saya tidak berhasrat untuk mengulas lebih lanjut berhubung kes ini bagi mengelakkan ianya mengganggu siasatan.